

餘慶縣志

序圖

凡例

目錄

內閣文庫		
番號	漢	14840
冊數	6 (1)	
函號	國	189 13

書
史百八十九
全四〇號
六號



餘慶縣志序

古者列國皆有詩太史
陳詩以觀民風其俗之
貞淫奢儉班班可考迨
班孟堅漢書於地理一

志紀載精詳歷代宗之
永以爲法則志之有關
於文治大矣哉黔處遐
陬古稱羅甸而平越羗
治在漢爲牂柯地唐屬

播州界蓋以重山密箐
惟苗犵是見柳子厚以
爲非人所居槩可想已
我

國家蕩平以來休養生息幾

近百年文德誕敷苗彛
率服滅澤之所涵濡聲
教之所漸被窮鄉僻壤
莫不鼓舞奮興椎髻卉
裳盡安畊鑿華門蔀屋


競事詩書卽餘慶最爾
一邑試觀其井疆建置
詢其習俗風謠亦雍雍
乎比戶可封矣祗以越
在邊隅相沿簡畧以故

邑乘缺如何以徵文獻
示來茲乎蔣子校書

內廷出宰斯邑敷政餘暇蒐
羅纂輯成志發凡起例
鉅細畢舉一披覽瞭然

在目不特可脩輶軒之
採卽蘭臺載筆以紀職
方亦將於此有取焉則
斯志之成也余固嘉其
意之宏遠矣
康熙五

十五年歲次丙申嘉平
月護理貴州巡撫事務
布政使加三級蓋平白
潢撰



餘慶縣志序

自吾家宣尼因魯史春秋作
經此外則有晉乘楚檇杙蓋
國史所從見端也今乘與檇
杙之行於世者率贗本不足

述然亦足明列國之有史矣
此後如吳越春秋越絕等書
皆自成一家與正史相表裏
再則華陽國志十六國春秋
等編并卓卓分班馬一席采

風紀事可信可徵迨十洲洞
冥拾遺搜神等誕說異矣比
而例之郡則有史邑則有乘
各著方物上貢天家其皇輿
考一統志之分轡乎後世勤

政之主若唐宣宗命學士韋
澳纂州郡風俗土物勒爲一
書上之密勿每臨軒除授輒
用處分一時有明見萬里之
頌今

聖天子在上四海以內無不周知

又遣使分出畫山川地圖并

註道里遠近藏諸黃閣以備

省覽

聖意淵博雖萬萬非唐宗可較而

不辭土壤不擇細流或亦海
嶽所由不測也蔣子以

內廷校書來宰慶邑斗大山城地
多荆榛民多狎裸從前官斯
土者類皆謀食不繼日作擦

睂狀何暇計及於民事並計
及於文治哉而蔣子則雍雍
自如唯是飲冰茹蘖之兢兢
也不敢以躁氣用不敢以汰
色居不敢以淺衷褊心相滅

裂業將兩經報政矣刀耕火
種之俗漸知農桑革門椎髻
之人頗曉誦讀又於勸農教
讀而外搜羅纂輯以成邑志
何前令之視爲可已者茲獨

可已而不已乎予因誌成求
序得以披閱見其綱舉目張
條分縷晰大約仍舊誌十之
一增舊誌十之九至於每篇
首尾皆崇論弘議以抒長吏

惓惓深心又有可爲蔣子推
言者述輿地所以重疆域述
物產所以辨土宜述禮儀所
以示整齊之權述官師所以
見秩秩者有素絲雅義述選

舉所以見濟濟者有思皇明
心法戒具存冰鏡如昨乃知
蔣子之可已而不已者皆前
令之不可已而已者也執掌
餘暇不怠較書

內廷之意此邑誌也不但可信可
徵自成一家足以翼贊正史
而與列國之紀載並峙倘異
日者輶軒採擇上之密勿
則蔣子優於吏事崇尚文治

又將借此以達


宸聰矣因不揣固陋而綴言於篇

末云

康熙五十六年歲次丁酉仲

冬月

欽賜蟒服通議大夫貴州等處提
刑按察使司按察使瑯琊王
沛愼譔



餘慶縣志序

志之爲言紀也紀其疆域土
地風俗與夫戶口賦役人物
莫不於志焉載之以稽典故
以表隆盛非徒侈一時之觀

覽所係豈不鉅哉然通都大邑有可採之書有可紀之事其爲志也易爲力若荒徼僻壤藁爾微區從無文獻之地而欲採集舊聞輯成一書與

通都大邑爭衡其爲志也難爲功雖然無難也亦視乎其人焉耳其人之學淹識廣才瞻則無不可以見長又安在微區靡所表著而使缺焉弗

講置於零落之無考也耶此
餘慶令尹蔣子所由亟亟焉
以邑志爲纂著也蔣子以吳
門名士遍覽羣言又校書
內庭耳目之所聞見旣極淵博其

爲學也淹其爲識也廣其爲
才也瞻一旦出宰邊城慈祥
愷悌有學道愛人之譽於政
事之暇留心討論以爲不知
一邑之事何以言治於是蒐

羅纂述旁求廣覽以今之有
補昔之無以今之詳該昔之
畧考疆域之遠邇察土地之
肥磽審風俗之淳漓稽戶口
賦役人物之多寡隆替莫不

巨細畢該毫無遺缺彬彬乎
餘慶邑誌成帖矣且余又見
蔣子非徒志之於書也更見
諸實行焉於疆域而有保障
之方於土地而有勸課之令

於風俗而有變化之經於戶
口賦役人物而有休養生息
訓迪之宜竭其志慮殫其勤
勞惕惕焉晝晝焉無或倦無
或懈蔣子真循良茂選哉今

之爲令者簿書鞅掌之餘苟
免無過則幸矣誰克留心於
一邑之典章文物蔣子乃於
前人所未爲者而力爲之蓋
通達治體以儒術爲政者也

宓子之鳴琴言氏之絃歌聖
門高弟多名宰焉余於蔣子
厚期之矣
嘗
康熙戊戌春二月

賜進士出身督理貴州糧驛事務
兼分守貴東道布政使司叅
議加一級新安汪升英譔



謝安嘗曰：「書契以前，
無文字，故有結繩之
說。自結繩以前，無
文字，故有結繩之
說。自結繩以前，無
文字，故有結繩之
說。」

餘慶縣志序

自結繩易為書契，然後
百官治萬民，察記載曰
以繁國有，史家有乘而
釋地書尤詳。若書陳禹

貢詩采國風周禮列職
方皆是物也是故有天
下者志天下其次若司
府州縣莫不有志山川
田土民人之籍兵農禮

樂之制庠序學校飲射
讀法之方以治以教於
是焉攷使人生今世而
知達古不出戶而知天
下蓋聖人之功於是為

大而記載之不可以已
也然吾觀天下郡國之
志或迫於功令勉強而
為之若州與縣則往往
有開闢數千百年而未

嘗有成書者雖通都大
邑猶然其小小者則闕
略尤甚豈誠一無足志
耶毋乃司是土者有其
志而無其才或有其才

而無其志故玩廢至於
斯歟縣官之制古或稱
尹若令若長有明易為
知縣其自署曰知某縣
事今司是土而顧使一

邑中山川土田人民之
籍兵農禮樂之制庠序
學校飲射讀法之方孰
沿而孰革孰利而孰弊
茫乎莫攷猶泰然曰我

知縣事也得不得啞然而
自笑哉余奉命典滇試歸道過黔知餘慶
縣蔣君以所為縣志要
於路屬使叙焉余惟餘

慶雖蕞爾邑然自漢以
來已蒞郡治矣自元至
正末定為州明萬曆中
易為縣又三四百年所
其間號為知州事縣事

者無算率莫能為之志
君獨能為之可不謂有
其志又有才乎始余識
君姑蘇徵逐文酒間別
去七八年既余入直史

內

館君亦用薦起校書
廷六年而後授官今蒞茲
土僅三四年乃遂能為
此書信乎賢者之為政
異乎俗吏之為之也彼

世之泰然自以為知州
事縣事而顧使州與縣
之事茫乎莫考者得是
書而讀之能無惕然已
耶

國家文治方隆立賢無方君

行且歸承明之廬克著
作之任他年撰述宜不
止於是顧余反覆是編
網舉而目張事覈而詞

雅創昔時所未有既為
功于一邑為眾人所不
為又足以誘教天下其
於治与教之所繫固已
偉矣因叙而歸之為餘

慶喜為天下為吏者勸
焉康熙五十有六年歲
次丁酉冬十月

賜進士出身朝議大夫
日講官起居注翰林院侍講

學士加一級年家眷同
學弟臨川李紱拜書於
平越邛館



內廷

脩餘慶縣志序
余為諸生時被
纂及方輿路程曾攷黔之平越
其道里之遼遠山川之險阻
為唐播州羈縻之地沿宋元

明自萬曆間始開者也乃一行作吏甫蒞餘陽詢諸邑乘闕焉無有區區郡志中又皆魯魚亥豕不可句讀是豈蠻荒固陋以故文獻無徵耶然考之城池戶籍已入王會版

當宁籌畫餘雖僻壤自不得置之

圖田賦兵防時膺一統車書外也爰於簿書稍暇與廣文許子直菴商畧其事欲求唐宋以來黔蜀掌故如韋臯西戎記樊綽南蠻記

張肅西南蠻朝貢圖等編皆載宋史藝文志中而其書久不獲見即有明郭公青螺先生黔記又殘缺蠹蝕乃不得已稽之通志叅之鄰乘訪之故老擇之芟蕘凡有關於餘

者雖俚必詳其無關於餘者雖文弗錄區域別矣而建設版籍之必稽典秩舉矣而職官人物之必晰志風土不得右漢而左彛志藝文不敢詳今而畧古匪獨欲其信而可

徵亦必求其切而有要固不
惜焚膏繼晷手自繕錄凡五
易其稿而後成雖不敢列於
作者之林亦為宰者靖共之
義宜然也今而後邑之君子
覩斯編而知勸懲具在趨向

有方則人心正而風俗淳庶
幾吾家理縣之譜有嗣而起
之者且不失余之纂修故分
也是則余之志歟

康熙五十七年戊戌二月

武英殿纂修

特授文林郎餘慶縣知縣長洲蔣

深撰并書

山是順令



之皆且不夫余之纂修志也
幾吾家縣志之體而歸而述
市衣順人山五而風谷勢

餘慶縣志

凡例

一餘慶縣舊隸播州自萬曆庚子開設以來從無
專志按康熙癸卯叅議徐公弘業纂修府志載
餘慶一冊僅三十餘頁而已歲蒞餘四載撫字
之暇留心纂述顧文獻寥寥殊難擴入唯旁搜
博覽事取其詳跡歸於確周諮必謹罔敢妄綴
統以八志增廣三百餘篇綱舉目張條分縷悉
一要以傳信云爾

一考區域者類首星野次沿革山川然山陬僻壤而上應天垣理極微渺雖極考校終屬管窺若論沿革其制固靡有定惟山川形勢終古如斯故道理遠近鄰封接壤不厭詳載不必登臨悉羅寸晷矣

一建設莫大於城池公署等事而里甲關隘津梁隄防村寨皆營建之所必及卽塚墓古蹟之屬亦例應得書謂其以人傳也

一戶口田賦卽民數之盛衰關國計之盈縮誠

經國之大政也但條編則例今昔懸殊茲悉以通志及賦役全書爲準在昔規制俱詳載入至積貯之政以拯民艱有脩無患豈容緩置故畧抒芻蕘之論以俟採擇

一典秩首列文廟崇聖道也雖祠廟有當並載者然特以文廟爲尊凡事關學宮以及捐建義學名宦祠之事悉覈詳記用垂久遠

一服官斯土者自設縣以來姓氏年代次第可考獨名宦無幾著於職官之首至兵防一項惟照

經制開載以脩覽觀

一 人物必歿身而論定循舊例也但餘慶風教初開人物鮮著故鄉賢祠缺而未建鄉飲禮從未舉行是以孝義隱逸流寓列女諸人務必廣搜增入至於選舉始於

本朝列之於孝義後者生爲賢大夫沒而祭於社者與諸君子之爲山川生色也

一 餘邑風土稍同於蜀亦無異於全黔其同於蜀者以地接川東且舊隸於播故物產氣候約畧

相似其無異於全黔者漢苗雜居卉衣馱舌之徒星羅而碁布然俗淳戶靜黠驚無聞是在撫綏者之得其術也

一 藝文爲政事所由著風俗所由成山川人物所由顯故脩採諸體之關於餘邑者以文固陋要以披閱所及典章興革風流文采燦然在目好古之士不無小補云

一 志與史體各不同史則瑕瑜並載有褒有貶志則棄其媿而取其妍非諛也遵一統志例也

奉

欽命纂修天祿石渠之書竊經寓目今邊地無書可
考攜來載籍不滿千卷唯取黔記黔書通志郡
志等書折衷而論定之書成三載業質千秋其
鳩工鐫板悉係自捐不資於邑之士紳者恐志
之未盡善也康熙丁酉八月長州蔣浚識

餘慶縣志目次

序文

凡例

圖說

縣圖

卷之一

區域志

星野

沿革

分界

形勢

山川

名勝

卷之二

建設志

城池

公署

里甲

場市附

村寨

關隘

郵傳

津梁

塚墓

古蹟

附碑匾

卷之三

版籍志

戶口

田土

租賦

解支

積貯

卷之四

典秩志

學校
目太鄉飲

壇壝

附寺觀

卷之五

職官志

名宦

文秩

武統

塘汛

土司

卷之六

人物志

孝義

選舉

隱逸

鄉耆

流寓

列女

卷之七

風土志

風俗

方言

氣候

歲時

占候

土產

苗蠻

苗語

災祥

卷之八上

藝文志

諭告

疏

記

銘

論

序

考

傳

書

引

賦

卷之八下

藝文志

五古

七古

五律

五排

七律

七絕

跋

政令

附條議

後序

縣境圖說

昔軒轅疆理天下得百里之國萬區餘慶舊隸播
州後代開建最遲然在草昧之初要亦萬區之一
也矧莊躋之畧地唐蒙之持節史冊昭然而夜郎
牂牁猶存遺跡今


聖天子中外一統聲教所訖東西朔南自古未通中
國者皆得列之職方則餘雖小封疆區域寧不可
按圖而考乎作圖說

境縣



總圖





餘慶縣志卷之一

武英殿纂修特授餘慶縣知縣長洲蔣 淡輯

儒學教諭許之獬校

區域志

星野
名勝

沿革

分界

形勢

山川

以九州視黔地惟黑子以黔視餘慶渺乎彈丸然
先王量地以制邑度地以居民一里一鄉莫非王
土豈比大渡烏思爲玉斧之所截耶况旣割播州
之一幅歸於黔省縣屬田土人民又交錯於黃平
甕安湄潭施秉石阡之間凡山川之阨塞村寨之

繁曠務必分明詳載故其區域之應志者分六條目焉

一星野

觜觿參益州

漢書天文志

禹貢梁州之域天文井鬼分野入觜一度參七度

府志

黔古無分野談者以爲益州是以有觜參之說以其近梁州是以有井鬼之說萬曆庚子狼星入東井占者以爲滅播之象旣而果應此豈非占在參

井之一証耶

通志

平越古益州裔也地屬重慶南近滇雲東臨辰沅故星分占候多主益州然依滇辰推算占候或多不合又稽先賢躔次曰平越距武陵較近入軫十度似爲翼軫之餘又曰平越本屬梁州迨漢武帝增置越巂犍爲牂柯三郡改梁爲益州則平越又專屬牂柯罷矣大約梁益幅員最廣而黔南在漢唐猶未開建地多荒昧故平越之星野最難詳定然合諸家之說參之則梁益之西北多屬井鬼其

東南多屬觜參而平越雖附滇蜀東接楚疆又連翼軫故占測之家恒謂平越爲參井翼軫餘氣也

府志

論曰說者因平越爲播州地播屬益州故謂平越爲參井之餘又謂黃平爲井鬼分考餘慶去黃平六十里均隸平越府轄其爲參井之餘無疑獨是石阡府與鎮遠屬之施秉縣距餘慶不及百里郭外土田如大牙繡錯考其躔次又謂翼軫其分野微茫似難區別故脩錄前賢之論

以俟天文家考定其圖不列云

沿革

唐虞屬荆梁南境

殷屬鬼方

秦屬且蘭

漢屬牂柯郡

唐屬播州路樂源郡○乾符三年以白泥餘慶兩土官爲校尉隸播州路

宋因唐舊

元初改白泥餘慶爲長官司隸播州至正末改白泥司爲白泥州餘慶司爲餘慶州

通志

明初爲州如故改隸四川重慶府播州宣慰司轄制
○洪武十七年仍改餘慶州白泥州爲長官司○
萬曆二十七年春三月壬寅播州宣慰司楊應龍
寇平越飛練殺都司楊國柱等○二十八年二月
丙戌總督李化龍貴州巡撫郭子章湖廣巡撫支
可大誓師合兵討播○三月戊午播賊突犯烏江
河渡叅將楊顯守脩陳雲龍阮士奇白明達指揮

楊續芝等死之○三月己未平越兵渡構皮灘河

○六月丁丑滅播州楊應龍自經死俘其妻子及

賊黨○二十九年春正月壬子頒平播詔於天下

○三月己亥詔分播地以播州爲遵義府隸四川

革五司以其地爲平越軍民府隸貴州設黃平州

潛潭甕安餘慶三縣隸平越府

通志

平播後撫按議奏改白泥餘慶兩司爲餘泥縣神

宗特旨改爲餘慶縣屬平越府改餘慶長官司爲

土縣丞白泥長官司爲土主簿編定三里

府志

國朝仍照萬曆二十九年改縣舊制編戶白泥餘慶
合江三里○康熙二十七年奉旨割撥黃平州附近白泥之處曰新歸里
論曰地之分合因平時制之便否酌其勢餘慶
自唐以迄宋元若存若亡爲司爲州大抵羈縻
而已至萬曆二十九年平播後始以白泥餘慶
二司爲餘慶縣設流官以制土司賦式均而民
苗樂業事權一而控馭得宜經營開創之功豈
淺鮮哉

分界

東至施秉八十里
南至甕安松坪七十里
西至潛潭縣二百里
北至石阡馬湖堰一百二十里
東南至黃平一碗水二十里
東北至石阡葛彰司七十里
西南至龍泉花水一百九十里
西北至潛潭爛口哨一百七十里

至府城一百四十里 至省城三百六十里 至京城五千一百二十里

康熙五十四年八月

欽差西洋大人費 內務府大人雙 大人郎 按

臨縣境繪畫輿圖繩丈里數計開於左

東 自縣城至平息舖十二里平息舖至老渡十里老渡至紫姜關十里接施秉縣界

南 自縣城至新村舖十里新村舖至一碗水十里一碗水至龍洞舖十里龍洞舖至龍坡十里

接黃平州界

西 自縣城至玉虛洞七里玉虛洞至中關十里

中關至小腮十里小腮至狗場十里狗場至岑

黃驛十里岑黃驛至巖門渡十里巖門渡至箐

口十里箐口至餘慶司二十里餘慶司至爛口

哨五十里接潛潭縣界

北 自縣城至巴家寨二里巴家寨至蒲溪五里

蒲溪至龍林五里龍林至官莊五里官莊至罵

溪五里接石阡府界

形勢

上連草塘下接偏橋鎮遠帶其左黃平列其右

通志

地跨烏江據南北之要衝爲楚蜀往來所必經○

縣之主山從甕安縣發脉轉五寶廠清池紙房迤

邐至縣坤山艮向四山高聳一江廻繞最爲奇秀

府志

論曰餘慶南北廣四十里東西袤二百一十里

田土與鄰境相錯中惟盤紆鳥道裊空切漢行

路之難難於上青天猶幸烽烟久息荏苒無警

桴鼓不鳴則知扞衛牧圉者固在彼而不在此

也

山川

翠屏山在縣東北二里列嶂如屏峰巒皆作翠

色

中華山在縣南十里山高至五六里山頭望見

黃平施秉等處上多茂林密樹時聞虎嘯猿啼

山下碧水環流前峰古剎六月凝寒每至雨久

山中起霧卽晴土人以此卜晴焉

夢峩山 在縣北五里高峰特聳山頂懸崖壁立
土人相傳曾有仙人修鍊於止每晴久山頂生
雲卽雨無有不驗
古佛山 在縣東七里四面陡絕惟山後一徑僅
可容足山頂平行多松栢蔚然深秀中有梵刹
堪玩遊山屬黃平景屬餘慶
牛塘山 在縣東北八十里高三十餘里山頂有
犀牛塘廣數畝水四時不涸上構石殿聳出雲
表環殿皆古木蓊蔚其樹高者不過丈許蓋山

高風勁冬夏恒積雪故枝葉不能暢發也山頂
望見鎮遠石阡思南三府

鳳凰山 在縣東北三里形如鳳凰故名

翠巒山 在縣東南三里突起一峯後抱一嶺有
路最險山頂有玄武廟山下則新村橋之水繞
焉一名翠蘿以上多古樹四時蒼翠如綠蘿附
木故名

九龍山 在縣西二十五里地名西堰危峰排列
其中特聳一峰涌出龍泉泉中出魚巨口細鱗

美逾他產

玉屏山 在鰲溪之南形如玉屏卽餘慶司之主

山也山下有大石特立如人旁有數石稍卑皆

如人形環衛列侍故又名石人山

他山 在縣西一百六十里地名蒲村上多奇石

下有柳湖錢公邦芭隱其下鐫刻他山兩大字

於石著有他山賦並記載藝文志

官山 在縣東三里巡撫郭公子章捐買此山爲

餘邑僑寓宦安之所其山廣袤數十里莖者強

半邑人名爲官地

賓山 在蒲村卽他山之對山也土人以他山爲

主故呼此爲賓焉

立鐘山 在龍家壩去鰲溪五里外圓正而中空

前後多洞穴形如立鐘下有流泉處士鄒大賢

結廬其側

招隱山 在鰲溪之南山不甚高而奇峰怪石特

爲幽秀彭維琨讀書其間

拱辰山 在鰲溪之北其山正拱北辰峯壑秀美

上有五顯祠王爾調讀書其上諸士黎方聲鄧士弘王之翰從遊焉

鰲魚山 在鰲溪之南形如鰲魚鰲溪之名由此山也

仙峯山 在餘慶司西二十里俗名楊仙峯相傳有仙人居其上故名楊永年結廬於此

五雲山 在餘慶司西南五十里橫跨餘潛兩邑最爲奇險上有雲濠寺一名江家山

佛頂山 在麻子壩之左東華溪山高二十餘里

懸崖峭壁陟者心懼上有佛頂寺十方院乃石

阡人李金榜建

香爐山 在餘慶司之北十里形圓正如香爐遠

近皆見

艾門山 艾一作隘在龍家壩兩山墻立如門上

有石和尙

九龍金鳳山 在大溪山如鳳翅下有九泉會於

大溪出潛水

崆峒山 在杉溪其山空虛多洞穴清音洞留雲

洞俱在其陽

髮冠山 在三教堂

蟠龍會寶山 地名山茶

天台山 在縣西北最高險頂有古刹

雷坡山 在縣西北十五里懸崖峭壁時有風聲

如雷因名焉

鬼洞山 在縣西十五里連雷坡山

獅子山 在縣西四十五里

畫筆山 在縣西五十里形如文筆

皮古十二山 在縣西一百二十里

旦家山 在餘慶司山以姓名

太平山 卽縣治之主山俗名太平園

龍鳳山 在江外

朱家山 卽朱家園在鐵廠後壩

風山 在六卽園側

龍背山 在縣東二里

白露山 在五雲山之西

赤土山 在縣南二里其土皆赤

紗帽山 在龍家壩

巖門山 兩巖對峙如門烏江經其中

三尖山 在他山之北

暮落山 在縣南五里

馬鞍山 在小北崖

觀音巖 在三指揮

筆架山 在五雲山西北

六郎囤 在他山西北十里

仙人墩 亦曰三星墩在烏江巖門渡大石三塊

高丈餘方圓四五丈橫立江中土人相傳有仙人欲於此造梁故呼爲仙人墩

玉虛洞 在縣西七里中丞郭公子章建準提菴於洞前洞中清泉流出往來者憩飲焉中丞有詩刻碑見藝文志

慈雲洞 在縣東北二十五里地名龍林洞內有生成石觀音洞前有石筍高者有數十丈左右林立大小不一水繞前每有雲鎖洞門則澍雨立至故縣尹韓任甫題曰慈雲洞作詩紀之

鵝水洞 在鰲溪之南一里高可丈許中有一水似鵝形水由下升分兩翅流入洞口引爲二渠灌田旱澇如一土人利焉去此而南有石高丈許形如鳳頭名鳳冠石土人呼爲鷄公石西去三里又有石牛石和尚石龜皆形狀絕肖慶雲洞 在兩河口去縣十里兩水交會洞前洞內可居百人洞前古栢二株左右森挺蒼虬屈曲天色晴明每朝必有五色雲結其上故名慶雲土人遇旱必禱雨於其中多靈應焉

秦家洞 在楊仙峯山壁懸崖有洞高一丈二尺流泉涌出注爲瀑布激盪成渠灌田數百畝一方賴之

麻陽洞 在羅家寨去他山東十里洞大如數間屋第二層更寬大中有石筍下承以石盤大如箕內有水冬夏不涸其潏處漸窄有風吹出寒氣逼人不可入矣

清音洞 在杉溪之崆峒山高四丈中如堂可坐數十人石乳凝注成形如人物花草無所不具

中有泉流出入於杉溪

魚骨洞 在羅龍陡崖之下深不可測其淵泉沸

流卽鰲溪之發源也一名魚鼓洞

停留洞 在立鐘山之西面

羅漢洞 在朱家山

留雲洞 在崆峒山清音洞之上

仙奕洞 在他山之下

平偶洞 在江外

白泥江 卽牛場渡河發源於甕安流行黃平界

黃沱煖水自南旋至縣會合中華古佛翠巒山

下之水曲折過縣城繞翠屏山之下會慈雲洞

之水由夢戡山出葛彰司轉三渡會合烏江巖

門大江由思南出牂柯江

小烏江 去縣三十里發源於九龍山由兩河口

會白泥江其水急湍以去烏江不遠故名小烏

江

巖門江 卽烏江也俗名巖門渡去縣八十里發

源於四川馬湖烏撒由水西經修文黃平開州

甕安湓潭至構皮灘屬餘慶從巖門北流三十里至地名水洩江卽縣屬止處前流至石阡經思南入四川大江古牂柯江卽此

新村河 源出嚮水繞翠羅山由冷水小城寨入白泥江

新街河 源出官山下至縣治前流入白泥江

蒲溪 源出龍林之上經慈雲洞前入白泥江

船溪 在縣城北其水湊不可測中產大魚

鰲溪 發源魚骨洞會乾溪水過餘慶司拱辰

鰲魚二山之間又匯小溪後溪之水流入巖門

江

小溪 發源立鐘山會龍家壩龍塘之水入於

鰲溪

乾溪 發源香爐山過夢龍橋入於鰲溪

杉溪 在麻子壩源出佛頂山過泥壩橋入大

河其水清冷特異杜鼎黃結廬其上自號杉溪

道士

客溪 在蒲村西四十里溪山幽僻明末胡欽華

避難隱居於此
後溪 在餘慶司右繞後街至下鵞水入鰲溪
官塘 在縣城北水口之上爲縣宰蓄魚處故名
龍塘 在鰲溪之西傍有小山立一石形如鳳
頭名鳳冠石土人呼爲鷄公石
柳湖 在蒲村他山賓山兩山之間湖大可百畝
中有十九泉中生大柳樹數百株湖之陰都憲
錢公邦芭結廬居焉後邦芭以拒孫可望命祝
髮爲僧改其名爲大錯菴湖之上有長堤堤之

上有雙橋名宛轉橋
桃源堤 在柳湖之上
甕鐘水 卽金竹水在鰲溪之東三十里月明之
夜見泉中有鐘形故名
三潮水 俗名三漲水在黑墨土去他山之西五
里其山有小潭潭水每日漲溢三次不爽時刻
故名三潮

騰溪 在杉溪之下
龍塘三岔 在白楊壩

葛助溝 在縣北下里石縫中一穴大如藕孔晝夜流水涓涓不絕味常帶鹹牛羊喜飲卧於其側土人相傳內有鹽井

鹽井溝 在餘慶司羅家寨水味與葛助溝無異
八景名勝

玉笏朝天 縣治北水口萬峯矗起其形如笏屹立拱峙天門故曰朝天

金龜鎖水 縣水口有山如龜首尾四足皆具其首逆水而上前一石穴俗傳曾有異物盤踞其

中爲土人楊正嘉將藥箭射死石穴上峭壁數仞間生石花望之如紅雲霞錦堆積高起以長竿拭之散落水面形如苔衣載藝文志

牛塘積雪 牛塘山在縣東北山高三四十里古木蓊蔚風勁氣寒冬夏積雪不消每於天晴氣朗望之若銀屏之挂空中亦奇景也

慈雲花雨 慈雲洞在縣東北洞有石觀音洞前石笋左右林立長短大小不等皆自然生成若有雲氣自洞中出迷漫洞口則雨卽至昔時禱

雨常於此取水焉

兩峯晴雨 卽中華夢峩兩山也中華山在縣治

南峯巒高聳密樹陰森萬壑雲蘿山容黯黯每逢雨久若有一片晴嵐冉冉浮空而上霎時霽色天開土人以此卜晴夢峩山在縣治北高峯特聳頂有懸崖屹立萬仞每逢天旱禱雨若見山頂石上片雲則澍雨立至土人於此卜雨諺云南山霧晴北山霧雨卽此

古佛鐘聲 古佛山在城南七里山皆蒼松古栢

蔽日干霄昔有高僧建刹其上崇閎幽邃頗稱絕勝四時遊人不絕每夜浚聞鐘聲隱隱自雲間出亦足以沁滌煩襟喚醒塵世

翠屏晚照 山在縣東列嶂如屏每天色晴霽夕陽西下返景流空石壁草花皆成霞彩山麓牧唱樵歌迤邐歸來殊爲可聽

柳湖曉烟 在他山下中有柳數百株大可合抱曉露垂珠烟嵐繚繞流鶯睨睨乳燕差池儼然一幅畫圖焉

論曰山水而以名勝餘慶之山水孰則名之禹
跡之所不經酈元之所未注時無柳子孰問鉅
鐸之潭遊乏謝公誰尋石門之勝今考之通志
止有四景按之府志詢之士人共得八景庶幾
一丘一壑遊斯土者可次第而賦之矣

餘慶縣志卷之二

武英殿纂修特授餘慶縣知縣長洲蔣 浚輯

儒學教諭許之獬按

建設志

城池

公署

里甲

場市

村寨

關隘

津梁

塚墓

古蹟

湖縣未立以前山陬水澨規制未周遑言聲教既
已張官置吏則保障固焉體統肅焉凡有關於民
社者賴有前模無不於此是問分土而蒞責綦重
矣第須審時揆勢振舉而光大之母曰古今人不
相及也

城池

萬曆辛丑年始工壬寅冬城成中丞郭公經理其地鎮遠守脩史良將董其事永寧州知州攝縣事袁尙紀鳩其工典史向炳襄其成費金壹千陸百有奇粟計壹千伍百有奇垛計叁百叁拾有奇

劉

冠南修城記

其城週圍叁百壹拾柒丈高壹丈陸尺濶壹丈城門三東曰來喜西曰太初北曰南薰後開北門止行東西兩門樓櫓臺隍俱脩明末傾圯康熙九年

知縣陳世任重修

府志

按今縣城止存東西二門並無垛口東門城額題觀陽門石刻三字考建城碑記載東門曰來喜今詢之士人止知爲觀陽門而不聞來喜之名豈當日郭公題額乃城樓之區而非今之石額樓旣傾圯土人遂不復識其名耶况東旣名觀陽而西與北所載太初南薰竟無遺額可尋或陳公補修失去舊額耶故附識於此標出觀陽門三字以備考焉

論曰古者謂地有所必據城有所必守則是城者吾民之保障也考餘城自藍二衝突吳逆變亂城多就圯前令奉憲估修其週圍叁百叁拾叁丈高壹丈陸尺脚寬壹丈今倒塌無存者貳百叁拾叁丈每丈需費工料銀拾兩共銀貳千叁百叁拾兩半倒半存者壹百丈每丈需用工料銀肆兩柒錢共銀肆百柒拾兩城樓二座每座高壹丈陸尺寬叁丈叁尺深壹丈叁尺約費銀壹百兩共需銀貳千捌百柒拾兩邊末窮

員既無積貯又無羨餘凋瘵初起實難設法吏茲土者惟有中心惶惕也

公署

縣堂 坐南朝北 明萬曆辛丑攝縣事袁尙紀建康熙九年知縣陳世任重修康熙四十九年知縣金磐重建大堂頭門甬牆康熙五十五年知縣蔣浚補修儀門五間增造六房二間又捐置文卷木櫃六架康熙五十四年計典大中丞劉公爲知縣蔣浚副薦題匾曰含章可貞五十

六年又贈匾曰岸然自異皆懸堂上堂之後二
間爲二堂大中丞劉公又題匾曰山澤虛受二
堂之左第二層爲內宅二堂之右有洗心齋知
縣金磐建鴻泥軒知縣蔣浚建

常平倉 在縣門內左右板倉一十七間困倉二
間知縣張國弼金盤陸續建又板倉壹間困倉
五間知縣蔣浚建

監倉 在儀門右瓦房二間

土地祠 在儀門左向未曾有康熙五十六年知

縣蔣浚捐建

火藥局 在縣治左瓦房一間

典史署 在縣治之右瓦房三間書房二間馬房
一間

教諭署 在縣左明倫堂後康熙三十八年內巡

撫王公燕捐貲知縣牛一熊建

訓導署 在縣治右二層共六間舊爲義學

演武廳 在縣東城外今圯

餘慶司公署 在萬壽寺

小腮箐口鰲溪野猪哨俱有公署今圯無存

論曰國家締造區宇俾百司庶尹安厥居以蒞政其制固云備矣第居位者非傳舍視之任其傾圯卽侈壯麗興土木罔恤民瘼均於靖共之義無當也餘慶縣署自始建至今百有餘年或創或修俱可指數後之君子誠父母斯民而時葺治之所謂說以先民民忘其勞庶幾永久勿替云

里甲

場市附

餘慶縣共三里附郭爲白泥里江外爲餘慶里跨江連處爲合江里

白泥里 附近縣城爲白泥長官司地設縣後改爲白泥里分十三排每排十甲共一百三十甲餘慶里 離縣城一百里至一百五十里不等舊爲餘慶長官司地設縣後改爲餘慶里分八排共八十甲

合江里 離縣城遠近不等舊爲白泥餘慶二司地因附烏江南北故改爲合江里分八排每排

十甲共八十甲
新歸里 在縣城南舊為興隆衛軍地康熙二十
六年總督范公承勲 題裁貴州各衛所併歸
州縣裁興隆衛歸併黃平州以興隆軍田附近
餘慶縣者歸併餘慶故名新歸里
餘慶縣場 舊在東關牛場河以丑未日趕集康
熙二十七年知縣張大典改為三六九日一集
每三六兩日趕西關場九日趕東關場
餘慶司場 在司地康熙五十三年知縣蔣浚詳

請辰日趕餘慶司戌日趕龍家壩以從民便

龍家壩場 卽吳上壩在餘慶司南三里

狗場 近岑黃驛地屬黃平場屬餘慶康熙四十

六年知縣金磐將場一並歸黃平

箐口場 去巖門渡十五里其地商民雜處於猴

虎二日齊趕是場

村寨

正東 新街村 龍背村 孫家院

正南 湯家院 上里林坪 大章村

正西 茅壩 後壩村 無上壩 平洵後壩

蒲村 楊村

正北 下里 灰木關 凱里寨 羅家寨 高

規 巴家寨 蒲溪 苦笋坪

東南 獨花新寨 新村

西南 小約村 蒲水村 山龍坪 芭蕉冲

寶寨 團坪 白黎土 茅坪哨 小黎田

趙家寨 龍家壩 後山村

東北 黎山寨 龍林寨

西北 包眼 杉木根 木江山 楓香寨 枝

舟 黃瓜冲 木岔

論曰古者歲登民數大司徒獻於天府而拜受之誠以民爲邦本非細故也餘邑遭藍賊之亂吳逆繼之死者過半戊子巳丑兵凶相繼戶口凋殘十不存一二

國朝定鼎招集流亡數十年來休養生息漸覺繁庶但田土磽确逐末者多死喪轉移寧無過慮惟是嚴斥埃申保甲以防其患勸農恤商以培其

基要期無負分里編甲之義其度幾乎以欲其

關隘

郵傳附

頭關地近甕安

中關縣西二十里

餘慶關在餘慶司萬曆年間頭關中關餘慶關

每關除土賦壹兩

灰木關在餘慶司東三十里

茅坪哨縣西五十里

涼風哨縣西六十里

野猪哨縣西一百八十里

茅坪涼風野猪三哨除免田土銀糧每哨一年給

火藥銀叁兩陸錢

府志

按萬曆二十七年征楊應龍巡撫郭公子章置

買三哨田地贍養哨兵護送餉鞘二十八年播

平之後裁汰哨兵土賦火藥銀兩亦皆裁去其

田地隨里甲輪流耕輸康熙十九年因討吳逆

差役浩繁人逃田荒無人輸納知縣張國弼招

民耕種收租充賦康熙四十五年教諭許之獬

申詳 各憲巡撫陳公詵批將野猪哨閒田撥入餘慶學宮另立戶籍以垂永久云

郵傳

白泥驛 在縣東城門外

岑黃驛 在縣西六十里

鰲溪驛 在縣西九十里

白泥驛走遞馬十匹每匹三日八時輪一差募價銀壹錢貳分每年壹伯差該銀壹拾貳兩通共壹千差共銀壹百貳拾兩○扛擡募夫壹拾肆名每

名工食銀陸兩共銀捌拾肆兩

岑黃驛腰站馬捌匹每匹馬價銀拾貳兩共銀玖

拾陸兩○扛擡募夫捌名每名工食銀陸兩共銀

肆拾捌兩

鰲溪驛腰站馬捌匹○募夫捌名馬價夫銀與岑

黃驛同

縣記

西六十里

按走遞夫馬俱平播時差使絡繹特設三驛傳遞此一時權宜計也及平播後俱已裁革無存

縣前舖

新村舖 縣東十里

碗水舖 縣東二十里交黃平界

小腮舖 縣西三十里

岑黃舖 縣西六十里

箐口舖 縣西八十里

鰲溪舖 縣西一百里

松烟舖 縣西一百二十里

爛口舖 縣西一百五十里

以上各舖司兵每兵一名月支秋糧肆斗今皆裁

去每舖惟設塘兵二名防汛往來公文用附近烟

民傳遞府志

按餘慶公文申府者皆由新村碗水舖至黃平

而上向有工食役之若分遞至滑潭一路皆由

小甲傳遞自縣舖遞草坪草坪遞中關中關遞

小腮小腮遞狗場狗場遞岑黃驛岑黃驛遞巖

門巖門遞箐口箐口遞餘慶司餘慶司遞落花

屯交爛口哨滑潭界往往公文遺誤稽延皆由

小甲不同舖司農力未遑役食未給善後計者

當設法以專任也

協濟站夫 順治十七年議定凡偏橋站餉鞘扛
擡偏橋衛合麻陽江外九十六屯偏橋一司應扛
擡壹百肆拾肆日餘慶三里烟夫應協濟扛擡貳
百壹拾陸日閏月各十五日原額夫壹百名官給
銀米因不足用帮夫壹百名民間自脩共夫貳百
名在站應役餘慶邑小烟稀不勝力役始逃亡相
繼矣

府志

按順治十五年初開黔疆暫借州縣協夫運送

餉鞘餘慶縣應協濟偏橋議定每協夫壹百名
屬三里烟夫赴站應役扛擡康熙八年總督甘
肅公文焜 題請禁止康熙十九年平吳逆因驛
遞浩繁仍用協夫餘慶協濟興隆衛里民困於
力役康熙二十四年知縣張國弼詳請懇賜豁
免巡撫慕公天顏復 題請禁止里民始獲休
息焉

論曰餘慶當楚蜀之孔道軍興旁午協濟之舉
自難免於奉公今

皇恩遐暢德化沾濡狼烟之息久矣近又奉總督蔣公陳錫廓清驛站凡官員上下禁派夫馬定價捐僱靡不謳歌感頌誠亘古未有之善政也然司牧之任寧有備而無患安不忘危所當預籌控制者故備載舊例規條如右

津梁

牛場河渡 在縣東門外自三月至九月船渡自十月至二月徒杠年久船壞舊制每年支雕廳銀貳兩久經奉裁知縣蔣淦捐貲造船撥役管

理

巖門江渡 在縣西七十里卽烏江也爲楚蜀要津每年渡夫支給工食銀柒兩貳錢又雕廳銀貳兩久經奉裁舊設巡攔本縣徵幫潛潭縣袁家渡鹽稅康熙三十七年巡撫王公燕革除其渡爲土棍私踞康熙五十五年知縣蔣淦通詳各憲捐貲造船置買渡田以給渡夫不許土豪占踞立碑渡口商民建亭載藝文志

構皮灘渡 卽巖門渡之上流去巖門渡二十里

向無官船土豪等據爲私渡與巖門無異知縣
蔣浚通詳各憲捐貲與巖門渡一例造船置田
禁革土棍立碑渡口載藝文志
新村橋 在縣南十里舊有石橋爲水圯康熙五
十四年邑人周典重建
烏江橋 在縣西三十里跨小烏江上
曾濟橋 在下園
壽嗣橋 在泥壩
安龍橋 在羅龍

夢龍橋 在乾溪
重補橋 在鰲溪之上
萬善橋 在後壩
石橋 在皮鼓
功果橋 在常家溝
通濟橋 在三指揮
楠木橋 在落花屯
復興橋 卽都勻橋在鰲溪
三壯橋 卽彭家橋在鰲溪之南

枕流橋 在龍家壩立鐘山之下

天生橋 在野猪哨生成石梁橫於溪上

宛轉橋 在蒲村柳湖堤上上有雙橋故名宛轉

雷公堰 在城南白泥江

赤土堰 在城南白泥江

正官堰 一名千功堰在城南白泥江

按三堰俱設縣時中丞郭公子章相水勢之高
下加築堰壩浚濬渠水附郭千頃之田每逢乾
旱皆利賴之當春末夏初縣令督率捕衙先時

修築有三堰考載藝文志

論曰民之病涉政在成梁而沿溪設渡抑又因
勢以濟其窮也至於築堤以資蓄洩尤爲利民
之重務惟前賢之經其始後人之修其墜耳

塚墓

義塚官地 在縣治東卽官山也中丞郭公子章
捐貲置買廣數百畝爲四方僑寓葬地至今無
論土著客民葬者強半人咸德之以其地爲中
丞購置故曰官地

孝子楊再亨墓 在城北五里許孝義內

誥封太常寺少卿鄭維禎墓 在縣南城外制府

鄭公逢元之父墓於此逢元奉母居蒲村守制

後遷歸葬今其墟尙存

古蹟 碑匾附

古白泥州 卽今縣治元至正末設州明洪武初

廢

古餘慶州 卽餘慶司治元至正末設州明洪武

初廢

觀陽門 在縣城東門上典史余繼芳書石刻

養濟院 在西門外其基址久廢改建房屋爲民

居住姑存其名

漏澤園 見府志其基址久廢聞在官山之間今

不可考姑存其名

玉皇銅像 順治年間楚商有袁姓者往雲南貿

易鑄銅像供養三元宮內兵燹時遇盜竊去銅

身僅存佛首後移延壽寺知縣蔣溪捐貲裝金

聖像虔製木龕以奉香火

木根坡修路碑 在巖門江上巡撫郭公子章題

把總李祐立布政司吏熊英書

玉虛洞碑 在玉虛洞巡撫郭公子章題書

慈雲洞碑 在洞口知縣韓任甫題書

建設縣城碑 今無存守道劉公冠南題

禁革協夫碑 在縣前總督范公承勳立

禁革陋弊碑 在縣前總督貝公立

添設學校碑 巡撫王公燕立貢生吳瓊書

學宮地基碑 在學宮邑人楊光重立

學田碑 在學宮邑人王在位立

重修學宮碑 在文廟知縣蔣浚題書并篆額

邑侯趙登階德政碑 在縣左楊光夔書

邑侯張大典去思碑 在縣前

邑侯張國弼去思碑 在東門

邑侯牛一熊去思碑 在東門

邑侯孫 煒去思碑 在東門

邑侯金 磐去思碑 在縣前

改復巖門構皮官渡碑 知縣蔣浚題篆額子蔣

仙根書立縣前

禁巖門私渡碑示 立巖門兩岸 撫都院劉公

立

禁巖門私渡碑示 立巖門兩岸 平越府江公

立

禁巖門私渡碑示 立巖門兩岸 知縣蔣浚立

禁構皮灘私渡碑示 立通木坪兩岸 知縣蔣

浚立

大成殿匾額 萬世師表 康熙二十三年

御書頒給知縣張國弼鈎摹貼金

舊義學匾額 文教遐宣 康熙四十四年

御書頒給知縣孫煒鈎摹貼金

義學匾額 學古有獲 督學萬公經書 對聯

啟三里之屯蒙耳提面命庶幾入孝出弟 闡

六經之旨趣朝絃夕誦無非磨義漸仁 知縣

蔣浚題書

名宦祠匾額 崇德報功 知縣蔣浚題書

明倫堂匾額 明倫堂 訓導楊春毓書

縣頭門匾額 餘慶縣 貢生楊光宸書

縣儀門匾額 儀門 貢生楊光宸書

土地祠匾額 肇裡其典 知縣蔣澣題書

縣大堂匾額 含章可貞 岸然自異 俱大中

丞劉公爲知縣蔣澣題書 對聯 保赤誠求

於從政何有 愛民易使非學道不能 知縣

蔣澣題書

二堂匾額 山澤虛受 大中丞劉公爲知縣蔣

澣題書 對聯 民不知官亦近古 宰能辟

穀始稱廉 知縣蔣澣題書

鴻泥軒匾額 鴻泥軒 對聯 閑邪存誠 矯

輕傲情 知縣蔣澣題書

洗心齋匾額 洗心 對聯 出宰山水縣 讀

書松桂林 知縣蔣澣題書

城隍廟匾額 福祐斯民 對聯 是是非非地

明明白白天 知縣蔣澣題書

關帝廟匾額 乾坤正氣 對聯 鳳眼喜看今

王一統 蠶眉猶恨舊三分 知縣蔣澣題書

玉皇閣匾額 光被彌綸 知縣蔣浚題書

古佛寺匾額 浮嵐暖翠 知縣蔣浚題書

白馬廟匾額 天名標銅柱 知縣蔣浚題書

五顯廟匾額 懷保烝黎 知縣蔣浚題書

朝陽寺匾額 振衣千仞 知縣蔣浚題書

中華寺匾額 積翠凝寒 知縣蔣浚題書

萬壽寺匾額 快坐攬清暉 知縣蔣浚題書

慈雲洞匾額 崇朝其雨 知縣蔣浚題書

廻龍寺匾額 廻龍寺 知縣蔣浚題書

眞如寺匾額 眞如寺 知縣蔣浚題書

小年菴匾額 小年菴 知縣蔣浚題書

大錯菴匾額 大錯菴 知縣蔣浚題書

覺林寺匾額 覺林寺 知縣蔣浚題書

蔣侯亭匾額 恩與江長 建於巖門渡上楚蜀

商民公題

土縣丞匾額 奕世恩綸 知縣蔣浚題書

土主簿匾額 篤念唐勲 知縣蔣浚題書

王隱居匾額 潛德橋林 知縣蔣浚題書

論曰談古跡者不過山水之奇秀與都會之壯麗若荒陬小邑豈嘗有一於此顧考當時建置興廢之故無論其在官署在城池卽祠廟梵宇亦有興有革故附列今昔匾額題署姓氏以彰風雅覽古興思者可當卧遊也已

縣署

縣署

縣署

縣署

縣署

縣署

縣署

縣署

縣署

縣署

縣署

縣署



餘慶縣志

三之五

内閣文庫		
番號	漢	14840
冊數	6 (2)	
函號	189	13

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

KODAK Gray Scale

2021 Kodak. All rights reserved. TM, Kodak. KP1270818

C Y M





餘慶縣志卷之三

武英殿纂修特授餘慶縣知縣長洲蔣十溪輯

版籍志

戶口
田
社
賦
租
賦
解
支
附
積
貯

一縣之生齒賦稅以及有司之會計皆經國之大

政也版籍之志其重務哉最爾餘寧獨外於大司

徒之所掌乎雖山陬小邑難異其生齒之日登磽

确之日闢而賦稅徭役輕重緩急之間民命所關

全視乎此開邑以來凡可考者備載如左源流具

在撫字有心可惻然而興矣
戶口開而賦役益繁計其重賦之困民命而
戶口原額柒百捌拾捌戶
人丁原額柒百壹拾柒丁
按此數割撥新內除人
歸人丁在內
一丁陸百柒拾捌丁俱係招集募民原未審丁例
係一例攤徵丁差銀壹百玖拾兩捌錢陸分伍
釐捌毫陸絲伍忽統入條編銀內起徵外實額
五年兩年清編抵補外尙逃亡人丁肆丁

舊徵差人丁貳拾丁伍分○三十一年增肆丁伍
分○三十五年增壹拾丁
原額丁差銀壹拾壹兩柒錢○丁逃無徵銀壹兩
貳錢

實在有徵丁差銀壹拾兩伍錢

康熙四十年增叁丁○康熙四十五年增貳丁

康熙五十年清出人丁肆丁抵補逃亡肆丁外多

一丁共四十丁

每丁叁錢

○今實徵丁銀壹拾貳兩

康熙五十五年新增縣轄人丁陸丁新歸里人丁

肆丁共壹拾丁編入 盛世滋生冊內欽奉
上諭永不加賦○現在人丁共柒伯貳拾捌丁

論曰餘慶人丁由來一例攤徵從未有所增減
其所增減者係黃平割撥查通志成於康熙三
十六年而割撥先於康熙二十七年故有柒百
壹拾柒丁之數康熙五十年報部人丁肆拾丁
乃有丁有賦康熙五十五年新增拾丁則有丁
而無賦矣經久計者俾田無曠土室有盈餘戶
皆樂業而嬉遊丁各安土而重遷廢無負永不

加賦亘古未有之殊恩矣

田土

原額載上中下三則民田共貳萬柒千柒百陸拾
玖畝肆分陸釐捌毫內上則田伍千貳百柒拾
捌畝中則田捌千玖百伍拾畝貳分下則田壹
萬叁千伍百肆拾壹畝貳分陸釐捌毫

按三里舊額

原額載田共貳萬捌千肆百陸拾伍畝捌分肆釐

肆毫

按割撥新歸里之數在內

荒蕪田壹百柒拾伍畝捌分

壹釐伍毫

按俱係新歸里荒田

實在成熟田貳萬捌千貳

百玖拾畝零貳釐玖毫

按四里總數

原額全熟山土陸千貳百伍拾伍畝伍釐

按徵銀不徵糧

白泥里

原額民田壹萬壹千玖百伍拾伍畝伍

分捌釐陸毫叁絲○山土壹千陸百伍拾肆畝

叁分貳釐肆絲柒忽肆塵伍纖伍渺

合江里

原額民田柒千柒百陸拾畝貳分肆釐

叁毫叁絲壹忽伍微○山土貳千零玖拾畝叁

分捌毫捌忽玖微壹塵柒纖伍渺

餘慶里

原額民田捌千零伍拾叁畝陸分叁釐

捌毫叁絲捌忽伍微○山土貳千伍百壹拾畝

零肆分貳釐壹毫肆絲肆忽叁塵柒纖

新歸里

原額屯田陸百玖拾陸畝叁分柒釐陸

毫內成熟田伍百貳拾畝零伍分陸釐壹毫○

荒蕪田壹百柒拾伍畝捌分壹釐伍毫

論曰餘慶田土盡報全熟獨黃平割撥之新歸

里俱係屯田尚有遺荒若勤於勸墾俾豪強無

阻奪之奸苗民有穡作之效國課充而民樂

業庶幾守土之責毋負也

租賦

原額全徵本色米陸百壹拾壹石叁斗柒升叁合

九勺柒撮陸圭

按三里舊額

原額本色米共捌百叁拾陸石肆斗肆升柒合肆

勺玖抄叁撮五圭玖粒叁粟

按割撥新荒蕪無歸里在內

徵米伍拾陸石捌斗貳升肆合陸勺叁抄伍撮

柒圭壹粒陸粟

按俱係新歸里荒田

實在有徵米柒百柒

拾玖石陸斗貳升貳合捌勺伍抄柒撮捌圭柒

粒柒粟

按四里總數

原額條丁土賦歲用銀壹千壹百陸拾柒兩零柒

丁釐叁毫柒絲柒忽玖微玖塵玖纖貳渺

按割撥新歸在

內荒蕪無徵銀叁兩玖錢零叁釐捌毫伍絲叁

忽叁微玖塵玖纖玖渺

按俱係新歸里荒田

實在有徵銀

壹千壹百陸拾叁兩壹錢零叁釐伍毫貳絲肆

忽伍微玖塵玖纖叁渺

原額全徵馬館銀柒百壹拾叁兩陸錢伍分肆釐

叁毫伍絲伍忽貳微陸塵柒渺

上田每畝起科本色米貳升捌合叁勺玖抄壹撮

伍圭貳粒陸粟○徵條丁銀肆分貳釐陸毫壹
忽貳微伍塵伍渺○徵馬館銀叁分壹釐玖毫
叁絲貳忽伍微捌塵玖纖

中田每畝起科本色米貳升叁合玖勺玖抄壹撮
伍圭貳粒陸粟○徵條丁銀叁分捌釐貳毫壹
絲捌忽捌微伍塵陸纖伍渺○徵馬館銀貳分
陸釐玖毫捌絲伍忽叁微壹塵捌纖

下田每畝起科本色米壹升捌合陸勺貳抄壹撮
玖圭叁粒叁粟○徵條丁銀叁分叁釐肆絲玖

忽壹微玖塵伍纖貳渺○徵馬館銀貳分貳釐
肆毫壹絲玖忽陸微貳塵伍纖伍渺

三里土賦每畝貳分徵銀不徵糧

新歸里每畝起科本色米叁斗貳升叁合零○徵
丁銀拾貳兩○徵歲用銀壹拾壹兩伍錢伍分
捌釐柒毫伍忽陸微貳塵陸纖伍渺

解支

原額全徵秋米共柒百柒拾玖石陸斗貳升貳合

捌勺伍抄柒撮捌圭柒粒柒粟

按割撥新
歸里在內○每

年折銀每石柒捌錢不等聽候糧道撥支兵餉
併廩生廩糧造冊報銷

原額全徵條丁土賦歲用銀共壹千壹百陸拾叁

兩壹錢叁釐伍毫貳絲肆忽伍微玖塵玖纖叁

渺按割撥新歸里在內○徵馬館銀柒百壹拾叁兩陸錢

伍分肆釐叁毫伍絲伍忽貳微陸塵柒渺○共

徵銀壹千捌百柒拾陸兩柒錢伍分柒釐捌毫

柒絲玖忽捌微陸塵

每年起解藩庫條丁土賦歲用馬館銀共壹千肆

百柒拾兩零肆錢捌分伍釐捌毫柒絲玖忽捌

微陸塵

一應存留支本縣知縣四季俸薪工食銀貳百肆

拾叁兩

一應存留支給儒學四季俸薪工食銀玖拾貳兩

捌錢伍分貳釐

一應存留支給典史四季俸薪工食銀伍拾伍兩

伍錢貳分

一遵例全留曆日銀貳兩肆錢此項另文起解藩庫

一遵例全留備辦春牛花鞭銀肆兩伍錢

一遵例全留春秋祭祀銀捌兩

計開經制款項

知縣一員歲支俸薪銀肆拾伍兩

門子一名歲支工食銀陸兩

皂隸六名每名支工食銀陸兩共銀叁拾陸兩

名壯一十六名每名歲支工食銀陸兩共銀玖

拾陸兩

禁卒二名每名歲支工食銀陸兩共銀拾貳兩

轎傘扇夫柒名每名歲支工食銀陸兩共銀肆

拾貳兩

斗級一名歲支工食銀陸兩

心紅紙張銀貳拾兩康熙七年奉裁

書辦六名每名歲支工食銀陸兩共銀叁拾陸

兩康熙元年奉裁

修理監倉銀壹拾兩康熙七年奉裁

儒學教諭一員訓導一員歲共支俸薪銀叁拾壹

兩伍錢貳分

喂馬草料銀壹拾貳兩

齋夫二名每名歲支工食銀壹拾貳兩共銀貳

拾肆兩

膳夫二名每名歲支工食銀陸兩陸錢陸分陸

釐共銀壹拾叁兩叁錢叁分貳釐

門子二名每名歲支工食銀陸兩共銀拾貳兩

學書一名歲支工食銀陸兩康熙元年奉裁

典史一員歲支俸薪銀叁拾壹兩伍錢貳分

門子一名歲支工食銀陸兩

皂隸二名每名歲支工食銀陸兩共銀拾貳兩

馬夫一名歲支工食銀陸兩

書辦一名歲支工食銀陸兩康熙元年奉裁

一額外小場襍稅本縣屬牛馬場每年抽收襍稅

銀肆拾陸兩柒錢肆分叁釐康熙十一年奉裁

一每年牙帖銀肆兩起解藩庫

一廠課無

一賑恤學租無

一驛站無

按以上經制除奉裁項欸例不支給外實支知教等員俸食等銀肆百零陸兩貳錢柒分貳釐歷來俱藩庫支領於康熙四十八年內遵奉部文春夏二季就近本縣給發秋冬貳季仍赴藩庫支領康熙五十五年九月內奉護撫篆白公潢檄行秋冬二季俸工俱存留本縣支給節年更變不一總以憲檄爲定

論曰餘邑舊止三里田分上中下三則賦有本色有條編有隨丁有馬館有土賦後益以新歸

屯田有米無條其田雖有肥磽之不同廣狹之不一然每年國賦早完民無逋欠官無帶徵固已相安而世守之矣但家鮮蓋藏所收僅足以供一歲之用稍遇水旱輒嘆半菽不充告饑之狀實堪惻隱惟於五六月間將常平積穀查其真正無告之農民取保借給到冬還倉庶幾牧民者所當經畫也

積貯

常平倉

一積貯天下本計事現貯穀伍千陸百捌拾石
一重農積穀等事現貯穀肆拾玖石玖斗
一欽奉

上諭事現貯穀肆拾肆石伍斗叁升米貳拾石捌斗
按三案倉穀現貯在倉官民每年增捐數目無
定

論曰餘慶地瘠田少一年之耕尙不足以供一
年之食又何論其餘三餘九乎積貯之設是誠
重矣今國家置常平之倉以爲重農救荒之

本計良法美意在邊方窮邑尤爲甚當但以餘
慶而論不當徒恃平常平一倉必社倉義倉並
設使遠近均沾其利何也常平一倉止取便於
近郭之民而遠鄉僻壤不能沾升斗之惠不若
立社倉於城郭而勸人以義捐立義倉於鄉村
而勸人共積穀豐年則有脩而無患凶年則取
之而有餘此亦濟常平不逮之一法也

開建之初人文未盛黃甕餘潛共學於黃平各縣
另立社廟春秋祭祀本縣額載兩季祭祀銀捌兩
舊例在縣屬牛馬猴兔等場行頭辦祭萬曆庚申
潛潭詳請另建學宮至於餘甕兩縣尙附黃平州
學除童生係各學另考發案至於生員廩增缺州
縣照考案前後序補明季癸巳本縣已另立學至
國朝仍附黃平而督學趙公燾報部各縣生員等第
至督學道衛公紹芳因之萬曆癸卯年本縣建立
學宮於縣城之西泰昌庚申署縣事胡公起賓遷

於城內縣左崇禎甲申知縣張公宏抱遷於縣城
後岡癸巳年復遷城內縣左設有聖殿兩廡戟門
櫺星門明倫堂學官衙署俱爲兵燬惟公聖殿獨
存

府志

按萬曆三十一年癸卯永寧州攝縣事袁尙紀
卽捐俸創建學宮於城西崇祀先聖所以安
人心收民望用夏變彝移風易俗之要道也泰
昌元年庚申署縣事胡起賓遷於城內縣左崇
禎十七年甲申知縣張宏抱建於城西後岡先

是雖建有學宮係本縣印官同合邑士民捐建
未經題請生童俱赴黃平州學考試至明季癸
巳餘慶始設教諭一員專理學務及國朝定
鼎開闢黔疆一切制度俱照隆萬成規餘慶裁
去學官生童仍赴黃平州考試與黃平甕安潛
潭三處同榜同案其補廩出貢俱照考案先後
補序順治十七年內邑諸生牟弘李公芳等赴
學道衙門具呈蒙學道趙公燾詳允咨達始與
甕安黃平生童各榜各案仍附州學管理康熙

七年知縣陳世任將學宮遷於城西

卽今學基是也建

有聖殿兩廡戟門康熙三十八年巳卯巡撫王
公燕具疏題請將永寧開州廣順獨山麻哈五
州會定曾安平越餘慶安化龍泉鎮遠銅仁永
從都勻十縣清浪一衛通共添設一十六學奉
旨俞允而餘慶始有學焉專設訓導一員管理學務
巡撫王公燕檄行各州縣估計文廟工價捐給
知縣牛一熊以餘慶舊有聖殿兩廡戟門只估
計啟聖祠櫺星門明倫堂學署請捐貲創建餘

但仍舊康熙四十三年提督學院張公豫章題
將貴州通省各府各州及清浪衛俱復設訓導
一員各縣學俱復設教諭一員而餘慶學始復
設教諭焉

釋菜

周禮大司樂掌成均

五帝樂名

之法以治建國之學政

而合國之子弟焉凡有道者有德者始教焉沒則
以爲樂祖而祭於瞽宗

禮記月令仲春上丁命樂正習舞釋菜仲丁又命

樂正入學習樂○文王世子凡學春夏釋奠於其
先師秋冬亦如之

漢高祖十二年十一月過魯以太牢祀孔子

成帝追謚孔子宣尼公

明帝永平十五年三月詣孔子宅親御講堂命皇

太子諸王說經

章帝元和二年幸魯祠孔子及七十二弟子於闕

里作六代之樂

安帝延光三年祀孔子及七十二弟子於闕里

此祀

孔子弟子之始

三國魏世祖正始七年令太常釋奠祀孔子於辟雍

以顏淵配

前此祀孔子者皆於闕里至是始行於太學

北魏孝文帝太和十六年修孔子祠親行拜祭○太

和十九年如魯城親祀孔子封其後為崇聖侯

祭孔子以二仲上下日丁陰火也為文明之象

故用之以祭

隋文帝開皇九年國子學每歲四仲月上丁釋奠於

先聖先師州縣學則以春秋仲月釋奠

唐高祖武德二年詔國子學立周公孔子廟各一所

四時致祭

太宗貞觀二年左僕射房元齡議庠序置奠本緣

孔子故晉宋梁陳隋皆以孔子為先聖顏淵為

先師請停周公升孔子為先聖顏淵配從之○

貞觀二十五年詔皇太子於國學釋奠於先聖

先師皇太子為初獻祭酒為亞獻博士為終獻

縣學令為初獻丞為亞獻無博士者主簿為終

獻○又詔以左丘明卜子夏公羊高穀梁赤伏

勝高堂生戴聖毛萇孔安國劉向鄭衆杜子春
馬融盧植鄭康成服子慎何休王肅王輔嗣范
甯賈逵杜預二十二人代用其書垂於國胄並
令配享尼父廟
高宗追贈孔子爲太師顏淵太子少師曾參太子
少保曾子參配享始此並配享孔子
元宗開元二十七年追謚孔子爲文宣王顏子爲
兗國公閔損等九人爲侯曾參等爲伯

宋太祖建隆三年詔廟門立戟十六

真宗咸平中追謚孔子爲至聖文宣王

神宗以孟子同顏子配食宣聖此孟子配享之始荀况楊

雄並從祀

徽宗崇寧四年從司業蔣靜請文宣王用冕十二

旒服九章又詔躋子思子祀○大觀四年宣聖

廟用戟二十四文宣王執鎮圭並用王者之制

理宗加周惇頤張載程顥程頤封爵與朱熹並從

祀孔子廟庭周程張朱從祀始此又加張栻呂祖謙伯爵

從祀孔廟

度宗以顏回曾參孔伋孟軻並配孔子四配始此升顏

孫於十哲列邵雍司馬光從祀

元成宗大德十二年制加孔子號曰大成

仁宗以許衡從祀孔子

文宗加封顏回克國復聖公會參鄒國宗聖公孔

伋沂國述聖公孟軻鄒國亞聖公又加孔子父

母封爵始以董仲舒從祀孔子

明太祖洪武四年令進士釋褐詣國學行釋菜禮○

十五年詔天下儒學通祀孔子頒釋奠儀○二

十六年頒大成樂器於府學令州縣如式制造

○二十九年黜楊雄從祀

英宗正統元年判定從祀各爵位次頒行天下○

二年以宋胡安國蔡沈真德秀從祀○八年追

封元吳澄爲臨川麗公從祀

憲宗成化二年封漢董仲舒爲廣川伯胡安國建

寧伯蔡沈崇安伯真德秀浦城伯

孝宗弘治九年封宋楊時爲將樂伯從祀

世宗嘉靖九年允輔臣張璁議去封號易像以木

主題目至聖先師孔子神位改大成殿爲先師
廟殿門爲廟門四配稱復聖顏子宗聖曾子述
聖子思子亞聖孟子十哲以下皆稱先賢某子
之位申黨卽申棖祀止存棖削而不祀者十二
人公伯寮秦冉顏何荀況戴聖劉向賈逵馬融
何休王肅王弼杜預俱罷祀林放蘧瑗鄭衆盧
英植服虔范甯鄭康成吳澄改祀於其鄉增祀者
五人后倉王通胡瑗陸九淵歐陽修凡籩豆樂
舞之數皆更定焉

穆宗隆慶五年以薛瑄從祀

神宗萬曆十二年以王守仁陳獻章胡居仁從祀

○二十三年以宋儒周敦頤之父輔成從祀啟

聖祠學宮左祀啟聖公叔梁紇以先賢顏無繇

曾點孔鯉孟孫激配以宋儒周輔成程珦朱松

蔡元定從祀古未有崇祠自嘉靖從輔臣張璁

議也

國朝制同明朔望有司詣學行禮春秋仲月土丁致
祭縣令爲正獻官丞簿博士爲分獻官樂舞六

俗○康熙二十三年頒
御書萬世師表於天下學宮○康熙五十一年
詔以朱熹升入先師廟與先賢十哲同列位次卜子
夏○康熙五十五年以范仲淹從祀與先儒同
列位居司馬光之上
學制

大成殿 三間久圯康熙五十三年知縣蔣溪倡捐
築基三尺重建增造兩間共五間
兩廡 各三間久圯康熙五十三年知縣蔣溪倡

捐重建

啟聖祠

三間在文廟後

戟門

三間

櫺星門

三間

泮池

未鑿

宮牆

在櫺星門外

明倫堂

三間在縣治西

文昌閣

無

魁星閣

無

尊經閣 無

省牲所 無

祭器庫 無

樂器庫 無

射圃 無

鄉賢祠 無

名宦祠 三間在戟門左知縣蔣浚捐建

義學 三間在戟門右知縣蔣浚捐建

按舊義學在縣署右康熙四十四年大中丞于

公準 題請黔省府州縣各建義學令訓導教

誨苗童頒

御書文教遐宣匾額懸之中堂今館屋數間久爲訓

導公署康熙五十三年知縣蔣浚於學宮戟門

之右捐建三間其每年延師館穀知縣捐助

秩祀位次

先師廟正中奉

至聖先師孔子之位

廟中四配位

復聖顏子

述聖子思子

東列

宗聖曾子

亞聖孟子

西列

廟傍十哲位

閔子子騫

諱損

冉子仲弓

諱雍

端木子子貢

諱賜

仲子子路

諱由

卜子子夏

諱商

朱子元晦

諱熹

東列

冉子伯牛

諱耕

宰子子我

諱子

冉子子有

諱求

言子子游

諱偃

顓孫子子張

諱師

西列

東廡先賢位

澹臺子子羽

諱滅明

原子子思

諱憲

南宮子子容

諱适

商子子木

諱瞿

漆雕子子開

諱開

樊子子遲

諱須

公西子子華

諱赤

梁子叔魚

諱鯉

冉子子魯

諱儒

伯子子析

諱虔

冉子子產

諱季

漆雕子子歛

諱哆

漆雕子子期

諱徒父

商子子季

諱澤

任子子選

諱不齊

公子子正

諱良儒

奚子子哲

諱容藏

顏子子襄

諱祖一作相

句子子疆

諱井疆一字子野

秦子子丕

諱商

公祖子子之

諱句茲

縣子子橫

諱成一字子祺

燕子子思

諱汲一作及

顏子子叔

諱之僕

樂子子聲

諱欬一作欣

邾子子斂

諱異一作與

公西子子上

諱與如

公西子尙

諱藏

陳子子禽

諱亢

琴子子開

諱張一作牢

步子子車

諱叔乘一作褒

東廡先儒位

左子

諱丘明

穀梁子

諱赤

高堂子

諱生

毛子長公

諱長

杜子

諱子春

王子子淹

諱通

歐陽子永叔

諱修

周子茂叔

諱敦頤

程子正叔

諱頤

張子子厚

諱載

楊子中立

諱時

陸子子靜

諱九淵

蔡子仲嘿

諱沉

許子平仲

諱衡

陳子公甫

諱獻章

王子伯安

諱守仁

西廡先賢位

宓子子賤諱不齊

公冶子子長諱長

公皙子季次諱哀一字季沉

高子子羔諱柴

司馬子子牛諱犁一作耕

有子子有諱若

巫馬子子期諱施

顏子子柳諱辛

曹子子循諱卹

公孫子子石諱龍一作寵

秦子子商諱祖

顏子子驕諱高一作刻

壤子子徒諱駟赤

石子子明諱作蜀

公夏子子乘諱首一作牛

石子子里諱處一字里之

公子子中諱有定

鄒子子家諱單

罕父子子素諱黑

榮子子祺諱旂一作旂

左子子行諱人郢一作郢

鄭子子徒諱邦漢史避諱改名國

原子子籍諱亢一作桃

廉子子庸諱潔一字子曹

叔仲子子期諱會一作會

狄子子皙諱黑一字皙之

子蔑子諱忠至聖兄之字避孔子改稱

施子子恒諱之常

秦子子之諱非

申子子周諱根一作續

顏子子聲諱噲

西廡先儒位

公羊子諱高 伏子子賤諱勝

子國子

諱安國
裔避孔子

至聖
改稱

董子

諱仲舒

后子近君

諱倉

韓子退之

諱愈

胡子翼之

諱瑗

程子伯淳

諱顥

范子希文

諱仲淹

司馬子君實

諱光

邵子堯夫

諱雍

胡子康侯

諱安國

呂子伯恭

諱祖謙

張子敬夫

諱栻

真子希元

諱德秀

薛子德溫

諱瑄

胡子叔心

諱居仁

啟聖公祠正中奉

啟聖公之位

四配先賢位

顏路氏

諱無繇

子哲曾氏

諱點

伯魚孔氏

諱鯉

公宜孟氏

諱激

從祀先儒位

伯溫程氏

諱珦

喬年朱氏

諱松

季通蔡氏

諱元定

周氏

諱輔成

專祀名宦位

巡撫郭公子章

知縣事袁公尚紀

知縣事韓公任甫

祭器

簠簋 皆盛黍稷稻粱之器簠方簋圓古用陶器
後世範金爲之

犧尊 取犧牲享食之義犧牛形用貯終獻酒

象尊 取形於象範金爲之用貯亞獻酒

雲雷尊 組以螭頭腹畫雲雷回旋之狀用貯初

獻酒

太尊 有虞氏曰太尊瓦尊也貴本尚質

山尊 夏后氏之尊也刻畫爲山雲狀

壺尊 其尊作壺形其脰飾饗饗腹著風雲

著尊 明堂位曰商尊曰著尊著地而無足也

罍洗 皆所以盥也罍盛水洗受棄水罍畫文龍

洗畫水文菱花

爵 形象雀兩柱三足有流有鑒

坫 置爵承爵皆用之措諸地而平正

勺 夏龍勺今刻杓爲龍夏制也

邊豆 邊古今皆竹製惟豆製不同夏楬豆殷玉

豆周獻豆今製以銅
俎 明堂位曰周以房俎房謂足下拊也魯頌曰
籩豆大房
籩 竹爲之用以盛幣
銅 用薦和羹
登 用薦太羹
籩巾 以絺爲之圓幅元被纁裏
龍冪 以絳帛方幅爲之中畫雲龍兩旁畫文彩
四角綴以金錢用以覆尊聖廟所用

尊冪 以青布爲之縱橫二尺二寸兩廡所用
盥盤架 以木爲之繪以彩色髹以漆
盥盤 範金爲之盛水盥手
帨巾 白布爲之長短隨宜
燭臺 範金爲之高一尺八寸重盤四足
鼎 範金爲之用以焚香
祝版 以木爲之高九寸濶一尺二寸用白紙寫
祝文貼版上祭畢揭而焚之
祭品

牛 豕 羊 黍 稷 稻 粱 白餅 黑餅

形鹽 醢醢 韭菹 芹菹 菁菹 笋菹

榛 菱 芡 棗 栗 鹿脯 兔醢 魚醢

鹿醢 藁魚 脾肝 豚膊 帛 香 燭

按遵實形鹽藁魚棗栗榛菱芡鹿脯○豆實韭

菹菁菹芹菹笋菹鹿醢魚醢兔醢醢醢○簋實

黍稷○簋實稻粱○登實太羹○鉶實和羹

陳設

先師廟 帛一 爵三 登一 簋二 簋二 鉶

二 遵八 豆八 羊一 豕一 香燭全

四配 各用帛一 爵三 登一 鉶二 簋一

簋一 遵六 豆六 羊一 豕一 香燭全

十哲 各用帛一 爵一 鉶一 簋一 簋一

遵四 豆四 豕肉一 香燭全

兩廡先賢先儒 東西分壇每壇四位各用帛一

爵四 簋一 簋一 遵四 豆四 豕肉四

香燭全

啟聖祠 帛一 爵三 鉶二 簋一 簋一 遵

八

豆八

羊一

豕二

香燭全

四配先賢各用爵三

簋一

簋一

豆

一

豕肉一

香燭全

四從先儒

各用爵一

豆二

各用帛一

鄉賢

缺而無祀

名宦

用帛一

爵三

簋一

簋一

豆二

邊四

豆四

羊肉一

豕肉一

香燭全

樂器

金部

編鐘一 簠鐘十六 範金爲之 擊以茱萸木

爲簠竹爲柄 擊之則有六律六呂以應十二月

之候 又有清聲以配之

石部

編磬一 簠磬十六 靈壁石爲之 拊之以牛

角竹爲柄

絲部

琴六 白虎通曰 琴禁也 禁止於邪 以正人

心也 ○瑟六 二十五絃 頌瑟也 雅瑟則三十三

絃 二者制各不同

竹部

箎二 以竹爲之 長一尺四寸 圍三寸三分

共八孔 此樂聲宜輕 用氣吹之 其聲乃和 ○笛

六斷紫竹爲之長一尺四寸七孔○排簫二又名鳳蕭排竹如鳳翼故名鳳簫○簫二截竹爲之以紅絨縹繫之吹者宜緩取其音斯悠揚不迫

匏部 笙二用紫竹爲之十有七管而值管匏中各施以簧管端參差如鳥翼吹匏之端則鼓舞其簧而發聲○管二截竹爲之爲十二孔以應十二月之音

土部 埴一以土爲質雜紙觔爲之布漆創金雲

彩上銳而底平高三寸四分六孔

革部 應鼓身高三尺而濶二尺一寸髹以朱每

奏樂一句以槌擊者三聲但節奏從容方爲佳

○鼗鼓有柄兩旁有耳持其柄則兩耳還自擊

○搏拊如鼓而小中實糠外髹以朱以紅絨縹

維於人項兩手用之或搏或拊以節登鼓之聲

木部 祝一以桐木爲之狀如方桶上爲圓孔納

槌三面畫山一面畫水凡用先以槌撞底復擊

左右共三聲以起樂○敔一狀如伏虎背上有

二十七組齧刻用竹長二尺四寸破爲十莖
名曰簫操其背以止樂
舞器
麾旛以絳繒爲之長七尺濶一尺一寸上板繪雲
下板繪山以相連首尾前面畫升龍後面畫降
龍各塗以金五色彩雲朱竿長八尺五寸末施
銅龍龍首塗金啣其麾下垂樂中麾生執之升
龍向外降龍向內舉之則升龍見樂作偃之則
降龍見樂止以木爲架髹以朱閒則植其上

旌以紅絨爲之纓上加塗金彩雲監於其上數九
長七尺以紅絨縹繫之下綴以結竿長八尺五
寸朱髹末施塗金龍首啣其節二人執之於東
西兩階舞生之前以導其舞
翟六十四以木爲柄長一尺四寸朱髹柄端刻龍
首長五寸塗以金彩每翟用雉尾三根插於口
中舞生右手執之以舞
籥六十四以竹爲之長一尺四寸三竅朱飾舞生
左手執之以舞

按樂舞之制唐宋元無考明洪武二十六年頒
大成樂器於天下府學令州縣學如府式麾一
祝敔各一琴六瑟四編鐘編磬各一十有六簾
塤各四簫笙笛各六鳳簫三搏拊鼓三楹鼓一
堂上之樂用之節二籥翟各三十六堂下之樂用之始定樂用
登歌樂生五十六人司麾一人司祝司敔各一人
司歌十人搏拊二人琴
六人瑟四人笙簫笛各六人篪塤
各四人鳳簫二人鐘磬鼓各一人舞用六佾舞
生三十八人引舞二人各執節舞生
三十六人各執籥翟成化十三
年增樂舞爲八佾嘉靖九年詔釐祀典定制三

樂三奏文舞六佾

國朝定制仍用六佾

樂章

按釋奠樂章明協律郎冷謙改定

迎神奏咸和之曲

大哉先聖道德尊崇維持王化斯民時宗典祀有

常精純並隆神其來格於昭聖容

有樂無舞

初獻寧和之曲

自生民來誰底其盛惟師神明度越前聖粢帛具

陳禮容斯稱黍稷惟馨惟神之聽

樂舞俱全

亞獻安和之曲

大哉聖師實天生德作樂以崇時祀無斃清酤惟

馨嘉牲孔碩薦羞神明庶幾昭格

樂舞俱全

終獻景和之曲

百王宗師生民物軌瞻之洋洋神其寧止酌彼金

罍惟清且旨登獻惟三於戲成禮

樂舞俱全

徹饌咸和之曲

犧象在前豆籩在列以享以薦既芬既潔禮成樂

脩人和神悅祭則受福率遵無越

有樂無舞

送神咸和之曲

有嚴學宮四方來崇恪恭祀事威儀雝雝歆茲惟

馨神馭還復明禋斯舉咸膺百福

有樂無舞

望瘞與送神同

學政

額設廩膳生員二十名

額設增廣生員二十名

每歲考取進文童八名武童八名

每科考取進文童八名
兩年出歲貢一名
樂舞生例無定數

學田

白梨土學田貳拾畝捌分並園林基址係縣民王
在位納入有碑立學宮每年應納條丁壹兩陸錢
陸釐秋米伍斗貳升
野猪哨學田捌拾壹畝伍分叁釐貳毫土柒拾貳
畝叁分叁釐柒毫係教諭許之解申詳 各憲撥
入學宮每年應納條丁土賦共銀陸兩零貳分叁

釐秋米壹石伍斗壹升捌合貳勺捌抄叁撮肆圭
肆粒叁粟

書籍

御頒朱子全書

淵鑒古文

總督貝公
頒給

易經講義

學院孫公
頒給

唐詩全部

家禮全部

小學全部

大清律全部

一隅集制義

本草脩要

箋注太上感應篇

箋注陰騭文

顏真卿多寶塔碑

柳公權符公碑 以上十種知縣蔣淑捐置

鄉飲

按鄉飲禮餘邑從未舉行今備載以示後來

一每歲正月十五日十月初一日於儒學行鄉飲

酒禮

一大賓以有德望致仕官爲之若無其人寧闕勿濫

一僎賓擇鄉里年高有德之人

一介賓次長於大賓

一庶賓又次於介僎

一主以知縣正印官爲之

一司正以教職爲之

一贊禮執事以弟子員爲之

先七日出示通知

俾士庶長幼人等皆曉

先五日肅啟

賓僎介皆啟有文庶老司正啟

先一日習儀

賓僎介庶老司正贊禮執事皆集

先一日頒坐次圖於明倫堂

結彩新聯鋪氈

本日黎明宰牲具饌

敬也潔也

案各五豆

記日七

十者四豆八十者五豆九十者六豆

實豆者曰

膊曰臍肺等曰鶩鴨曰鷄曰魚菜皆列在案贊

時舉之用蒸食粘果五品案前

押花又案旁頂

花酒以清餚以豐杯箸以朴毋以珍錯金玉

及期主人率僚屬司正先詣學遣人肅賓介以下

比至庠門執事者先報曰賓至門矣與僚屬出

迎於庠門外主居東賓居西三揖三讓而後升

堂

三讓三揖凡過門闕階級皆讓揖而進蓋言

屢也贊者引唱

及升堂東西相向立贊行兩拜禮賓坐執事又報

上僎至如前儀介庶隨僎而入如前向三揖皆坐

執事者唱司正揚觶因具盥盆於東榮洗手洗

爵以揚之

執事者引司正執爵由西階升詣堂中北向立賓

以下皆立執事唱揖司正揖賓以下皆答揖執

事者以觶酌酒授司正司正向北舉酒曰恭惟

朝廷率由舊章敦崇禮教舉行鄉飲非爲飲食凡我

長幼各相勸勉爲臣盡忠爲子盡孝長幼有序

兄友弟恭內睦宗族外和鄉里無或廢墜以忝
所生讀畢執事者唱司正飲酒飲畢以觶授執
事執事者唱揖司正揖賓以下皆揖司正復位
賓以下皆坐

執事者唱讀律令舉律令案於堂之中贊禮引善
讀律令者詣案前向北立賓以下皆拱立揖然
後讀律令或選

上諭一條簡切者凡觀者聽者俱於階下立毋譁讀
畢揖賓以下復位士庶長幼人等皆得於堂下

與觀

執事者唱供饌案舉饌案至賓前次僕次介次庶

賓

賓僕介庶子姪族姓門生等得侍於側

次主

及僚屬司正以次

執役者各一人毋攙

大賓位於西北僕位於東北介位於西南主位於
東南庶賓位於正西賓介之後僚屬位於正東
僕主之後司正位於東南主之後
執事者唱獻賓主人起北面立執事者斟酒以授
主主受爵詣賓前置於席稍退贊揖賓答執事

唱獻僎賓又授爵於主詣僎如前儀主復位執事者唱賓酬酒賓起僎從之執事者斟酒授賓詣主前置於席稍退贊揖主答各就位坐執事者分左右立介庑以下各子姓以次斟酒於席免酬酢執事者唱飲酒歌樂酒三行供湯凡三巡畢

執事者唱撤饌

席各送其家

賓僎以下皆出位僎

主僚屬居東賓以下居西執事者唱北面謝恩各向北行三跪九叩頭禮禮畢執事者唱送賓

以次下堂分東西行仍三揖出庠門而退

論曰說者謂志一邑之學校志其學宮規制祭器學田等而已其餘事屬大小不必紀也殊不知餘慶之學有不然者明萬曆三十一年攝縣事袁公尚紀建學尚非奉旨設立有廟無官不數載卽值鼎革且廟地遷徙無常自康熙七年陳公世任移建城南始得其吉三十八年大中丞王公燕題請建設規模經制甫定士乃得專業學宮今志餘慶學校而必援古帝王之

尊師重道先賢先儒配享從祀之典禮樂器用
歌舞之文者蓋以餘邑山陬僻壤非若通都大
邑有名公鉅卿之過化聲明文物之燦陳故不
恤並鄉飲儀禮詳爲紀載俾此邦人士一閱邑
乘卽曉然典秩所在不以名爵重而以道德傳
也有不感而奮興者乎如謂志一邑而天下同
未免據古冊以文固陋則予小子將謝咎不遑
矣

壇壝

寺觀附

社稷壇 在城南一里地名龍家溝

神位二

一社之神

一稷之神

祭品羊一豕一帛二鉶一邊四豆四簋二簋二
以春秋二仲月上戊日致祭

山川壇 在縣北

神位三

一風雲雷雨之神

居中

一境內山川之神 居左

一城隍之神 居右

祭品羊一豕一帛二劔一籩四豆四簋二簋二以春秋二仲月上戊日致祭

按社稷山川春秋祈報所以利吾民也風雲雷雨萬物所以成始而成終者也而皆得以祀之今兩祭皆合祀於南壇龍家溝向無神位木主知縣蔣溪敬鑄木主供於城隍廟中祀之日移位於壇而虔祀焉但其地牛馬牧放非祀神所

宜應建屋於高埠之上旁植大樹數株以妥神靈庶於禮爲不謬云

厲壇 在縣北草坪

祭以清明中元十月朔每歲三祭先期本縣牒告城隍屆期迎城隍神於壇上列無祀鬼神於旁上壇羊一豕一香燭紙酒下壇羊一豕一香燭紙酒羹飯冥衣楮錢僧綱道紀各率僧道宣揚偈咒

按厲壇久經缺祀知縣蔣溪於康熙五十二年

捐貲補祀

城隍廟 在西門內每月朔望縣宰率僚屬行禮
每歲清明節七月望十月朔三次主祭厲壇五
月二十八日土人相傳為城隍誕辰縣官脩三
牲香燭致祭

關聖廟 在西門外五月十三誕辰縣官行香祭
祀

白馬廟 在草坪祀漢伏波將軍相傳求雨甚靈
五顯廟 上里中里草坪小城寨蒲溪俱有每年

九月二十六七兩日賽神合縣遠近村民咸聚
觀焉

文昌閣 小城寨餘慶司俱有

延壽寺 在十字街洪武五年建

真如寺 在上里

觀音閣 在後壩

報恩寺 在小城寨

古佛寺 在古佛山地屬黃平景屬餘慶

金山寺 在金坪庄

三元宮 在草坪

迴龍寺 在水口龍孔

香山寺 在木姜山

清化寺 在小河

觀音菴 在園坪

中華寺 中華山偏刀水俱有

佛頂寺 在佛頂山

銅鼓寺 在白羊壩

雲溪寺 在五雲山

從應廟 在金竹水

佛會寺 在大寨

玉皇閣 在常家溝

萬壽寺 在餘慶司

福田廟 在羊村

鐘靈寺 在偏刀水

省壽寺 在餘慶司

報恩寺 在吳上壩

晉賢寺 在平桃後壩

古峯寺

在苦竹園

彌陀寺

在平桃

蓮淨菴

在立鐘山頂

覺林寺

在泥壩

五顯祠

在拱辰山

龍興菴

在龍家壩

勝果寺

在大灘水

水府祠

在餘慶司之左

立真觀

在鰲溪之南卽都勻觀

水車廟

在金鳳山前

古興寺

在旦家山

曾徧寺

在卽村

太和寺

在嚮水崖

曾賢寺

在羅龍

玉皇殿

在圓通壩

長老菴

在薛家灣

雲山寺

在甕鐘水其山獨高圓如寶鼎

小年菴

在蒲村卽大錯和尚祝髮處

大錯菴 在他山之陰柳湖之上卽錢開少故居

牛塘寺 在牛塘山

元武觀 在綠蘿山

三教堂 在香爐山下

論曰王制天子祭名山大川諸侯祭名山大川之在其地者白虎通曰王者所以有社稷者爲天下求福報功又周禮有風師雨師漢以丙戌日祀風師以己丑日祀雨師唐天寶詔祀雨師以雷師同壇宋人祀風師於西郊以立春後丑

日兆雨師於北郊以立夏後申日以雷師從雨師之位皆各壇爲祭明於風雨雷之外又加以雲合爲一壇以從獻於郊祀凡諸祀事與歷代帝王崇祀先聖先師其所從來遠矣若城隍之名史不經見惟明太祖制詞曰明有禮樂幽有鬼神城隍聰明正直聖不可知必有超於高城深池之表者此城隍之神所以神歟左氏曰鬼有所歸乃不爲厲厲者鬼之無歸者也天子爲天地神人之主則凡有一州一邑者卽一州一

邑神人之主餘雖小邑又安得不敬共神明享祀不忒耶至於以勞定國德施於民如青螺郭公邑令袁韓二公著之祀典與夫血食神廟釋道寺觀實有不可磨滅者留諸勿替蓋治民事神宰之職也其可忽諸

餘慶縣志卷之五

武英殿纂修特授餘慶縣知縣長洲蔣 浚輯

儒學教諭許之解校

職官志

名宦

文秩

武統

塘汛

土司

官司之建置因乎地亦因乎時因乎地故或多或少之各殊因乎時故或設或裁之互異餘自變土司而設流官百有餘年地方之安危民俗之生耗咸繫於官斯土者紀其名所以責其實也至於名宦自應另立一志因開創未久著美寥寥故卽專

祀三賢附於職官之首顧百餘年來豈無愛士恤民興利除弊嘉惠一方之治者容徐訪曩徽補其缺畧焉

名宦

郭子章字相奎號青螺泰和人隆慶辛未進士萬曆二十七年巡撫貴州歷十年習知民隱凡所施設永垂利澤尤善獎拔士類經其品題率成名宿著黔記六十卷經濟卓然先是播州酋楊應龍作亂王師屢征不克天子拊髀廷臣交薦

子章匹馬入黔增兵餉扼要害立賞格士氣百倍興師纔百餘日擒應龍誅之播州平始經理播州爲平越等罷縣獨於餘慶設城垣築三堰立三關置三驛修木根坡置官墳爲功最浚故至今餘人頌其勲庸比之諸葛武侯關壯繆焉袁尚紀選貢四川江油人萬曆癸卯播平設縣公以永寧州知州攝縣事捐俸倡建學宮崇祀先聖以安人心以收民望田立上中下三則丁隨田辦餘人感之勿替云

韓任甫舉人四川瀘州人喜吟詩愛山水政平訟簡才長操潔每政暇輒召諸生講論多所發明有游慈雲洞詩載藝文志

文秩

知縣一員 萬曆二十八年設

典史一員 萬曆二十八年設

儒學教諭一員 崇禎間始設後裁康熙四十三年復設

訓導一員

康熙三十八年始設

知縣

明

袁尚紀 四川江油人選貢以永寧州知州兼攝

縣事見名宦

吳道昭 廣東番禺人舉人

韓任甫 四川瀘州人舉人見名宦

余芳 湖廣蘄州人貢生有去思碑

趙英 廣西馬平人舉人

賈時聘 陝西隴西人貢生

蕭九達

湖廣人貢生

姚大武

廣西荔浦人選貢有遺愛碑

曾可弘

湖廣竹山人貢生

徐達可

湖廣應城人貢生

趙嘉鳳

雲南廣西府人貢生

卿文銑

廣西全州人貢生

張宏抱

雲南廣西府人貢生

雷豫暘

四川廣安州人選貢

郭運興

四川銅梁人貢生

楊先秀

雲南楚雄人貢生

趙登階

四川大竹人貢生有德政碑

鄒秉浩

四川岳池人選貢

劉懋和

四川富順人選貢

何致詳

四川人選貢

國朝

戴際時

湖廣澧州人

周岱生

江西九江人

謝天柱

福建人

徐鵬搏 江西人貢監

陳世任 福建人舉人

張國弼 奉天人例監康熙二十年任

張大典 昌平人例監康熙二十七年任

牛一熊 奉天人例監康熙三十二年任

龔汝寬 浙江會稽人進士康熙四十年任

孫煒 直隸棗強人例監康熙四十二年任

金磐 奉天人例監康熙四十五年任

蔣溪 江南長洲人監生 內廷纂修特授康

熙五十二年九月任

典史

明

向炳

趙英

蔣本立

任士達

趙光先

錢思忠

孫繼祖

向明邦

陳文英

孫金蘭

王肇寅

羅起鳳

余繼芳

盛之榜

張達

國朝

龔熙 石阡府人順治十八年任

王國彥 康熙十年任

馬起義 康熙二十年任

李弘禎 浙江會稽人康熙二十五年任

李遇春 浙江山陰人康熙二十七年任

王家治 直隸大興人康熙三十四年任

余應魁 河南中牟人康熙四十二年任

張允德 山東濮州人康熙四十四年任

張積粟 直隸保定籍陝西渭南人康熙五十五

年任

教諭

明

朱履啟 雲南曲靖人康熙二十五年任

王世晉 四川雅州人拔貢

吳之駿 都勻人舉人

劉瑄 四川富順人

扶振鵬 都勻人歲貢

國朝

許之解 平溪衛人拔貢康熙四十四年任

丘佐宸 都勻府人恩貢康熙五十六年選未任

訓導

楊春毓 鎮遠府人歲貢康熙三十九年任

鄭良佐 都勻府人歲貢康熙四十六年任

論曰邑藉官而理官藉志而傳故自綰握銅章
以及佐貳司教皆有事於斯土者也然百餘年
來教養無傳功績罔著果其人之奉職不稱耶

抑文獻淪亡無從而徵信耶願與後來君子勉之而已

武統

兵防附

按餘慶明末設守城兵六十名每名年支工食銀叁兩陸錢分守縣堂並東西北三門久經奉裁今據經制額設把總一員係平越營分防黃平舊州餘慶縣二處其兵額設七十名內除各處坐塘外在城者寥寥聊備差掾縣中向無營署每遇春秋散餉把總暫寓關帝廟移會縣官

公同散給

把總

國朝

汪

楊

李

水

高仁

田

林應魁

蔡朝柱

陳聯飛

李士昌

丁谷

塘汎

中關塘兵二名

小腮塘兵二名

狗場塘兵五名

巖門塘兵五名

箐口塘兵二名

構皮灘塘兵二名

餘慶司塘兵五名

楊仙峯塘兵二名

泥壩橋塘兵二名

落花屯塘兵二名

新村塘兵二名

火藥局一所因無營署久置縣治頭門之左火藥

桶共二十九號內貯火藥壹千五百觔鉛彈壹千伍百觔

論曰兵可百年不用不可一日不備今餘之兵防單弱刁斗寥寥豈以地當偏僻而干櫓可以不設耶然餘慶之要地莫重於巖門一渡楚粵川蜀之所往來奸宄販匪出沒叵測若以汛守餘慶之員移鎮巖門則一切奸宄不能越境而下游可免撈掠之苦此亦移輕就重扼險制要之術也余有志而不能越俎竊歎焉握兵符

者其勿忘之可乎

土司

土縣丞一員

唐

毛巴 江南籍餘慶人乾符三年授忠翊校尉

宋

無考

元

毛如麟 以平苗功授正長官司洪武十七年頒

正長官司印信

明

毛德源 如麟子洪武二十一年襲

宋毛 遲 德源子永樂三年襲

毛 釗 遲子天順二年襲

毛 勲 釗子弘治三年襲

毛顯政 勲子嘉靖五年病故未襲

毛 頊 顯政子嘉靖五年襲

毛 祖 頊子嘉靖二十一年襲

毛宗憲 祖子嘉靖三十二年襲

毛乘雲 宗憲子嘉靖四十二年襲

毛守爵 乘雲子萬曆二十一年襲播平後將餘

慶司建設餘慶縣以正長官司改授土縣丞將

正長官司印信繳部訖

毛鳳彩 守爵子崇禎二年襲

毛鵬程 鳳彩子崇禎十一年襲

康熙二十二年始部頒號紙

國朝

毛 都 鵬程子康熙二十八年襲

土主簿一員

唐

無考

宋

無考

元

楊正寶 山西太原府籍餘慶人以平苗功授副

長官司洪武十七年頒副長官印信

明

楊通奎 正寶子洪武二十二年襲

楊愷 通奎子天順二年襲

楊松 愷子弘治七年襲

楊通憲 松子嘉靖十二年襲

楊以誠 通憲子萬曆五年襲

楊鯨 以誠子萬曆二十四年襲播平後將白

泥司建設餘慶縣以副長官司改授餘慶縣土

主簿將副長官司印信繳部訖

楊璟

鯨子崇禎七年襲

康熙二十二年始頒號紙

國朝


楊嗣溥 璟子康熙二十九年襲

楊元勳 嗣溥子康熙四十七年襲

按未平播前白泥舊有上里中里下里三土司
俱姓楊氏其下里副長官司楊再國早爲中里
正長官司楊贊之祖楊正梗所滅後於嘉靖十
一年楊贊復謀滅上里副長官司楊松其子楊
通憲赴闕上聞奉旨革去楊贊土司後土人傳
贊爲厲鬼致旱災乃列贊位於雨壇祈雨祭之

是皆土風尚鬼之故識者當考正焉

論曰土官之制官世其土也今餘慶之土官有
號紙無銅符無地方錢糧管轄蓋自平播以來
土改爲縣若存若亡如去如留自唐以來擇牧
有功應列其世系焉



餘慶縣志

六之
八上本

内閣文庫			
番號	漢	14840	
冊數		6 (3)	
函號	189	13	

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

KODAK Gray Scale
© 2021 Kodak. All rights reserved. TM: Kodak. KP1270818



餘慶縣志卷之六

武英殿纂修特授餘慶縣知縣長洲蔣 浚輯

儒學教諭許之獬校

人物志

孝義
列女

選舉

隱逸

鄉耆

流寓

蓋聞十室之邑必有忠信三人並行厥有我師餘
雖漸磨未久而節義可稱者豈繁無人故列叙人
物首以孝義終以列女使人知典型未遠爭自濯
磨繼先賢之傳刊有道之碑予日俟之矣

孝義

楊再亨字前周六歲失父事母至孝十二歲值播
賊亂負母入避箐中採蕨供母母有疾焚香祝
天求以身代刲股嘗糞母疾卒廖萬曆三十九
年知縣余芳申請崇禎四年巡按御史梁公炳
題准建坊旌表

選舉

雜職附

舉人

國朝

壬子科

曹亮字

中式第四名黃平州學任北直欒

城知縣

辛酉科

壬戌年補行

廖應熊字起渭中式第三名歷任思州都勻思南

三府教授

甲子科

黃元色字雍子中式第二十二名施秉縣學歷任

銅仁府平溪衛教授

丁卯科

鄒以惇字厚也中式第十三名歷任晉安州開州學正

丙子科

李嗣白字詩人中式第十名現任獨山州學正

壬午科

廖士奇字亦揚應熊孫中式第二十六名思州府學揀選知縣

癸巳恩科

胡慎字敬修中式第十四名揀選知縣

甲午科

黃綬字書思元色子中式第三名揀選知縣

毛邑字萬侯中式第三十八名平越縣學揀選

知縣

貢生

明

王國聘字待徵歲貢任金華縣主簿

楊以清字澄齋歲貢

巴茂芳字華實歲貢

金國佐字良輔歲貢

楊先茂字尙子歲貢任四川馬湖府同知

鄒大賢字淑聖歲貢

楊世茂字桐栢歲貢

金鐘玉字蘭如歲貢任四川安岳縣知縣

楊通玉字貴之歲貢任永昌府經歷

毛鵬九字翔北歲貢

張萬鑑字若水歲貢任廣西府經歷

王玉鑄字士暲歲貢任貴筑縣訓導

國朝

李公芳字在公歲貢

石之璞字待攻歲貢

陳居仁字長人歲貢任曾定縣訓導

楊光宸字雪堂歲貢選都勻縣訓導未任

楊光選字自美歲貢選清浪衛訓導未任

楊昌英字白雲歲貢由印江縣訓導任開州學正

吳中甲字步瀛歲貢

王聖訓字龍圖歲貢選石阡府訓導未任

吳玘字玉森歲貢

楊光珽字公晉歲貢

楊演字文也歲貢

楊一寅字東皇歲貢

廖文瑛字白華歲貢

李嗣儒字席珍拔貢現任鎮遠縣訓導

唐時熙字觀華歲貢

楊士英字尙瓊歲貢

楊嗣洪字翊貞歲貢

吳瓊字玉珥恩貢

吳璧字璵珩恩貢

張正道字于度歲貢

白雲隆字聯飛歲貢

王璽字天璧歲貢

黃琮字宗玉歲貢

武舉

國朝

楊通桂字月隣辛酉科壬戌年補行

雜職

明

白如玉字

任湖廣沔陽衛經歷

唐正坤字海宇任湖廣承天府都司功襲平越衛指揮子之華襲平越衛指揮後改衛爲縣裁之

國朝

楊通遂字彩亨施涼營守備

按太學生今不濫入志者遵通志例也

隱逸

楊光夔字虞卿少爲諸生明末舉孝廉不仕博學

好古邑中士子從游甚衆舉人廖應熊等皆出

其門著有待證錄其子昌英現任印江縣訓導

鄧英字明欽歲貢生明末舉孝廉仕四川遵義

府兼軍道乞休歸隱餘慶司著書甚富遭兵燹

遺亡其子士奇士宏孫曾俱庠生

鄒大賢字淑聖貢生學博才優隱居不仕年八十

餘所著詩文甚富遭兵燹遺亡訓後力學其孫

以惇字子厚登賢書鄉黨重之巡撫衛公旣齊

給匾獎美

王國昌字天潢少爲諸生遭亂隱居不試築室觀陽門外栽花藝果無尺寸田土終不肯干人精研醫理期於活人而不志利餘俗信鬼而不喜服藥國昌雖窮苦不改其術可謂一國非之而不顧者知縣蔣浚給匾獎之

鄉耆

張三祥住餘慶司年百歲康熙五十二年知縣蔣浚詳報大中丞劉公蔭樞題請奉

旨給建坊銀三十兩書昇平人瑞坊額年百一歲卒

流寓

明

鄭逢元字天虞平溪衛人明末爲制軍父沒卜塋餘慶城南奉母居蒲村守制孫可望踞黔中強起之逢元辭書有云絕裾請纓溫太真之後悔何及依劉爲命李令伯之陳情可憐自號天問和尚與錢開少爲世外交
錢邦芑字開少丹徒人由中翰歷都憲拒孫可望

僞命隱居蒲村闢柳湖與子衿唱和從學者甚衆著他山賦後祝髮爲僧改其居爲大錯庵自號大錯和尚後歸衡山終老載藝文志

劉泌字晉仲成都人丙子解元避亂隱餘慶

胡欽華字莘含廣東人避亂隱居餘慶司之客溪

著有客溪山莊記

國朝

李如楠字仙盤衡陽人寓鰲溪

黃有年字永其廣東南海人任安化令陞獨山州

牧因世亂隱居白泥遂家焉其子琮爲本縣歲

貢生

向文煥字天章黔陽人

錢點字鑑濤浙江嘉善人

論曰從來浚山僻壤人跡罕到之處往往有高
人逸士或遨遊或遷謫一觴一咏皆足動人流
連後之君子從而樂道之若有增山川之色者
餘邑當明季搶攘之秋四方遊宦之士間有避
跡於此若忘其爲播非人所居者則其人其際

亦可知矣

列女

明

鄒氏縣民歐陽坤妻年二十八歲夫死守節撫孤

子銘讀書遊泮萬曆末學使張汝霖詳請旌表

至崇禎末年八十始卒

聶氏生員歐陽銘妻節婦鄒氏之媳也銘庠生早

卒聶氏年二十無子誓死不二孝養孀姑年五

十餘始卒兩世同節人稱歐門雙節云

彭氏生員桂高攀妻年三十高攀病故無子撫兩

幼女家貧無婢僕氏苦守兩女長成出嫁歷遭

兵火貞白自全以女紅自給卒年六十有二鄉

黨咸稱慕焉

國朝

廖氏生員吳中第妻恩貢生吳瓊之母也年二十

四歲夫故瓊尚在襁褓值兵荒氏茹荼飲泣冰

霜自凜紡績養姑教子成名壽登七十有一歷

任令尹俱有匾額旌之邑侯陳世任旌曰媲美

其姜張大興旌曰撫孤表節牛一熊旌曰節凜
冰霜

謝氏縣民楊應第妻生員楊永年母氏年及笄適
應第克盡婦道年二十五夫故撫孤堅貞不渝
崇禎末黔省大亂賊掠鄉村謝氏負子永年逃
避箐林賊又至氏倉卒急迫攜子卧死屍中以
血塗面賊以刃破其面謝氏忍痛不動賊捨之
而去卒得保全

國朝定鼎始得安家訓子永年成立遊泮享壽七十

六康熙九年知縣陳世任旌之匾曰節行儀邦
永年脩極孝養喪塋悉如禮生平豪俠好義錢
開少比之杜季良云

巴氏生員楊光璉妻年甫笄適光璉家素貧窘氏
紡績佐讀生一子一女未幾光故氏年二十餘
值吳逆之亂氏茹荼苦守採蒿蕨充饑其子爲
賊擄氏逃入山箐獲全賊平攜女歸家績紡度
日康熙二十七年知縣張大興旌之匾曰矢志
栢舟康熙五十一年布政司遲公所復行地方

官製匾旌之

吳氏里民楊光國之妻生員楊昌達母康熙五年夫亡守節四十二年知縣張大典給匾旌曰節操可風

石氏里民楊一國妻康熙四年夫亡守節五十一年知縣張大典給匾旌曰節重名芳

鄧氏里民毛鵬高妻康熙十年夫亡守節四十六年知縣蔣浚給匾松栢凌霜

蔣氏生員楊光被之妻康熙二十二年夫亡守節

三十四年知縣蔣浚給匾冰心鐵性

侯氏里民何起圖之妻康熙十六年夫亡守節四十年知縣蔣浚給匾節懋松筠

劉氏里民李正榮之妻康熙二十五年夫亡守節三十一年知縣蔣浚給匾掾凜冰霜

張氏里民楊光前之妻康熙二十三年夫亡守節三十三年知縣蔣浚給匾節苦青春

論曰一方無人物則一方之山川長泯矣一時無人物則一時之歲月俱徂矣賢才之生原不

擇地縣設一百餘年其間服官野處忠孝節義
所志不同承平遭亂際各異正不必別其爲
衣冠爲韋布爲鬚眉爲巾幗雖無老成人尙有
典型諸君子亦可聞風而興起乎
三十一
縣內里民年五六十歲者二十正年夫十中
一平歲男婦老幼皆無不納錢
三十餘年
縣內里民年五六十歲者二十正年夫十中
一平歲男婦老幼皆無不納錢
三十餘年

餘慶縣志卷之七

武英殿纂修特授餘慶縣知縣長洲蔣 漢輯

儒學教諭許之解校

風土志

風俗 方言 氣候 歲時 占候
土產 苗蠻 苗語 災祥

歲行之災祥憑平天物力之生耗視平地至習俗
之貞淫奢儉惟人實司其表率或由朴素而流囂
浮或由頑梗而返淳謹韓昌黎謂風俗與化移易
安知其今不異於古所云乎

風俗

俗尚威武漸知禮義○地鮮醫藥人多信鬼○豫章楚蜀之士僑寓成家者多文教日興彛風漸革○風氣初開人情質朴○男女耕稼女勤紡績通志士則喜戴涼冠民則喜青白布裹頭○婦人居斬衰之喪蓬垢三年不事膏沐○地瘠民貧半耕半讀無遠出商賈之人○當秋以手掐稻手著鐵鎗不事刀工米無宿舂計日所需納曰○邑民爭訟不明動輒滾經斫鷄狗禿神撈油以明虛實○俗不尚醫凡遇折損肢體及生瘡毒延巫咒水而治

之刻日平復其驗如神楚人來黔行術者其法更靈○邑人山居野處衡門葦戶不知扇鎖出以泥封他人輒不敢啟○民少衣帛冬少加綿道路之間婦不輕出出亦無輿但自擎蓋障面以行○凶禮有偷塋之說子婦皆塋畢而後哭○俗好巫生男祭三撫神有病祭金甲神用端公曰衝儺○賓興時架月宮橋於明倫堂縣官儒學設宴以餞行

方言

山曰坡曰塋曰垠山丫曰坳平地曰坦○呼母曰

奶呼祖母曰把呼女曰嬌呼主曰使長公曰使長
婆呼外祖外祖母曰家公家婆呼母族長輩皆曰
舅公妻黨晚輩皆曰外甥小兒女曰么矮小曰眇
年少無知曰夢憊自稱年少曰年夢呼僕曰後生
秀才之妻曰相婆擔曰把連總曰一把連仔細曰
把穩無曰沒有得事有難解者曰開不得交○住
曰坐低銀曰茴香銀垢曰革膩毀人曰訕謗腹瀉
曰走肚人死曰壞拜掃曰掛青○老幼男女不言
歲皆稱干支曰甲子乙丑稱生日兩字減一字曰

拜生曰賀生○村市曰場鋪墊曰壩引水之竹木
曰筧○掐稻一握曰一手兩手曰稽百稽曰稭因
有一稭田兩稭田之語故地皆以種別畝而不以
畝計種○行聘曰插香又曰落榼亦曰拜肯至爭
再婚之婦但曰燒紙夫死未幾再醮曰招夫養子
又曰過婚親厥子以成立猶覲然稱曰繼父不耻
家有子入贅他姓曰上門女婿鬚鬣而納於姑家
曰閒房媳婦娶妻曰討親○稱子曰崽呼禽獸初
生之子亦曰崽雌狗曰草狗雌思雄曰起草馬眇

一目曰單照馬人眇一目曰單照

氣候

牂柯夜郎之間山居平和而無瘴毒

水經注

黔在萬山叢谷中地處而氣沴土瘠而候愆穀多
粃果多蟲不可以中州例也甕潛餘慶皆近蜀故
氣微異其耕種收穫先後稍殊一日之間乍寒乍
暖百里之內此燠彼涼稍一不慎易生疾疹又山
高溪下苦旱而不苦潦東作稍遲則苗不茂入秋
有大風雨則禾不實謂之青空若夏初無雨即苦

饑歉以故民無兼歲之蓄家鮮八口之飽亦氣候

使然也

通志

餘慶地勢低平四時多暖夏無大熱冬無大寒雨
則寒晴則熱五穀皆有惟不產芝麻

府志

歲時

元宵 盛德在木紀日於元酒酌膏粱禮高堂爰
及伯姊衣添新帛賀比里遂遍州閭一日二日
之占三行五行之酒汗尊杯飲之風葛天無懷
之樂迎春東郊戲陳傀儡踏歌元夕燈走魚龍

清明 柳暉鶯嬌烟輕雨羃鞋踏清明袂連陌上
豕啼盃酒陳設荒郊少婦村童禮瞻古墓新鬼
舊鬼共薦清醪大丘小丘均標白紙
四月八日 城東之山古佛之刹四月八日羣禮
文佛之生五戒三依其所一身之福一切善男
信女貝唱金剛無數比丘沙彌梵翻梁懺
重陽 時維九月序屬三秋共祝五顯之神會於
念七之日肩輿載木偶雜踏歡呼黃冠執金鈴
哩囉喧鬧縛木竿於兩足人懸天半名曰登樞

坐天送茅舟於江干

束茅爲舟
祭於河畔

夷漢同歡謂之賽會

拖裙傳粉假作村姑披甲持戈謬爲勇士穿街
歷巷恍如山鬼攫人涉水登山如同猿猱升木
紅裙爭看舉國如狂碧眼奔趨羣苗共醉數聲
鼓角歌遶山城幾曲蘆笙愁銷邊吏

小呂候三

元日晴明則歲豐雨雪則旱澇

立春晴上年豐雨則年豐

正月雷雨雪二月雨不歇三月犁乾田四月秧上

五節謂夏月必旱無水栽秧民墾田因民墾土
五月十三日有雨俗謂之磨刀水
九月雷作來歲多疫
九月十三晴則一冬必晴是日雨一冬多雨

論曰西伯崛起興化行俗美傳曰流風遺俗則風
者上之所被而俗者下之所成也餘邑自建設
之後歷今百有餘年漸磨丕變已非其舊安得
執播州非人所居一語盡古今之概耶况
聖天子文教覃敷不遺遐壤餘雖僻邑將來沐浴德

化安知不與汝濱江漢並美周南是在樂只君
子有以風之而已

土產

貨類

油 有菜油茶油拍油桐油蘇麻油火麻油櫻
栗油草蓆油各種

棉紙

棉花

棉布

花椒

石羔

出草坪

苧麻

漆

葛

土人不善刈獲

茶

蜂蜜 有巖蜜家蜜

白蠟 生於冬青樹俗曰蠟樹

黃蠟 有巖蠟家蠟

藥弩

見藝文志

蘆笙

見藝文志

穀品

早穀 有六十日白露早洗杷早之類

晚穀 有杉板紅班稠糯香禾米豬毛糯金釵

糯之類

旱稻 種山土中名曰旱粘

黍 卽膏粱

稷 卽粟類似黍而小

粟 卽小米有黃白二種

粱 卽糝子米似粟而大

苽 有苦苽甜苽二種

麥 有大麥小麥燕麥三種

豆 有豌豆扁豆蚕豆豇豆黃豆綠豆黑豆紅

豆飯豆各種

玉米 一名包谷米一名雨麥

菜品

芥 韭 芹

菁 甜菜 菠菜

薺 萵苣 茄

王瓜 東瓜 絲瓜

南瓜 苦瓜 一名錦荔枝

刀豆 裹帶豆 四季豆

蘿蔔 瓠 葱

蒜 蕨 見藝文志 芫荽

芋 菌 有芋肚青杠二種

蕪 俗名藟豆形小名苦藟形大名鵞腿藟

葫蘆

果品

柑 橘 橙

柚 香櫞 佛手

梅 杏 桃

梨 李 榴

棗 柿 栗

枇杷

櫻桃

來禽

銀杏

核桃

花紅

刺梨

見藝文志

西瓜

花品

牡丹

芍藥

蓮

紫微

紫荊

山鵲卽映山紅

芙蓉

海棠

有鐵梗一種

桂 有紅黃二種

萬壽菊

梅 有香與不香二種

菩提珠

蘭 有香與不香二種

淡竹葉

蛺蝶

蜀葵

向日葵

山丹

剪羅

罌粟

白鶴卽玉簪

雪裡紅

芭蕉

水仙

菊

秋海棠

鐵線蓮

月月紅

玫瑰

薔薇

瑞香

紫茉莉

美人蕉

梔子

鷄冠

粉團卽繡毬

荼蘼

凌霄

香花

鳳仙

洛陽

竹木

竹 有箭竿竹簞竹班竹苦竹棕竹紫竹水竹
慈竹刺竹天竹各種

松

栢

柳

杉

椿

桑

楸

槐

楓

柏

黃楊

白楊

青桐

梧桐 有青桐白桐二種

枹木

欒櫚

羊桃藤

見藝文志

冬青

其實名女貞子

楮

一名構皮樹一名穀樹

藥品

益母草

何首烏

五味子

車前草

枸杞子

地骨皮

天門冬

麥門冬

小茴香

香附子

山茨菰

希簽草

五佳皮

穿山甲

旱蓮草

金銀花

馬鞭草

黃精草

荊芥

薄荷

黃蘗草

桔梗

紫蘇

陳皮

半夏

前胡

山藥

薏苡

青皮

木通

瓜蒌

厚朴

赤芍

枳殼

牛膝

茺蔚

百合

常山

紫草

蒼耳

沙參

續斷

蒲公英卽地丁草

葵草

見藝文志

海椒俗名辣火 土苗用以代鹽

羽屬

黃鸝

白鸚

竹鷄

錦鷄

鴛鴦

鷺鷥

鸕鶿

畫眉

播穀

鷓鴣

鷓鴣

班鳩

巖鷲

喜鵲

烏鴉

白頭翁

野鴨

野鷄一名雉

啄木

百舌

鶻

鴿

杜宇一名子規

毛屬

虎

豹

熊

羆

麋

鹿

豺

麂

兔

狐

狸

野豬

山羊

茨豬

猿

獾即果狸

竹猺

猴有最小者

鱗介

魚有青魚鮎魚鯽魚漢魚膳魚黃魚白

魚油魚短頭魚長唇魚細鱗魚各種

蟹

螺

蚌

蝦形最小不可食

龜

鱉形如螭最不可食

論曰餘故瘠土物產絕無珍奇然衣食之需器

用之藉扶輿磅礴之氣未嘗有所獨缺滋養而

加以樽節是即不涸之倉瘠土亦沃土也苟布

帛菽粟之未贍則雖徑寸之珠重文之錦豈能療吾民之饑寒乎哉

苗蠻

按黔書通志所載苗類三十餘種今詢之土人散居餘慶者有五種列之於後

西苗 性純良知尊卑有名無姓結茅爲舍人畜同居勤耕鑿多雜糧種薑蒜養蠶績構爲本着皂衣青帕束首戴白翎身佩左插刀女着花短衣短裙上下露體頭挽偏髻籠以木梳裳服自

製刺繡彩粧身不加綿其婚媾房於野外名曰馬郎房於野外交合後然後通妣行聘親迎之日殺狗一隻飯一簍酒一甕死用笛停之哭泣一宿不發殮將屍損貯石洞巖穴一岫塋一七後備酒食往奠不知正朔以仲冬爲歲首宰水牛一隻屠而祭天肉散親友自不敢食歲暮用母蠶祭先祖俗與大頭花苗無異
花苗 在餘慶司山谷中男女拆敗布緝條以織衣無衿竅而納諸首以青藍布裹頭少年縛楮

皮於額婚乃去之婦人歛馬鬃尾雜人髮爲髮
大如斗櫛以木梳裳服先用蠟繪花於布而後
染之旣染去蠟則花現飾袖以錦故曰花苗其
人有名無姓有屬無長不知正朔以十二辰屬
爲期無文字刻木爲信魍結侏離陟岡巒獵荆
棘如猿猱散處山谷間聚而成村曰寨誅茅構
宇不加斧鑿架木如鳥巢寢處炊爨與牲畜俱
夜無卧具掘地爲爐爇柴而反側以炙雖隆冬
稚子率裸而近火所食多以麥稗雜野蔬間有

稻皆儲以待正供或享賓有終身不穀食者每
歲孟春合男女於埜謂之跳月預擇平壤爲月
場及期男女皆更服飾粧男編竹爲蘆笙吹之
而前女振鈴繼於後以爲節並肩舞蹈迴翔婉
轉終日不倦暮則挈所私歸謔浪笑歌比曉乃
散聘資以女之妍媸爲盈縮必生子然後歸夫
家以季夏爲歲首屠牛醱釀以祀天有喪則宰
牛召戚屬遠近奔赴攜酒食以賻之環哭盡哀
塋不用棺斂手足而瘞之其卜地以鷄子擲之

不破者爲吉病不服藥惟禱於鬼謂其巫曰鬼師鬼師乘是以愚之或宰牲磔鷄或殺牛雖極貧亦必稱貸而爲之往往以此破家終不悔悟動作必卜或折茅或熟鷄取其脰骨與腦驗其休咎

黑苗 多穴居性兇善造強弩名偏架一人持其中二人蹶兩端而張之媾婚吹木葉如蘆笙焉水犵狁 一名擾家散居餘慶縣屬爲漢人佃種田地分租而食與漢人雜處其性淳樸勤耕作

畏官長男人衣服與漢人無異惟女人服密褶小短裙花衣猶沿苗俗與他州縣所屬苗彝地廣人衆醜類成羣獷悍喜殺者不同土民稱湯陽大龍者卽其老戶是也
獠獠 一曰楊黃其種亦夥荆壁四立而不塗門六戶不扃出則以泥封之男子計口而耕婦人度身而織暇則挾刀操筍以漁獵爲業把忌以三月朔父母死則焚其衣服拊其牛馬以贈之婚喪以犬相遺每歲以仲冬逢寅日祭祖爲歲首

焉土姓諸楊卽其老戶是也

苗語

西苗語一曰以二曰物三曰必四曰六五曰別
六曰抓七曰穰八曰雅九曰牙十曰我祖曰阿祖
父曰巴母曰脉丈夫曰戎妻曰阿婆子曰當兄曰
大弟曰果岳父曰阿公喫飯曰噯壓飲酒曰呵交
喫肉曰噯改喫烟曰呵烟喫茶曰呵以大米曰勒
小米曰藏春米曰打藏鷄曰革猪曰比鴨曰
曰我魚曰米牛曰你放牛曰掌你馬曰罵火曰落

風曰計日曰納月曰薩雨曰若人死曰落大趕場
曰阿也布曰杜帽曰哥鞋曰困讀手曰尾脚曰剝
頭曰呼口曰虛官曰假銀子曰佞夜晚曰本望早
上曰得月碗曰空鐘曰重箸曰茗菜曰乳吹笙曰
搬汪踏月曰抓打鼓曰築朗不好曰沒杖臀曰打
假衣曰瓦裙曰鐙向火曰敵落山曰穰坡曰微水
曰汪花曰文

花苗語一爲以二爲矮三爲秘四爲簌五爲必
六爲都七爲穰八爲雅九爲街十爲果祖爲阿爺

父爲巴母爲脉丈夫爲大羅妻爲寶子爲動兄爲
魯弟爲個岳父爲阿岳喫飯爲噉釀飲酒爲呵九
喫肉爲噉改喫茶爲呵已喫烟爲呵應大米爲勒
小米爲松春米爲打送鷄爲蓋猪爲巴鴨爲介鷺
爲夾鶯魚爲咪牛爲鈕放牛爲掌鈕馬爲米火爲
反風爲偕日爲舛月爲拉雨爲舛婁人死爲打趕
場爲耍街布爲杜帽爲阿魯鞋爲枯手爲別脚爲
夾頭爲歌呼口爲鳥官爲把貴銀子爲倭夜晚爲
芒供早上爲一耍碗爲飲鐘爲挖箸爲寨菜爲卧

衣爲甲里裙爲頓向火爲立堆山爲翁水爲甕花
爲種
黑苗語 一呼衣二呼教三呼拜四呼老五呼家
六呼溜七呼悅八呼牙九呼絞十呼竹祖呼垢父
呼巴母呼婿丈夫呼敵歪妻亦呼敵歪兄呼胞弟
呼卧岳父呼敵岳喫飯呼噉皆飲酒呼呵已喫肉
呼噉岩喫茶呼呵已喫烟呼呵烟大米呼乃小米
呼崔春米呼倒崔雞呼革猪呼拜鴨呼夾鶯呼晏
魚呼滅牛呼你放牛呼播戰你某馬呼罵火呼朵

風呼計日呼冷奶月呼冷臘下雨呼打弄人死呼
答屢趕場呼趕上布呼舍帽呼冷冒鞋呼海冲手
呼折臂脚呼折撈頭呼勒烘口呼勒鬧官呼太爺
銀呼捏夜晚呼別尾早上呼反尾衣呼窩裙呼濯
得向火呼帶朶山呼立歐坡呼立排水呼高汚花
呼破瓣殺人呼麻屢打人呼堆乃放火呼派別
按狔狔獐獐在餘慶者久化成漢稱謂與漢人
無異甚至有人指其種類反以爲耻卽有苗語
亦密而不傳

論曰餘慶自設縣以來雖彝風久革而苗類猶
未盡除出國門而四望烟墟村落實繁有徒但
勢散而不聚性樸而風淳固不等於都黎獷悍
難馴者惟使之相安於習俗相樂於燕閑預脩
控制勿擾勿索則生苗漸熟矣其方言不一務
採入志俾聽訟之下侏離易曉不爲奸胥猾吏
所侮弄豈非治苗之急務哉

災祥

崇禎十六年癸未縣城外大河對崖石上開紅花

數朶大如面盆三日後其色漸淡散落崖下視之乃苔衣也

十七年甲申城北五十里嚴家屯青桐木一株大可合抱爲風雨所推連根倒卧地下已數日嚴蔣兩家爭欲斧之忽一日樹自起立枝葉復茂丁亥甕安土賊藍二作亂剽掠村坊餘慶一邑受害近城居民避亂古老望爲賊攻破被殺者數百人

戊子己丑年兵賊交訌田地荒蕪城內外人相食

順治十六年大旱

十七年旱饑巡撫卞公三元請動楚運米賑之

康熙二年城北草坪民家牛產一犢一身一頭四耳四目八足兩尾是年大水

十二年石花開是年冬吳三桂反

十九年石花開是年冬大兵恢復貴州

五十三年石花開明年春大中丞劉公蔭樞會猷烏蒙土府祿鼎乾威寧府屬土弁祿世華在畢節縣質成

論曰區區餘邑偶見災祥豈必盡關氣數然爲
休爲咎一邑之人民實身受之未可忽視也縣
自平播以來大兵大凶固已數見木石之變先
兆其端國僑曰天道遠人道邇盡人事乃所以
答天心

其間以八族附屬以千夫大木
其間以千夫附屬以千夫大木
其間以千夫附屬以千夫大木
其間以千夫附屬以千夫大木
其間以千夫附屬以千夫大木

餘慶縣志卷之八上

武英殿纂修特授餘慶縣知縣長洲蔣 濬輯

儒學教諭許之獬校

藝文志

諭告

疏

碑記

銘

論

序

藝文之首恭繕

聖諭冠於其上尊 王謨也然論藝文於餘邑幾同
吉光片羽蓋緣開創未久舟車弗通探奇者鮮過
而問焉無怪乎往籍之寥寥也今

聖天子右文盛治覃及遐方奎翰天章琅琅炳炳餘

雖蕞爾漸臻丕變則異日者太史輜軒及此不同
曹鄴之無譏莫非王言之敷化云

諭告

卧碑 順治九年頒

朝廷建立學校選取生員免其丁糧厚其廩膳設學
院學道學官以教之各衙門官以禮相待全要養
成賢才以供朝廷之用諸生皆當上報國恩
下立人品所有教條開列於後

一生員之家父母賢智者子當受教父母愚魯或有

非爲者子既讀書明理當再三懇告使父母不陷
於危亡

一生員立志當學爲忠臣清官書史所載忠清事蹟
務須互相講究凡利國愛民之事更宜留心

一生員居心忠厚正直讀書方有實用出仕必作良
吏若心術邪刻讀書必無成就爲官必取禍患行
害人之事者往往自殺其身常宜思省

一生員不可干求官長交結勢要希圖進身若果心
善德全上天知之必加以福

一生員當愛身忍性凡有司官衙門不可輕入卽有
一切已之事止許家人代告不許干與他人詞訟他
人亦不許牽連生員作證
一爲學當尊敬先生若講說皆須誠心聽受如有未
明從容再問毋妄行辯難爲師者亦當盡心教訓
勿致怠惰
一軍民一切利病不許生員上書陳言如有一言建
白以違制論黜革治罪

一生員不許糾黨多人立盟結社把持官府武斷鄉

曲所作文字不許妄行刊刻違者聽提調官治罪

上諭十六條

第一條敦孝弟以重人倫

第二條篤宗族以昭雍睦

第三條和鄉黨以息爭訟

第四條重農桑以足衣食

第五條尚節儉以惜財用

第六條隆學校以端士習

第七條黜異端以崇正學

第八條講法律以儆愚頑

第九條明禮讓以厚風俗

第十條務本業以定民志

第十一條訓子弟以禁非爲

第十二條息誣告以全良善

第十三條誠窩逃以免株連

第十四條完錢糧以省催科

第十五條聯保甲以彌盜賊

第十六條解仇忿以重身命

查則例載康熙二十五年五月禮部覆浙提陳

題查康熙十九年十月內禮部已將

上諭十六條通行八旗及直省奉行講解今請

勅下各直省督撫將

上諭十六條抄錄轉行該省提鎮等照通行文職處

民講讀例曉諭各該營伍將弁兵丁俾令實心

講解俱知忠孝禮義之大節以仰副

皇上振興教化至意至土司一體令其講讀

上諭俾知忠孝綱常等語相應

勅下該督撫提鎮並將

上諭十六條頒發土司官員講解可也奉

旨依議

御製訓飭士子文 康熙四十一年正月頒
國家建立學校原以興行教化作育人材典至渥也
朕臨御以來隆重師儒加意庠序近復慎簡學使釐
剔弊端務期風教修明賢才蔚起庶幾棧樸作人之
意乃比年士習未端儒效罕著雖因內外臣工奉行
未能盡善亦由爾諸生積錮已久粹難改易之故也

茲特親製訓言再加警飭爾諸生其敬聽之從來學
者先立品行次及文學學術事功源委有叙爾諸生
幼聞庭訓長列宮牆朝夕誦讀寧無講究必也躬修
實踐砥礪廉隅敦孝順以事親秉忠貞以立志窮經
考業勿雜荒誕之談取友親師悉化儻盈之氣文章
歸於醇雅母事浮華軌度式於規繩最防蕩軼子衿
佻達自昔所譏苟行止有虧雖讀書何益若夫宅心
弗淑行已多愆或蜚語流言脅制官長或隱糧包訟
出入公門或唆撥姦猾欺孤凌弱或招呼朋類結社

邀盟乃如之人名教不容鄉黨勿齒縱幸脫褫朴濫竊章縫返之於裘寧無媿乎况乎鄉會科名乃掄才大典關係尤鉅士子果有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反覆惓惓茲訓言頒到

爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志寧俟他求哉若仍視爲具文玩愒勿儆毀方躍冶暴棄自甘則是爾等冥頑無知終不能率教也旣負栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業勿修咎亦難追勿謂朕言之不預也爾多士尚敬聽

新定地方一則曰招撫流移復業毋令豪強冒奪
大哉皇言明見萬里恩加八番所以安集鴻雁於
澤休息鴛鴦於梁者靡不周且詳矣臣等奉綸音
宣導德意與經理諸臣上自道府下至丞尉亦至
於再至於四矣顧經理之節目甚鎖甚冗而其體
統在官與民土官曰先人歷代遺土新官曰朝廷
業已改流柄鑿不相入而互相持舊民曰此吾世
業而偶失之也何知新民新民曰汝罪人幸而脫
刃者也何得復戀熊虎各相噬而勢相戕甚至新

官與新民依倚土官與舊民連結各恃衆怙力將
人人碁峙以觀成敗此體統之難正也築城垣於
豺虎之穴而獷悍不可使度田土於荆棘之中而
尋丈不可覈建學校以化彞而口舌紛紜徵糧馬
以急公而支吾推調開道路以通商而戎賊莽伏
物力詘而無以應多役糧餉殫而無以張兵威捉
襟則肘見調宮則商亂甚至謂改土徒勞不如還
蜀此節目之難理也臣與督臣按臣會議諭諸經
理司道府官凡教在初而禮爲始暫給土官冠帶

劄付引於繩之內次定與縣令迎送接見儀節委以職事稽其勤惰毋令軼於繩之外而官志始定查舊田有憑者還舊主查逆田入官者給新民俱不令入價而責其納租土著子弟稍通者令之入學青其衿毋左其衽新民子弟卽平通者止令寄學不許觀場二十年後始令赴試而民志始定體統既定漸議築城垣首砌龍泉次砌甕安又次砌餘慶湓潭又次砌平越水城黃平州城銅仁縣城又次修銅仁平越府城新添龍里衛城又次築平

越行府銅仁營堡而城垣舉矣卽不敢謂金湯足恃而三版安堵千里聯絡實空虛之地爲扞蔽之資脫有不虞民亦可倚而守也乃漸議度土田起糧馬丈出田地一十九萬四千有奇歲徵銀一萬五千六百有奇本色米四百有奇雖比之遵義不及十之一而在黔中稍稍成聚卽一郡一州四縣官員之俸薪道路之夫馬皂快之工食踐更之戍饌僅僅取給焉又漸議建學校則改平越衛學爲府學以黃平州學附於平越府學土著新附之子

第肄業有地變椎髻爲絃歌柔靡莫而詩書或者其藉此乎又漸議開道路則團聚哨兵建立舖舍修飭候館滇楚賓旅亦稍出途廻視豺狼當道荆棘塞路之時則有聞矣蓋自播平至今已歷四年各官經理亦踰一載城市鮮犬吠之驚叢祠罷狐鳴之盜是皆我皇上威遠暢惠廣被故令夜郎牂柯驚鳥獲安平江潛水窮魚復樂豈臣等區區智力所能辦哉第二三營造拮据之臣其勞亦有不可泯者謹將各府州縣築完城垣公署丈完田地

糧則並戶口冊籍上塵御覽

題設府州縣疏畧

前人

播州之地東西相距二千餘里南北相距二百餘里雖云愍國亦係樂土今議改流東西可設二府每府各設二三縣播境原屬四川與貴州隣二省界限原自分明至論建置大概臣意白沙溪以至白泥當以烏江爲界設一府於白田壩而眞州萇山松坎等處可爲三縣黃平在元已爲府矣當設一府於黃平或平越而餘慶白泥二司可爲一縣

甕水重安二司可爲一縣此沙溪白泥一帶建置之大概也自白泥渡江至婺川縣以三渡板角苦竹三關爲界其中漢苗田土雜錯惟潛潭可縣龍泉可縣龍泉土官安民志陣亡其子尙幼其印已失土地已爲楊賊踐躪合無將龍泉改建一縣增置城郭而以安民志之子世爲土縣丞以爲死義者之勸其祖職長官世爲土主簿此則思石一帶建置之大較也第播州之名其來已久播之爲字番之有才者也以故應龍阻兵崛疆獷戾竭四方

之力僅乃克之夫南越破而聞喜建呂嘉得而獲嘉名龍舟平改爲龍安九絲變更名建武卽播州納土於宋亦改名遵義計廟堂當有定謨而播之名似當更易疏上下部覆請詔設平越軍民府及黃平州餘慶縣潛潭縣甕安縣龍泉縣五州縣題設永寧餘慶等州縣一十六學疏

巡撫王燕順天

題爲懇恩題請添設學校以弘教化以廣

皇仁事康熙三十七年據署貴州布政司事糧驛貴

東道羅暹提學道僉事卜景超會覆到臣該臣看得振興文教樂育人材乃至治之盛事我

皇上親幸闕里鼎新 聖殿重道崇儒諸鉅典度越百王致登上治所以薄海內外一道同風無不沐浴咏歌於文物聲名之內黔雖僻處邊隅甄陶既久亦已斐然可觀又蒙鄉試增廣中式之額益加鼓舞淮因開闢初年人文寥落學校之製尙缺而未全各州縣衛有未設學宮者有有學無官而附試他庠者無學宮則不獲覩俎豆聲容之盛而陶

淑無由附試他學則不免跋涉險阻之勞而單寒致阻臣愚以爲大化翔洽之盛時不可不脩其制也況今

國家武功赫濯文教誕敷無遠弗届黔地民苗雜處加以鼓舞作興則士氣旣奮而蠻彝亦得觀感於絃誦詩書以柔其獷悍之心誠漸被要荒之要道也臣蒞任後據各學生員周文侯等具呈請將未設學之州縣衛及有學無官而附試他庠者援例請題添設經臣行據司道會覆請援滇省和曲等

州縣建學設官之例添設等因前來臣復加查覈應請將附學之清浪衛設教授一員又附學之開州廣順州並未設學之永寧獨山麻哈三州各設學正一員又附學之曾安餘慶安化三縣並未設學之曾定平越都勻鎮遠銅仁龍泉永從七縣各設訓導一員進取文武童生照小學例每學考取八名廩貢循例遵行庶附學之生童免裹糧跋涉之苦無學之州縣有師儒肄業之地至原未有學宮之州縣則公同捐俸建設其官役俸工照全書

額編支給彙冊報銷從此全黔士子愈益感恩踴躍爭自濯磨仰副

聖主儲才之盛典行見人文宣朗風俗日興於仁讓矣臣謹會同署雲貴總督臣石文晟合辭題請如果芻蕘可採伏乞

睿鑒勅部議覆施行

碑記

餘慶縣建城碑記

明守 劉冠南 廬陵

萬曆辛丑年始工壬寅冬餘慶城成餘慶者巖邑也古羅施國夜郎牂柯地屬重慶播州明興楊酋犯順置縣設官改屬貴州隸平越居潛潭黃平之間上通滇雲下接楚沅東隣偏橋西聯遵義左帶烏江之水右枕中華之山皆封貌狹獠之鄉伏弩裹甲之地獨一面由偏橋而走上國城立則各種路苗不敢猖獗楚蜀滇南三路皆通城立則鰲溪

岑黃郵傳相續上下血脉指呼立應餘慶雖小邑
實重地也論者謂固餘慶則守城爲急立法之初
設有三哨以防之三關以應之又設城兵以守衛
之雖有鴛鴦竊發無由中丞郭公經理其地匾西
門爲太初樓匾北門爲南薰樓匾東門爲來喜樓
鎮遠守備史良將董其事永寧知州攝縣事袁尙
紀鳩其工典史向炳襄其成費金計一千六百有
奇粟計一千五百有奇堵計三百三十有奇嘗按
春秋書城廓嚴外防也書城堞慎內治也易曰王

公設險以守其國豈山川丘陵城池固爲設險也
故青澗城而夏人不敢東向用此道耳矧餘慶當
偏輿阨塞與青澗折戎之衝功未知先後謂無易
象春秋義不可也雖然城可守也不可恃也晉陽
之城不浸者三版而卒能捍敵存趙子囊城郢而
沈尹戌非之豈真城無益哉故城一也善守之環
堵皆堅壁不善守之金湯皆寇壘詩曰公侯干城
在得人也衆心成城在得民也敢以告封人

邑侯趙公德政碑記

明經畧

鄭逢元

湖廣

語曰得一良吏勝得精兵三千人得一良守勝得精兵三萬人余三復斯言心竊賞之於此時爲然也蓋平昔盛時弓發矢戢疆圉無警先輩諸君子往往以循良懋績樹績流鴻垂之不朽焉值茲邊陲决裂中土憑陵所以佐命匡鼎固馭治有人至於承流宣化回慘刻而起凋殘實嘉賴於守土司牧之名賢也如餘邑彈丸僻壤厥初教養遂而生聚蕃雖曰荒服哉景色亦恢張矣至於丁亥歲藍逆蹂躪繼之亂兵荼毒黔黎蕭條生靈磔裂鷄犬

罕音燕巢林木今幸仁廉邑侯天府趙父母來守茲土山城荒署子遺寥寥洵矣三空四盡侯日擊而心傷曰有城無人其何能邑於是秉豈弟以招來則民於流者集鴻雁焉民於兵者易劍牛焉猶慮有民莫耕埜盡石田請牛給種以資萬井焉旱蝗流災祈禳開堰不啻孝鬼神而力溝洫焉至於輓軍糈也熟納荒捐而民不困於徵輸矣均夫役也餘合二里以隔江弗應侯力疏頌諭而三里之苦樂均矣且邑雖非孔道爲六路通衢時有賓客

餽養侯惟課家人績織而給焉邑無巨室有文武居屯儼然族大寵多侯惟凜寅畏調劑而處焉若夫禮賢才課子衿興久衰之文教建梵剎修朝賀循漢官之威儀雉堞葺整壁壘崇固鼠雀無訟囹圄空虛士人鮮有私謁胥隸鮮有忤逞此皆侯之經濟才宏而操修行潔見端於其事者如侯之字無告以惠窮民掩露骸而施漏澤泣罪解網鋤強弭盜絕罪罰之紙贖汰陋規之紅錢痛荒月之稅難徵則捐俸金以抵之憫終歲之穀不給則出

俸糧以補之侯之廉也侯之清仁以行其廉也是以餘之時和盜息城完疆固良吏良守之勝得於精兵千萬也洵可以頌侯也餘之紳民以侯之德政垂之竹帛而弗旣欲銘之石以誌不朽用丐余言因筆其事而約畧言之異日勲彌天壤美傳史冊則今日祇見虎之一文耳是爲記

他山記

明巡按 錢邦芭 丹徒

宇內山石之奇無過川黔楚粵然幽遐荒險車馬不交之處奇詭殆甚而世或鮮知之至川黔楚粵

之交選第名山奇水幾以百計而巉峨之鰲溪幽麗爲最白鵝溪至潛水約可百餘里幽崖深溪堪怡玩者何止數十而蒲村爲最也村之上有柳湖湖之陰爲他山山高不半里回曲斜抱上多奇石樹多楓樟楠梓中一石最奇突高不及一丈名曰翠屏外削而內空矗立斜捲余鐫他山兩大字於上石腰有洞曲透其背其峰勢橫飛處瘦薄而偏聳爲石帆峯峯背如堂凹其中可坐卧名曰雲房古栢老梅黃楊青杉前後掩映奇鬱森秀左一石

高八尺上銳而中虛斜側怪異隨步換狀曰九面峯峯前左右兩壁側立中虛處可容數十斛植梅其中右壁一穴圓如磬口梅幹橫生從此透出名曰梅倉右稍前一石高六尺四寸外圓可圍丈四尺而中空至地如桶下透一小穴高一尺三寸樹梅其中根從下穴出枝梢花葉聳出於石之巔幹隱石腹命曰梅困稍上三十五步一石橫卧長七尺三寸中剝如船腰際一孔大踰碗口植梅其中有若帆檣題曰梅舟石帆峰之右有一石洞高二

尺五寸可穿而過上有冬青二株根插洞門最爲奇古曰小洞天梅倉之左有崖高一丈四尺奇險難卽名霹靂崖崖稍上二十步有峽深九尺七寸高一丈五寸名藏書峽峽前一小穴名迴嵐穴峽左一石方整如室高一丈二尺四面陡絕不可登石上生冬青蘿薜蒙綴如纓絡前有櫻桃一株甚古後有緋桃梧竹此外前後大石二十餘處離立作勢咸可坐踞或蹲如猊或奮如虎如龍游鳳翥烟斷雲騫大約皆瘦壯皺漏聳削巖嵌不可名似

中構一亭六角茅宇製甚樸拙曰拜石亭坐亭中則諸石之奇畢獻於四周而又迴映杉竹花樹朝昏烟霞變現出沒給賞難遍自拜石亭後上二百步極他山之巔四顧諸峰環拱如兒孫俛視柳湖纔練帶斜拖耳鐘聲隱隱出雲巒間蓋小年菴也此外縈青繚白攢蹙點聚蒼碧圍混遠與天際奇觀哉夫宇內名山巨川載於經誌者寧可殫述而是山之奇迨未多遜也乃千百年無知之者余以迹名之故遠遜萬山深處始得遇此然則世之奇

偉名勝隱匿幽遐而不復見知於人世者又寧獨此山也哉

客溪山莊記

明胡欽華

廣東

將以爲寓乎哀樂榮瘁感於外者鑠其中溺而莫之出與逃乎所囿而沾沾自矜者皆不能忘其爲寓者也將以爲安乎果能安也雖寓可也二者交疑而莫適余始至黔之明年壬辰從先子退耕於餘慶之客溪又明年先子卒而其居火余相其宅之右一山獨小積莽其下有異致焉遂芟刈而啟

之構茅十餘間周以疎籬間以篠竹合抱之木數十章映帶於居之左右蕭疎閑遠望之而知其爲山人之居也居之外茶百叢柿栗之樹如茶稻田數十區蔬以隙地春而摘茗夏而灌園秋浚歲稔相與率婢妾子女上下山椒田畦之間拾遺穗落果顧而樂之此山人之婦子農圃也嘗手植梅五十本雜以嘉樹時花間有衲衣野服列坐咏嘯其下則山人之主客壺觴也風日和美鷄犬散於野兒童譁於庭柴門晝關樵牧四出則山人之扶策

他往也客曰子之閱變多矣有失而無得其年彌
衰而其身彌放得是以老足矣尙何擇夫寓與安
耶曰卽寓以爲安而吾不知也卽安以爲寓而吾
不察也蠢蠢然將與石同其錮樗同其不材同爰
居之聽樂而眩遊魚之見西子而驚欤也而又何
擇焉且吾之始來此也谷幽而昧溪阻而夾山林
之氣鬱塞而昏伏數年之內藝爲禾黍淪爲流泉
廓爲佳勝登高而望卉木清而秀悅極深而遊谿
谷迴而窈窕夫惡知事益工而散其樸形益美而

淪其真山莊之靈久釋我而遯於無何有之鄉矣
吾亦尋吾故而不可有而何有於其居客曰子何
語之荒不見病夫與嬰兒乎嬰兒恃母之抱不暫
離也病夫支杖而起不暫舍也其勢可以折杖而
傲母之手及其釋抱而神王也踴躍奔突行且凌
丘壑而爭拳勇矣迴視吾杖則無所損焉卽吾母
之手亦無恙且未嘗因是而避之隣也若因是悲
吾杖而日拊吾母之手不必也又因是神吾杖而
以吾母之手爲聖且智亦不必也而子何山靈之

虞耶子勉矣俟無所御以遊然後返視余無以抗其說遂伸筆書紙而私之爲山莊之記云

重修餘慶學宮碑記

知縣 蔣 潑 長洲

古者聖王設學校以教其民擇民之秀者羣處其中而所以教之之意無非欲其明大倫崇孝悌識廉耻以成君子之行以儲國器之用故泮宮起而采芹之頌興學校廢而子衿之刺作朱子所謂學校之官爲政事之本道德之歸而不可一日不講焉者也黔之餘慶屬古播州羈縻地崇山密箐徑

紆地僻歲癸巳秋膺

特簡之命來蒞茲土苗民叢雜產薄而戶貧質野而識陋幸沐

聖天子涵濡之化已俯首聽命而諸大吏之撫綏其間者悉措置咸宜故有務稼穡而業詩書者蒸蒸然亦漸丕變成俗矣甫謁

文廟執經之士羣集講堂察其品貌聆其言論秀異之士十有二三於是立堂下名諸生而詔之曰孔子帝王之師也澤宮教化之源也端本之地孰有

重於此乎攷餘慶縣學萬曆癸卯始建於縣之西
後屢遷而不得其吉康熙戊申因楊氏之地在縣
治之北遂移建焉仍有學而無官諸生附學黃平
至己卯歲始設訓導甲申復設教諭顧數科以來
鄉薦僅得一二士卽博士弟子員半由外學撥入
覩此殿堂兩廡之間地卑水溢傍風上雨傾圯不
支木朽而石泐榱折而牆裂其何以肅觀瞻而妥
聖靈乎聖靈未妥又何以邀福澤而取科第乎迺與
教諭許君之解訓導鄭君良佐典史張君允德各

捐俸倡士之好義者爲伙市材鳩工伐石陶瓦撤
其舊而重新之墊基三尺拓土兩旁增二架而五
楹焉東西舊廡亦廣其故址寬其棟材先賢先儒
木主之蠹蝕而失序者復重整而位次之戟門西
有隙地復構三椽闢爲義學次第而舉行之工甫
畢是秋鄉薦者驟得二人自餘慶設學以來未之
有也於是邑中耆老子弟或舉酒而相慶曰豈非
吾邑侯蔣公修學之有驗歟余曰唯唯否否余之
所望於二三子者無庸汲汲於科第以不得售爲

惑也余惟古之繼天立極善於爲治爲教者莫如堯舜禹湯文武周公之羣聖而推明其所以爲教爲治鼓舞於千百世之下使皆樂其性分之所固有而不容自己者惟在孔子所以遍祀於天下歷千百世而尊之如一日也我

皇上列聖相承後先一揆詩書禮樂之化雕題重譯無遠弗届近又以朱子配祀十哲刻其全書爲有裨於孔子之教頒給各學其所以崇道術育人材之方亦旣詳且盡矣爾諸生對越秉虔之下其思

何以由庠序以明人倫修孝悌忠信以事其君持禮義廉耻以淑其身飽詩書而飫道德明體達用砥於大儒俾知夫操筆硯以要利達博功名以炫閭里其所重固有在此而不在彼者安在區區餘邑不可追隆於唐虞並美於鄒魯吾於二三子有厚望焉是役也始於康熙癸巳臘月成於甲午十一月用木植若干陶瓦若干工役若干費白鏹若干先是金公磐倡助謀葺以墜任而未逮余不敢沒公志也其邑中好義捐修紳士及罰鍰之數另

刻於石

築學宮基址碑記

教諭許之獬

平溪

康熙四十四年乙酉初夏余承乏餘陽學博拜謁文廟見地勢窪下每夏秋靈雨廟中汎濫十數泓迸流而出輒喟然曰學宮卑暗如此

聖靈其何以妥文氣其何以宣耶志欲培高其地而重修之奈俸薄力綿而前賢司牧又俯首蹙額撫字勤勞日不暇給未敢啟其舉行心鬱鬱者將及十稔迨癸巳秋杪邑侯蔣公以三吳名宿來宰是

邦甫下車卽慨然以作興文學爲己任因語余以修學之故予曰欲修文廟宜先培地基公然其言遂撤去舊棟覓工鑿石於山將臺基陞高三尺週圍約二百餘尺畚築堅固樹立新宇文廟煥然改觀瞻拜之際諸生咸欣喜相謂曰學宮之巍煥實地基之崇隆爽塏有以致之也去昔時之卑暗就今日之高明所以妥

聖靈而宣文氣者洵在是矣非邑侯蔣公主持之功吾夫子贊襄之力不致於此予因詔之曰爾知蔣

公修學之功抑知公以舊學卑暗掖而升之以至於高明其所以期望於爾諸生者之無弗至乎蓋吾人之性量本自高峻浩浩乎無所屈也但爲利欲所間則高者失其高矣心體本自光明洞洞乎無所蔽也但爲利欲所累則明者失其明矣爾諸生誠能自克其私以致力於道德之途使精於理者欲不得以淆其真嚴於義者利不得以汨其守以自得其性體之高明於以浚造乎聖賢之域則學問事功何在不底於成爲國爲天下何往不得

其順豈規規於取科第謀利祿云尔哉此公所以欲修學而先築基期望於爾諸生之心也傳曰極高明而道中庸爾諸生務體公修學之心爭自濯磨無負公之期望且以答

朝廷棫樸作人之盛惟在求諸性體之高明而已多士勉乎哉因畧而記之於石

改復巖門構皮官渡碑記

蔣濬

見前

餘慶縣治西南七十里巖門渡溯流而上不數里曰構皮灘皆古所稱牂柯水今名烏江者是危

巒夾峙湍流迅悍險於瞿塘灩澦非獨爲南黔奧區實楚蜀之要津也其間煙虛爨斷草樹蒙密螭虺之糾蟠猿猱之駭攫往來趨市之人抱布駝鹽騎則緘鐵鑿蹄步則鏐礪利屐鬼火燐而箐雲黑不憚險阻以通有無亦可悲矣乙未夏余署篆龍泉數經其道道傍人有相顧而泣者曰渡口有虎奈何旣又竊相慰曰今得隨長官渡或免噬耳余聞之因自愧職之不修也德之未周也密加廉訪始知奸宄數十人盤崖鋸嶺逢場市結隊衝突橫

索之狀暴於猛虎非饜其欲弗止於是行旅藉藉傳有走遍天下路難過巖門渡之謠蓋三十年於茲矣前令金公磐諭之不從逮捕則鳥獸不可弋獲鄉老猶能爲余道厥由來云曩者渡子駕舟有所謂挈把田以食其力而行旅稱便兵燹時繇繁民竄田且蕪沒不可詰土人私以舟濟遂因緣爲利有司於兩渡口設巡邏以徵帮鹽稅康熙三十七年帮稅革除而巡邏亦罷其渡田之若存若亡已四五十年余方汲汲於釐剔而土人有田姓者

來獻舊渡田若干畝乃迎道左而言曰知公有善
舉弗敢私也及詢其耕食年歲則已歷三世忘祖
宗開墾之勤而能割以奉公卉衣椎髻中有不沒
天良好行其義如古君子其人者較之踞渡橫索
之輩其賢不肖爲何如嗟嗟爲民上者莫非赤子
使聽其言而入其田是猶剗一人之肉而補萬體
之瘡也忍乎哉遂慰而歸之勉捐白鏹三十金有
奇造兩渡之船併置田焉嗣是力役食田禁毋橫
索卽有販匪之徒或蠱以利必不致謀口食而輕

蹈國法矣彼居奇之私船悉毀而沉之江貫其
旣往而弗罪焉繕牘陳憲蒙嘉其事命勒諸石
以垂永久嗚呼服賈牽牛者一旦熙熙然樂出其
途無招招舟子之呼有利涉大川之象豈余之創
哉亦無非宣

上恩德與民嬉遊追復古制耳後之君子有志倣徒
枉而倣輿梁俾羊腸鳥道同周行坦坦當必更有
十倍其政之平者余愧力未遑也契買田穀數刻
於碑陰併勒石於兩渡口茲不贅

蔣侯亭記

許之獬

見前

烏江源出金筑六廣諸河流經黔蜀界逶迤千餘里至餘慶縣城西七十里許曰巖門渡兩巖對峙如門渡之得名其以此也山狹而勢險波流湍急中通一線爲楚蜀商旅必經之處非藉舟楫不能飛渡舊設官渡行旅稱便自兵燹之後舊制無存渡船爲土豪所踞橫索渡錢行旅苦之有行盡天下路難過巖門渡之謠癸巳秋吳門蔣公以館閣清才奉

天子特簡來宰餘邑凡政治之得失民生之利弊靡不實心諮訪次第興除惟巖門窻遠且相沿日久咸懼土豪之奸故無有以其事告公者期年之後政成化洽乙未夏當道以公治績茂著檄公往攝龍泉篆務取道巖門悉心周諮始得其實公乃通詳上憲革除土豪私渡捐俸造船買田若干畝以膳渡夫勒石以垂永久自是行旅往來如履康莊興歌利涉真出湯火而登諸衽席也遠近商民悉皆大悅行歌衢頌黔楚巴蜀遍滿道途僉謀所

以誌公德於不朽者爰作亭江濱名曰蔣侯亭咸
褰裳跣足乞余文以記之余觀夫今之任邊吏者
或執掌簿書不暇計夫民隱或志圖遠畧不屑理
夫細務抑或民瘼罔念惟循次需俸以倖陞擢善
地以公視之爲何如也公於書無所不讀學博才
優在

內廷纂修數年宜其不屑屑於邊方吏治乃公顧志
存興革纖悉周詳治行循良大中丞劉公已入告
行將寵膺

內名霖雨天下功德所被不止區區一邑也獨是後
之君子循其善蹟無或廢墜行旅之感戴者億萬
斯年斯亭之作也不與名伯之甘棠牟公之峴首
同其永久也哉爰爲之記公諱深字樹存號蘇齋
長洲人作亭月日載諸碑陰云

蔣邑侯新建名宦祠碑記

前人

餘慶縣爲荒服地宋元以前無有問津者明萬曆
庚子平播後始建縣治歷今百有餘年官斯土者
指不勝屈然求其循聲卓卓去後謳思者僅得袁

公尙紀韓公任甫二公袁當開創之初劃疆分里
建城修堰披荆棘墾田畝均徭役功在創始爲難
韓當繼治之時教民以婚喪之禮順俗爲治使漢
土相安視袁雖若稍易譬諸造室者堂構榱宇門
垣之類業已規模修整後之善守者但當時加補
葺不至大壞則不必更爲也若無故妄加改作不
惟駭人觀聽將紛擾之過易茲潰圯詩曰不愆不
亡率由舊章兩公之功効蓋畧相等其循聲後先
相望故未建學之前邑人思之建祠奉祀者良有

由也癸巳秋邑侯蔣公甫蒞任卽首修學宮復建
義學三間延塾師教子弟之俊秀而無力進修者
其培植學校之心可謂誠且周也丙申仲秋朔公
釋菜竟週廻瞻視喟然謂余曰學雖修猶有未備
余請其故公曰宇內學校莫不有鄉賢名宦餘慶
獨寂然無聞寧非闕事歟余曰餘邑之在今日猶
幽岐之在夏殷風氣初開人文未盛鄉賢之祀姑
以俟諸來者若名宦則已有之矣因取舊乘所載
袁韓二公質之公曰二公既有功德於餘昔年專

祀固其宜也然日久無稽祠無可考今欲舉而祀之名宦且未詳憲允恐於例未昭合余曰二公功德載諸舊乘班班可攷卽今父老猶能言之若必拘於成格使先民矩矱湮沒弗彰非惟几筵無色抑亦有心風教者之所甚恫也公曰諾遂捐資鳩工於學宮戟門之左構堂一所顏曰名宦祠祀袁韓二公其原任撫軍郭公子章雖黔省通祀然平播後建城設縣築堰置堠修木根坡而買官墳功德所暨於餘獨浚尤爲當祀遂以三公之主照爵

而列焉嗟乎觀俎豆之馨香景前賢之芳躅寧無有感而興起者乎莫爲之前雖美弗彰莫爲之後雖盛弗傳蔣公之治績非二公無與爲開二公之芳聲非蔣公無與爲繼後之視今亦猶今之視昔也數十年之後又將有從而譏識之者矣用綴其言而勒之於石


鴻泥軒記

公孫氏主來安人

凡人之情能超乎物之外者方能處乎物之中隨所往而無不自適苟中無所得則物大而我小勿

論華門圭竇鬱鬱焉不可以終日卽堂高數仞椽
題數尺而其繁累益多安往而見其自適也康熙
癸巳秋吳門蔣公蘇齋先生來宰餘邑城垣頽墮
衙齋在荆榛瓦礫中予意公必有不適然者公治
之期年政簡刑清訟庭闕寂公餘之暇慮讀書游
息之無其地也乃就署中菜圃之旁結茅三楹凡
一椽一瓦不費民用而自給焉因縣治爲白泥司
舊地取坡公雪泥鴻爪之句名曰鴻泥軒更懸東
坡海南時笠屐圖於軒中展拜而俎豆之自作詩

以紀其勝予數造請業見公掃地焚香風流翰墨
日以著書自娛雖處窮愁抑鬱而其中有超然於
物之外無往而不自適者方諸坡翁白鶴之下載
酒之堂同爲偶然鴻跡之留而已嗚呼公其坡之
後身也耶爰書之爲鴻泥軒記



餘慶縣志

八上末

內閣文庫		
番號	漢	14840
冊數	6 (4)	
函號	史 189	13



銘

柳子厚墓誌銘

唐韓愈

其名至京師而復爲刺史也中山劉夢得禹錫亦
在遣中當詣播州子厚泣曰播州非人所居而夢
得親在堂吾不忍夢得之窮無辭以白其大人且
萬無母子俱往理請於朝將拜疏願以柳易播雖
重得罪死不恨遇有以夢得事白上者夢得於是
改刺連州嗚呼士窮乃見節義今夫平居閭巷相
慕悅酒食遊戲相徵逐詡詡強笑語以相取下握

手出肺肝相示指天曰泣涕誓生死不相背負真
若可信一旦臨小利害僅如毛髮比及眼若不相
識落陷穽不一引手救反擠之又下石焉者皆是
也此宜禽獸所不忍爲而其人自視以爲得計聞
子厚之風亦可以少媿矣

謝疊山摘本

平播銘

井序

明江盈科湖廣

辛丑春不佞科以使事弭節黔中則聞黔父老談
師滅播其功甚鉅其爲德於黔甚厚以爲中丞郭
公與直指宋公再造我黔非尸祝貌祀無以稱黔

人報塞之意而余楚人也乃其佩德有不下於黔
之人者無以爲報則請撰黔師平播銘與黔父老
共圖永久比於江漢歌棠峴山勒石可乎按播賊
之始發難也禍中於黔凡數四初犯飛練次犯東
坡又犯龍泉黔之將帥爲魚肉者二十人健兒壯
卒殲戮幾盡元元之血塗草野骨掩蓬蒿者不下
萬餘中丞郭公受推轂之遣自江以東星馳而西
至則覈所部兵不滿五千帑金稱是乃焦勞愁思
語宋公曰無米求炊巧婦不能將柰之何宋公曰

爲今之計但有上告天子請兵食救此一方民耳
用是披肝瀝血連疏當宁蓋情切於諸葛泣慘於
包胥廟堂之上爲感動請兵予兵請餉予餉又不
足而請益兵益餉又復與益兵餉俱集公與宋公
進在事諸大夫晝夜籌畫慎擇將領宿重兵省會
其餘險要多寡分布根本旣實分遣所部凡八萬
人屬總戎李公統率以往援桴而誓曰毋怯毋躁
毋中餌毋蹈伏毋殺降毋競功忠赤所激三軍用
奮踴躍前驅一戰而抵旋水再戰而拔高固烏江

受挫士氣彌勵及三戰四戰以及八戰連破險巖
直抵賊庭楚蜀之師十道並入賊遂計窮雉經以
死妻子盡俘蓋出師僅六閱月而楊氏八百年宗
社蕩爲丘墟二千里之地之民久染瘼風者一旦
裂爲羶邑比中原版圖之域天子藉以抒西顧之
憂旣已銘功鐘鼎紀績太常矣方其功之旣成也
人但知二公成功之鉅而不知二公成功之難但
知二公之爲功於黔者與楚蜀鼎而不知二公之
成功於黔者其難於楚蜀不啻倍蓰但知二公之

功黔民是賴而不知二公之餘功其覆庇楚蜀者無以異於覆庇黔中夫其知者不待言矣而其所不知者何也蓋自飛練之後黔中銳卒盡創於播無復敢鬪之志則振起之難又播之與國夙苦漢文網而世與爲媾則解散之難此其難難在黔若夫廟堂所責脩者三方之師併力滅播而楚號大國蜀號沃野物力之饒足給軍興又武昌成都去播千里我得從容定策不虞不脩黔則彈丸之地居恒仰給楚蜀有如稱貸而貴筑去播不二百里

賊朝遣一將越宿抵城下腹猶果然是剝床之災也夫黔與楚蜀所肩之任同所挾之具異安得不難公與宋公不以其難者自諉矢心發憤吐一腔之血以激三軍之師自大將至卒伍靡不感泣願効死命二公復相與議曰將士用命而又有爲賊用命者與國是也於是曉以大義悟以赤裘使賊之與國不爲賊用爲我用不但形爲我用實心爲我用而後我之神氣日張賊之膽氣日奪區區彈丸貴筑不敢一矢相加蓋黔乃能自完而因以其

自完者摧播無完播矣顧黔雖彈丸乎而於蜀爲內援於楚爲西蔽黔旣完矣賊欲引兵而北則虞黔之搗其穴出而無與歸也而不敢北欲引兵於東則虞黔之尾其後徑而不可繼也而不敢東賊不敢北乃有完蜀賊不敢東乃有完楚夫能完黔又能完蜀完楚茲其功豈獨黔人擅哉假令公與宋公無術以振積衰之士而令韓魏之交合我乃外樹敵國內殺兵勢且無完黔無完黔而賊且突而北突而東又安得有完蜀完楚如今日乎此何

但黔父老鰥鰥然懼報塞之難是蜀與楚何人不當報塞又何人報塞萬一也者卽科處楚西徼所謂得安釜鬻與今日擁車騎黔中儼然漢官威儀非仗二公之功其能然哉則夫譔銘鐫石其安能已是役也中丞郭公直指宋公實尸之總率三軍實惟元戎李公應祥而左監軍楊憲長寅秋右監軍張少叅存意以及藩臬偏裨守令以下不可勝紀要之羣材集大廈植夫惟公與宋公慎簡而審使之併力濟事克襄大亂豎茲偉伐其詳具中丞

叙功疏中科特志其大者因拜首稽首而爲之銘
銘曰播賊欺君亂天紀敢奮螳臂稱禍始綦江流
血成海水貴陽三鎮被屠戮十家流離九家哭全
黔危若几上肉郭公單騎來秉節日與直指共商
決誓滅此賊甘飲血一腔忠義激三軍怒氣勃發
勝風雲各務斷脰除妖氛烏江青蛇號天險百二
重關次第斬賊勢窮蹙如被魔闔門縱火雉經死
纍纍就縛妻與子捷書飛報龍顏喜荒徼一日歸
職方介鱗盡化爲衣裳乾坤重闢日重光麒麟合

入功臣譜英雄鬚眉照今古伏波銅柱安足數吁
嗟乎伏波銅柱安足數

木根坡修路碑銘

并序

郭子章

見前

萬曆庚子播平辛丑詔割潛潭餘慶等司屬黔
卯春二月余以經理斯郡由龍泉入潛潭道箐口
木根坡山厲者率者如堂如房車不得軌馬不得
馳余病焉檄劉憲副文光稍披其險塞治爲夸陸
高高下下計人可步騎可達而令把總李祐專董
其工始於三月三日已於十有一月長至爲途四

千四百尺有奇爲工百二十七日有奇費錢二萬二千貫有奇工峻來報命請勒之石余紀其歲月而爲之銘曰木根坡山如窠路透迤行蹉跎昔夸區屬牂柯庚子夏始平播發弓矢戢干戈癸卯春余經過檄觀察治爲途叶唐何音駝剪荆棘批蹉峩車方軌馬如梭步者笑負者歌臣奚力出天家叶居何音勒爲銘告行者叶膽何左平聲脫夸習卽中華億萬載永不磨

中華山碑記銘

有序

孝廉楊光夔

邑人

中華山之開始於明神宗之時荒蕪數十年矣自巳亥歲醒板禪師以創中華之引問余越壬寅復以建幽冥鐘疏爲請不數年而厥工告竣是歲秋七月朔一日僧某以碑銘垂後之說語余余以山澤癯人雖中華名勝未及登臨何可以聞飾見也僧曰居士常以文創始矣獨不適觀厥成乎余因思中華數步可至也落落裹足不幾貽笑名山耶遂以約僧登山作記焉朔八日與吾從弟光宸過乾溪循山麓層旋而上遙望鬱鬱嵐光層層雲樹

樓閣聳空中若離天尺五也少焉登其堂色相森嚴洞天福地何多讓焉噫嘻昔者中華之創而淹沒者山靈其有待乎今日中華之因而不振者佛慈其乃眷乎前後兩殿獅吼象遶左右雙樓晨鐘晚磬丈六金身放大光明諸善人知識咸以田畝給其焚獻焉維時僧人煮茗芽饌伊蒲乃曰年來結構如是可以傳矣因爲序而銘之銘曰華山之巔上凌霄漢無遮法界無垢天關陟旋曲徑居區平原寶閣落成金身妙現皇皇峻嶽派接西天隱

隱叢林競美祗園山靈呵護熬溪奠安願佛常住於斯萬年

一經堂銘

并序

前人

庚子秋余嘗建亭於室之東隅以優游閒適自謂樂天安命何嫌於容膝蝸廬乎越癸卯兒曹頗能肄詩書諸侄俱可勵德業因小建此墅以爲課兒所焉茅草雖非精舍而戶牖挹翠岫之嵐光庭堦收綠疇之野趣几案琴書雖隣於郭而不擾近於市而弗襍油油然離塵囂而親聖賢穆如也一

日諸子執經問難漸受範圍因進而教之曰余効先民不能遺汝曹之金止教汝曹一經於此處耳汝曹勉乎哉故顏曰一經堂明經無邦教子有地也因是以銘焉銘曰斗室在林維淨維清粗樸小構不飾不文面山依郭匪野匪城聖賢內晤花卉外迎閑先啟後敬業樂羣養不中而不才豈朝誦而夕喏登斯堂也幸無嘲乎一經

論

牂柯論

漢范曄

初楚頃襄王時遣將莊豪從沅水伐夜郎軍至且蘭桡船於岸而步戰旣滅夜郎因留王滇池以且蘭有桡船牂柯處乃改其名爲牂柯牂柯地多雨潦俗好巫鬼禁忌寡畜生又無蠶桑故其郡最貧句町縣有桡榔木可以爲麴百姓資之公孫述時大姓龍傳尹董氏與郡功曹謝暹保境爲漢乃遣使從番禺江入貢光武嘉之並加褒賞桓帝時郡

人尹珍自以生於荒裔不知禮義乃從汝南許慎
應奉受經書圖緯學成還鄉里教授於是南域始
知學焉

平越府論

巡撫 衛旣齊 山西

按府屬率皆唐播州之地昔劉禹錫貶播州而柳
宗元以爲播州非人所居蓋以其地爲苗獠之所
錯處驪歸之所窟宅其習俗固異於中夏也唐乾
符初南詔陷播州楊端應募領兵復之諭以威德
縻以恩信自是以後楊氏世襲其職爲國藩翰元

大德初平伐等苗未附播州宣撫司楊漢英請討
之明初楊氏亦嘗有功仍受世職歷八百年至明
萬曆中播酋楊應龍倡叛陷平越飛練殺都司楊
國柱等平越遂爲戰爭之地其後用師連年破高
固及青崗固渡構皮灘河皆用平越兵力而楊氏
累朝世職不祀忽諸於是始分播州之地建立府
治統以王官而兵革乃息矣昔洪武初播州楊鏗
納土明太祖曰播州西南蠻之地自古皆入版圖
供貢賦但當以靜治之苟或擾之非其性矣斯言

誠馭蠻之長筭乎

紫池論

巡撫田雯

山東

黔之稱紫池不知何始嘗閱潯州志有貴縣漢爲廣鬱唐爲貴州有水出於鬱江長而狹色如紫練其出不常分兩派自縣門下流者必擢賢守令或出才人自縣上流下者應在僚屬名曰紫泉紫泉自在粵西與黔何與顧以貴州之名相類而謬引以相加也耶然潯志又云府城北江爲黔江而南寧志亦云城西南有江左右流至西合爲一入橫

州曰鬱江卽夜郎遯水梧州志又云城南大江漢武使馳義侯發夜郎兵下牂牁江卽此則鬱江也遯水也牂牁江也一而已矣紫泉雖出粵西而實源於鬱江謂黔爲紫池其亦可也母亦志粵者因貴州與黔江之名而亦謬引黔事歟今黔獨稱牂牁間稱夜郎夜郎乃播屬桐梓縣播與貴陽僅隔烏江一綫而平播之後割其半以隸黔今之黃平潛甕餘慶是也其稱夜郎也又何不可哉總之黔近粵則稱紫池猶之近播稱夜郎地固犬牙錯也

第不當名之曰紫池仍之以紫泉庶名實相稱而易曉耳

序

豐城徐憲長卽登序

郭子章見前

一時三大役西哮東倭而播最黠同事三大省左楚右蜀而黔獨約夫以約力當勅敵時事無艱於此者聖天子方厯南顧簡相奎氏授之斧鉞而倚以掃犁之寄藉第令拮据足食之計以不隕武功亦已難之而况能修文事乎乃今取黔草讀之則見其光焰萬丈金璫琳瑯如入錦繡萬花中接應不暇其奏疏之忠藹似陸宣公其策論之才識似

賈太傅銘若陳后山之有法度誅若韓昌黎之多
情思而詩之探囊嘔心於李長吉不啻似之此皆
夫人之所擅長於平時者而公獨得之於有事之
日至若告諭儼巴蜀之文誓命凜商周之體而奏
凱露布卽于公異所爲收復京邑能使德宗聽之
而感泣者無以加焉則又夫人所假手於人者而
公獨親自揮灑而有餘且所指授方畧控險阨要
如身所嘗經料敵制變若持券取責一一符契不
少爽卒之巢覆種殲克奏蕩平之績蓋所謂有用

文章也夫以時若彼爲文若此自非其養之素豫
而挾之素弘安能神間氣定於臨戎之際以辨此
哉
利器解序
予從里中受討播命俶喪七日行橐中止攜有閩
人所贈倭銃九龍等銃數十門入黔自督匠造於
署之東園而未有佳匠又其製不甚猛烈大中丞

三原溫公自長安函利器解見示乃其季將軍編
所梓者予卒業之如受黃石公又虞紙上威遠圖

中迅雷人猶謂畫餅也乃以其所製地雷三捷萬勝等器見遺予拜受之如開豐匣急令匠工製之未幾公又虞器卽具而撥機堤硝者或匪人也乃馳其素所善擊裨將王眞等來於是火傳藥噴星門鑽架之類無不具脩會黔數捷後圍賊於險固乃以公利器授故監軍楊義叔分授諸將東擊西突若枉矢騰雲飛槍摧山雷駭電激落撓槍而殞天狼也固破賊滅利器之力居多歸而藏其書於名山鮮其械於武庫昇日者何以使人人知是器

利乎命重鑄之爲論著其說如此

疾慧編自序

前人

予入黔三年矣始討夜郎繼討皮林封豕長鯨東奔西吼劒躍弓翻風毛雨血其疾在兵大兵之後繼以大稂斗米五百錢玉屑糠覈民并日不一飽菜色載塗白骨填壑其疾在荐饑民死於兵死於饑冤魂未舒鬱而爲厲變魑晝嘯猶狂夕現呻吟於牀第而泣淚於原野至不忍聽聞其疾在疫凡天地可憂可懼可愕可怪之事無不脩嘗夷狄患

難兵戈生死之區無不經歷總之曰疾疾予署前
爲王陽明先生祠予日坐其中因思先生在龍場
雖云困厄未若予十之二三而悟良知以啟聖鑰
予之憂悸十百先生而竟無所悟以窺先生之藩
籬則甚有其蕙故雖當馳戈擣弓之秋發棠施藥
之日與二三子講明先生之學無日以忘久之得
若干條三年疾疾僅窺一斑二三子請剖剗之強
名之曰疾慧嗟乎疾則慧不疾則不慧中人之性
也今賊平矣年穀稍登矣民病少甦矣以予之顛

蒙能保其常慧乎管仲曰願君無忘射鉤臣無忘
檻車子與二三子願無忘庚辛三疾

疾慧編序

知縣胡仰極 貴陽

吾師青螺郭公理學命世來撫吾黔西討夜郎東
討皮林拯飢拯疫焦勞萬狀而韜鈴彌練經濟彌
恢終日造次不懈存省日與羣弟子講性命之學
和氣藹然滾滾不竭一日出疾慧編以示極受而
周覽則讚曰嗚呼小子寧忘庚辛三疾哉鐔茫鉦
響菜色饑聲依然瞻睽處安若危含哺憶枵仗師

之仁只於疾中獲蘇未暇禮義也吾師獨於倥偬駭怖之中挾精湛奧妙之旨豪杰所屬屬弗遑者猶以游刃攄心得豈非中會太極性情葆鬯出才理事不鑿於氣者哉惟綦沈潛故綦游泳綦澹泊故綦敏健是以夢之愈閒确之愈坦也夫行非素位不真言非體認不切處非當家新豐雞犬耳今公經畧在邊陲濺澤在闔閭陶冶在土類而獨得在淵微測之洞洞若涉瀚海而靡窺其源者是編特感觸之一二耳

郭中丞集序

明庶子丘禾實新添

余讀中丞諸草見公之貌讀諸草中論學書見公之神乃今讀黔草而後知公之貌之神之不可測也夫文章家雕龍繡虎之業出而理學二理學家探玄索珠之鍵啟而事功二非自爲二也好竒者浮好修者泥浮者矜已泥者滯物是以詞人往往有遺行而儒者或斤斤守咫尺之義無所見彼於所謂不二者未數數然也余觀中丞爲古文詞意氣在秦漢上顧其沈雄渾樸爲鼎爲彝又似三代

間物苔封蠹蝕而精光不可磨滅至其論學多發
抒所自得不拘拘於門戶繹之如飲醴醕令人神
醉如得水於諸而取火於燧無其形而有其實蓋
知公無意鉛槧而徒以緒餘發之顧其用物弘而
取精多其能以古文辭爲鼎爲彝則亦其萃九牧
之金而成也故以此謬謂見公之貌而併見公神
乃公諸草成時治有續才見之簿書功有成才見
之平世所謂道隱於小成言隱於榮華未有若黔
之役一出而嘯風鞭雷須臾底定者自今觀黔草

中若奏諫若公移或出民於湯火或玩敵於掌上
或倉皇而應一時之卒或鄭重而周百年之防筭
無遺籌計不再慮又何其以縫腋之思斧藻之業
談笑而當虜也意者公好奇而不爲浮好修而不
爲泥掾不二之精而禦無窮之變故於黔若承蜩
然噫此余所稱讀黔草而後知公之貌之神之不
可測也

楊母白夫人壽序

錢邦芭

見前

古天子重養老之禮敬老爲其近於父所以教孝

也男女一理禮敬高年不及閨中者非闕也婦人德化不出閨壺所以別內外也然隱而愈顯久而彌彰故凡家之綿遠昌大者非獨其夫子之教先也蓋亦內德茂焉辛卯春余因孫氏之亂避地餘慶得與楊氏昆季遊大楊世茂醇謹博雅小楊先茂英卓伉直二難哉而諸子侄來從余遊彬彬然先後七人皆孝謹友愛讀書循禮有聲黌序邑人無不稱其濟美余亦且訝之豈黔南山川靈秀獨鍾是門耶及訂交既久講通家禮而後知其母夫

人之德培植其後昆者至深且厚也母夫人幼歸楊諱再亨爲婦相夫子事舅姑孝敬備至後孀居五十載訓督諸子必以義方非禮之言不聞非禮之行不見用是大小楊先後中明經選大楊奉母隱山中不仕小楊仕府祭酒署馬湖府承事有治聲以母老棄官歸一堂色養怡怡愉愉家門相化達於閭里甲辰夏余歸江東過草坪楊氏之廬拜別母夫人時年八十矣丰儀端謹進退可則余乃嘆楊氏子弟彬彬禮法之盛固母夫人之啟祐者

有素也虞氏先觀於釐降周家種德於關雎有以哉有以哉

送蔣樹存之官餘慶序

舉人儲大文 宜興

蔣子籤注知餘慶徐子觴之酒半蔣子曰此唐播州羈縻地也輒舉柳子厚語儲子曰播山谿號絕奇惜夢得不果刺播又惜子厚不果以柳易播庸俾粵諸山谿顯而播獨逸也

國家文治熙融薄海外猶內地滇黔直不翅畿輔假令夢得生此且不願易去播子厚又無辭而易夢

得雅不願易之播也子工詩又雅類子厚夢得且庸知子厚夢得果刺播詩不彌工耶子校勘冊府近且載載籍以行斬誤一書脩黔中掌故且用顯播諸山谿而無俾獨逸然則子之地注餘慶也蓋甚善急舉觴慎無舉子厚語徐子曰然斬偕上考書胥一再期達矣爰書爲序

書學蒙求序

蔣 浚

自包犧氏畫八卦造書契皇顓製字取天地法象之端人物器皿之狀鳥獸草木之文日月星辰之

章烟雲雨露之態而爲之初無工拙之意於其間也迨周官保氏掌養國子以六藝爲教次五曰書書有六義書由文興文以義起學者世習之秦滅典籍廢先王之教變古文爲篆文變大篆爲小篆又變小篆爲隸爲八分爲楷爲行爲草爲真行爲真草爲章草爲正草廢刀用筆廢竹用帛廢帛用紙世運遞變書學繁興故楷草之法至晉代羲猷有唐歐虞顏柳輩始傳點畫曲直波磔向背永字八法之說顧其人必正誼明道而于書乃通幽入

微揚子曰言心聲也書心畫也聲畫形則君子小人見矣余嗟夫黔俗荒陋卉衣椎髻之徒刀耕火耨之不暇間有秀異之士時藝之外家無載籍之儲學少明師之授求其爲通人志士能攷信於六藝研精翰墨者亦難矣余宰黔陽五載旣設義學率子弟之有志者朝弦而夕誦而猶慮書學之非急務而可忽也爰集前賢學書之譜決擇其簡切者孜孜而訓誨之審其用筆之斜正而卽得人心之出入焉餘陽之士果能興起于學不狃于習俗

不安於固陋心慕手追與晉唐名賢相揖讓於千載之上毋失周官保氏掌養六藝之教是亦法古先以開來學之一事也爰書於簡端而勉之焉

考

莊躋牂柯考

郭子章

見前

據司馬遷稱莊躋范曄後漢書云莊豪據馬端臨說頃襄王爲是威王爲非莊豪爲是莊躋爲非然馬氏又云豪卽躋也考范書與註無豪卽躋之說不知馬氏何據雲南通志又曰豪躋裔也則又不知何據賈誼賦曰謂跼躋廉兮李奇註曰跼秦之大盜躋楚之大盜此以躋爲盜之始也考遷固范曄並無此說顏師古註云躋音居畧反使躋爲盜

何不一引証之又不知李奇何據夫陌柳下惠第
魯人甚明奇以爲秦人其疎可知又惡知不以陌
故連及躋耶正德間雲南欲祠躋以此故不果尚
書王元美云楚有兩躋一莊王大盜一莊王裔孫
將軍平滇自王者此又不知何據然亦足以明王
滇之躋爲非盜矣予謂遷固旣訛頃襄爲威王又
惡知不訛豪爲躋故作滇黔志者當從范氏莊豪
爲証又牂牁二字史記作牂牁班范二史作牂牁
異物志曰牂牁繫船杙也韻書曰杙柯郡名通作

牂又作牂牁通作柯近有作牂牁者直音曰牂音
作牛肉重千觔牁音哥罷名非之非矣當從兩漢
書書牂牁爲正

牂牁江

巡撫田雯

山東

漢武置西南三郡一爲牂牁牂牁者繫船杙也華
陽國志稱楚頃襄王時遣將莊躋伐夜郎軍至且
蘭秣船於岸步戰滅夜郎後人以且蘭有秣船牂
牁處乃名其地爲牂牁史記云牂牁江廣數里出
番禺城下後世求其地不得遂以爲在定番城南

源出蒙潭流入破蠶至泗城州通番禺入南海而郭青螺有引漢書郡有牂柯江通番禺城下光武時牂柯大姓自牂柯江入貢之語以實之不知定番雖通粵西而番禺則屬廣東其城南之水僅僅一綫時斷時續未聞有以舟楫行者何以云數里之廣乎而當時大姓又何以由此入貢哉亦未詳於志文之故耳按且蘭卽今之遵義夜郎卽今之桐梓則牂柯江卽今之烏江自遵義過潛潭至印江入思南城西之巴江水其地有牂柯城舊址漢

牂柯守陳立據思邛詔夜郎王將兵破之牂柯舊治旣在思南則牂柯之江宜在思南而其桮船之處不在巴江水亦必在印江蓋印江與潛潭接壤而潛甕則且蘭舊地桮船於岸或卽此也若定番則去且蘭尚數百里且隔烏江何遽桮船而步戰而牂柯大姓又何以舍楚蜀大道紆迴兩粵然後入關以致貢哉然則史記之言出溯其源也漢書之言通論其流也後之人旣不詳於本文又不明於道里是以有此誤也

刺梨

前人

野生夏葩秋實幹如蒺藜多芒刺不可觸葩如茶
蘂實如安石榴而較小味甘而微酢酸澁如棠梨
母乃謂是歟食之可以已悶亦可消滯漬其汁煎
之以蜜可作膏正不減於梨楂也然亦有貴賤辦
之單者土人以之挿籬而代槿胎之重者名爲送
春歸春浚吐艷大於菊密萼繁英紅紫相間而成
色實尤美園林植之以供玩黔之四封悉產移之
他境則不生豈亦畫疆之雉過淮之橘耶

藝草

前人

藝草卽藝麻藝音燭黔屬間皆有之生於籬落谿
崖間葉類麻多毛刺螫人手足腫痛至不可忍杜
工部所謂草有害於人其生彌道周者是也不知
者往往爲其所中比其毒於蜂蠆蝎蝮殆不爲過
鉏而去之置諸水中勿使滋蔓所以遠惡也然土
人采之沃以沸湯則可已瘋亦可肥豕世固無棄
物哉以章子厚而治軍以韓侂胄而傳旨非盡無
濟顧用之者何如耳醫王云是草堪醫詎不信哉

羊桃藤

前人

吾嘗讀陸元恪之書而未之識也一日將治南堤患其石之不固匠氏持梟蔓至白余曰用此之汁以合石粉膠漆不啻也問其名則爲羊桃藤因憶陸云萇楚今之羊桃也葉長而狹花赤紫色其枝莖弱過尺引蔓於草上今人以爲汲灌重而善沒不如楊柳也近下根刀切其皮着熱灰中可韜筆管爾雅云萇楚鉋芑羊桃也一名鬼桃鄭箋云萇楚藤生子赤狀如鼠糞亦名鼠矢兒童食之又云

鉋芑之性始生正直及其長大則其枝猗儺而柔順不妄尋蔓似又與陸說左矣陸佃云萇楚今羊桃白華子如小麥葉與實皆似桃故有桃之號也本草云羊桃一名羊腸一名御戈生山林川谷及田野蜀本圖經云葉花似桃子細如棗核苗長弱卽蔓生不能爲樹多生溪洞根似牡丹一曰有兩羊桃一種華實皆連理故詩以刺淫焉此但言其花葉子實根蔓耳而未及其梟之用也陸氏亦但謂其可爲汲灌可韜筆管耳而未及於固石也夫

石堅確而畸零乃以柔蔓之液遂能締合而成交
則信乎連理之契無不投宜詩人之見刺也獨念
牛羊之用多矣既以名棗又以名桃而果蓏之細
又曰奶櫻桃之別爲牛桃茭之名牛蘄薺之名牛
蘄終之名牛棘藿之名爲牛蘄義雖無取而其稱
則怪矣故箋之

藥弩

前人

黃帝作弩其臣彘牟作矢弩怒也其柄曰臂鈎弦
曰牙牙外曰郭郭下曰懸刀合名之曰機言如機

之巧也其矢則有絜矢鏃矢增矢蒺矢庫矢之不
同矢指也言有所指向也其體曰箠其傍曰羽其
末曰括括傍曰叉總名之曰箭前進也盛矢器曰
匣以皮曰箠織竹曰竿木曰步叉以箭叉於其中
也書曰若虞機張往省括於度則釋弩與箭之謂
也廖中爲秦昭王作白的之弩以射白虎畢通爲
安陽王治神弩以射粵軍武鄉侯損益連弩作元
戎弩一發十矢以拒魏兵李陵千弩俱發昔之用
弩者多矣然未聞有藥矢也耿恭守金鑪城以毒

藥傳矢傳語曰漢家神弩其中創者必有異因發強弩射之中矢者視肉皆沸於是大驚此藥矢之所自也黔中諸苗皆用弩而其矢必傳藥治藥者爲補籠之狎家謂之補籠藥采雜毒物碎而煎之以爲膏鷄犬婦女及白衣生人皆不得見凡七日比成以藥名勦者點之塗諸矢插之步又中懸於火側時時溫養之使勿敗然後可以傷人中者與拔矢者皆立斃又有苗能醫之用利刃自頂至踵寸寸割之使血出用口吮之血盡則以他藥敷之

始可生勦藥產粵西類勾金皮不得勦則毒不驗
鬻勦者多粵西猾盜須禁除之

蘆笙

前人

釋名曰笙生也象物貫地而生以匏爲之其中空以受簧是爲匏笙女媧氏之笙也記曰絃匏笙簧黃帝命伶倫截嶰谷之竹雌雄十二以象鳳皇之鳴形似鳳翼故又曰鶩笙爾雅曰大笙謂之巢小笙謂之和又云笙之大者曰竽則又可稱竽笙矣鹿鳴之什曰吹笙鼓簧笙必有簧猶喉之有舌也

語曰調鳳管炙鵞笙簧必炙而後鳴物必煖而後生也古之善吹笙者王子晉緱山之事杳矣不意得之蠻荒每歲孟春苗之男女相率跳月男吹笙於前以爲導女振鈴以應之連袂把臂宛轉盤旋各有行列其笙截竹爲管者六通其節而櫛比之長者四尺以次而殺短至三尺參差若羽竅其短者六孔以達於長以指捫之若撚笛然而又截竹徑尺衡管於六管之衝而吹之一呼一吸聲若駕鵞之嘹漢每至看場旣圓歡情欲浹則遲其聲以

媚之長管之上冒以匏短管之中置以簧簧用響銅爲之恒用火炙亦古制也前人詩云管清羅袖拂響合朱脣吹人情應節轉逸態逐聲移苗俗固不嫻音律而其應節之轉逐聲之移則又善於形容矣余覓而眎之其狀如此

按楊升菴集宋乾德中牂柯入貢名見詢問地理風俗令作本國歌舞一人吹瓢笙名曰水曲卽今之蘆笙也

三堰考

蔣

深見前

餘慶縣河水發源於縣之西南一百四十里黃平州界內地名黃沱暖水上有大山林木陰森週廻數十里昔爲土人避亂之處山上懸崖壁立千仞崖半洞穴如臍寬可二十餘尺水自洞中流出飛簾捲雪直注崖前下則層岡伏虎窠嵒嶙峋劈分左右水自岡右流者由黃平出鎮遠入楚自岡左流者由餘慶經思南出蜀昔人曾鐫楚蜀分江四大字於崖上岡左之水出洞猶細經流浪洞平溪百數十里合兩岸旁出山谿井泉以至餘慶始滙

而成河宋元以前無有問津者明萬曆二十八年楊應龍踞播叛逆黔撫郭青螺先生提師進剿道經此地及蕩平之後改餘慶白泥兩土司地爲餘慶縣建立城池招撫漢苗開墾田畝經費賦役悉其綜理規畫制度靡不詳盡因見餘城沿河上下七八里內田數百頃並無溝渠蓄水灌溉倘雨暘不時必致乾暵於是相水勢之高下築河爲堰深溝高坎於康寨之上截河築堤名雷公堰其水灌康寨上里麥園等處田若干頃又於赤土之上分

河築堤名赤土堰其水卽灌赤土田若干頃復於上里截河築堤名正官堰其水灌龍家溝以下至白馬廟一帶田若干頃此餘邑三堰開創之始也夫截河流以爲堰引堰水以入溝放溝水以灌田俾餘民獲免旱魃之災前賢之澤長矣三堰中惟赤土堰爲田較少需水不多稍爲開築卽可引水入溝最易爲力且修築一次可保數十年無虞若雷公正官二堰田畝旣多溝高河下非橫河斷水則堰水不能入溝其用力較難而且一遇水漲卽

遭崩塌其修之之法雷公堰田戶分一十八班正官堰田戶分八班先丈量河面照畝均分尺寸刻期完工水旣入溝先將溝量明丈尺仍照畝分修其溝身務挖寬濶溝坎必培高厚使水易流通其放水入田仍照原分之班每班照舊冊原定先後日夜時刻灌注而後受水均勻田可普濟柰人之勤惰不齊田之遠近不一戶之強弱不同若聽民自修鮮克有濟者惟每年入夏後倘遇天畧愆陽本縣卽委捕廳差督堰長嚴催各田戶上堰修築

仍不時親往稽查勤惰示以勸懲及放水入田尤
嚴豪強不遵舊例與夫細人偷挖之禁是小民室
家之計無一不煩在上之焦勞此歷來三堰修築
之務也但與其修築於年年孰若一勞而永逸盍
令有田人戶照畝公捐僱募石工砌堤安閘水溢
則啟閘洩溝水以入河水竭則閉閘蓄河水以入
溝人無歲修之勞田獲屢豐之慶則其功不將與
青螺先生後先媲美耶謹將開堰之由與歷今修
堰之法並叅末議具述於右以告後之博愛君子

云

傳

蒲村老農傳

錢邦芭

見前

蒲村老農隱者也年五十餘來居蒲村蒲村故黔地俗儉陋無文老農安之其地山峻而水駛多溪林大竹兩山之間夾一溪可數十畝溪流甚短中有泉十餘處晝夜汨汨故冬夏不竭溪中有柳數百株大可合抱老農於溪邊築茅屋數間臨溪伐木構一露臺曰嘯臺環屋遍植野花雜果題曰偃園取偃年之意也老農破衲戴笠冠蓄琴一蒲團

一簪笠竹杖一每風日晴美則與門弟子輩策杖負蒲團坐古松流水之間掃落葉烹茗嘯歌自適或騎牛過隣叟與樵牧考晴雨課種植時或攜一卷獨坐溪邊磐石上焚香讀之人就視其書蓋周易也問以易理則曰不解人曰不解何故讀笑而答曰惟不解故讀耳於是居蒲村雖久竟無有知之者贊曰噫嘻此其蒲村老農也歟與木石居與鹿豕遊泊然不驚其天其羲皇氏之遺歟夫子曰吾不如老農而老農遠矣

錢邦芑小傳

劉應祁 湖廣

錢邦芑字開少丹徒人爲諸生屢困場屋而詩文與張溥徐孚遠陳子龍艾南英吳易齊名由中翰歷都憲播遷於黔爲孫可望囚繫迫以僞職潔身不屈禿髮爲僧隱餘慶之蒲村與鄭逢元爲方外交門下士執經請業戶屢常滿

國朝開闢黔疆芑乃出湖南卜隱衡山著述不倦康熙九年永州太守劉道著聘修罷志十二年寶慶太守李益陽延修罷乘將及半而疾不起屬其友

人劉應祁成之芑負剛腸饒權畧嚴氣正性遇事
肩荷與人處無失言失色惟疾惡頗嚴爲時所忌
學問淵博尤浚於易詩文下筆數千言立就而在
寶題咏甚富所著有他山易詩二十四卷外史四
十卷讀高士傳六卷古樂府八卷十言堂詩文集
各十六卷史切二十卷詩話二十卷蕉書二十四
卷隨筆六十卷鷄足志九疑志浯溪志各若干卷
後先梓行於世李守賻歸其柩於衡山集賢書院
中

書

與餘慶蔣令書

按察王沛檀 山東

邇來心緒草惡遂令志書久滯案頭今諸兄少清
挑燈披閱乃知年兄史才堪與班馬閒置座也賞
心悅目因不揣固陋而序之並書於左譬如老行
伍不勝甲冑忽見藝勇少年走馬握戈從壁上觀
猶作醜態正不知屬耳目者如何非笑矣臨穎懷
想

答邑侯蔣公書

學正楊昌英 邑人

七月朔日恭奉來諭始知纂修餘志旣已窮搜博覽殆無遺憾矣而殷殷猶採及於先君子之待証錄反覆思維悲感交集夫餘慶建自萬曆庚子至本朝而風氣始開黔荒大闢前此附於郡志率皆畧而不詳向之牧斯土者無不留心民社而志之詳畧闕焉不講曾南豐先生所謂非蓄道德而能文章者無以爲也今父臺恤民愛士撫字之暇留心纂述真具道德而能文章者矣不特餘之山川風土爲之色飛先君子之屯蹶否塞得藉不朽但

愧英之拙滯庸碌俸薄職微不克顯揚大業風木徒傷更淚盈盈其不已也先君子雖泉石自甘而獨能以守先待後爲已任倡絕學於干戈擾攘之際樂貧乏於無求自得之中故其爲詩爲文皆不得志於時之所爲而後序有曰異日者賢哲至止按而正之或許可什一於千百是先君子期望於數十年之前而今始一遇賢侯爲之表微其爲含笑泉壤矢志啣結感可知也遲延方命地遠聽違伏祈矜察

而靜者與心謀噫豈獨在草木土石泉澗之適歟
山原林麓之觀歟蓋天之鍾秀於是 unlimited 於遐陬
也時厥亂離已爲荒墟有僧寶月年過七旬相視
於下曩曩而上閱風霜清潔之况水落石出之情
發大菩提遂募而建斯庵焉自是而頻歷兵燹草
剝欹傾佳景幽况雖不復覩而規模制具卓然猶
存秋之前有僧海成來自九龍山甫任斯刹志存
修葺而勢際其艱時厥癸丑之日邑之父母張公
同駐防李公來遊斯山徘徊於溪澗之間顧睇於

林麓之餘於是洒然而樂也曰佳哉山也沂澗寒
蘿履石而上不剪茨不列墻庶幾乎白雲爲藩籬
碧山爲屏風矣誠哉天之鍾秀不限於遐陬也爰
命僧人造緣簿重修葺欲以培一邑之風水而豎
百年之鴻基也時有楊子湘嵐者侍公而遊承宣
公德全僧請疏於余蓋欲其襄厥成也余其欣然
而樂有是舉焉爰是爲之述其寺之原委詳其寺
之廢興並誌斯山之景之秀而爲闔邑風水之攸
關也願一邑縉紳先生士庶長者或米穀無吝升

斗之捐或銀錢無惜分文之惠或工程無憚胼胝之勞所謂抔土可成其大涓滴可就其深廣幾乎地靈人傑無負乎邑父母命修之嘉惠而培植縣治之美德也云爾

募修學宮引

蔣 澱 見前

蓋聞素王爲立教之聖學校緊造士之原願數仞宮牆或至任其傾圯乃千秋釋奠何由瞻若輝煌惟餘邑之城池開設纔經百載稽黌宮之規制廢興已見三遷厥土低窪忍狂瀾之泛濫維棟蠹蝕

總哲匠以奚施秉鐸者爲之傍徨問遷罇兮安在舞干者於焉跼蹐覩木主之參差勉爾諸生漫說蠻荒之固陋嗟予司牧敢忘聖澤之弘深意思培本之資有藉同心之力果能崇高有日則金龜對峙當開百代之科名丹蘄刻期俾玉笏朝臨必興名世之大儒矣

金龜玉笏餘慶八景中地名

賦

他山賦

錢邦芭

瞻寰區之曠復信山水之離奇乃黔地之荒僻更
聳異而欽嶺旣嶄嶮而陡削亦峭嶮而逶迤余也
忘情塵累遯跡遐陬邁茲異境心契神投闢萊穢
於巖嵒焚荆榛於岵丘嵒嶮高下而畢現崩劣前
後而俱收登椒巔以遙矚覺岨岵之奔投烟雲開
闔以萬狀氣象變眩而莫求若夫崧岫崐崐以艱
陟洞穴合沓而陰尋廻溪潏潏而潰潰大壑奔崩

以懷靈隱窺地軸之維絡邈測天柱之矗撐至於
叢柯偉木干霄礙雲榕樟翹負以飛曳枒栌楚捷
而隱森春花列綺於岍岵秋葉驚霜而換金高霞
華映於戕客朱雲采亂於崑岑獨是奇石磈礧拔
地挿天或矗矗而硃硃或礧礧而屈鬢或橫仄而
硃礧或逆豎而倒懸或龍盤而虎奮或鵬舉而鳳
軒或蛟騰而鴻下或獅怒而後狂叶魚軒切或轟引而
旗導或羽展而翅翩或雲垂而烟斷或浪湧而濤
旋高者遏日下者迴嵐巨者藏谷空者隱潭皺者

膚蹙漏者竅含瘦者骨削薄者殼多散者星落簇
者毛毳仰者如嘯俯者如疑立者如望欹者如嬉
蹲者如怒踞者如思揚者如舞抑者如企端者如
拱斜者如窺前者如待後者如趨聯者如布斷者
如虧尖者如刺利者如刳既戛斲而巖薛亦窺礧
而嶮峩叶魚羈切况齟齬而曲嶮又巧妙而因依抑且
松檜叢倚栢杉掩映篁筠疎密以相間花卉參差
而互襯薜衣斑蝕而綴蒼木根盤嵌而凸勁玉膏
涵毓而甘香石髓凝結而精潤况復淵泉迸湧流

澹成河既汪洋以灑滫亦欲濺而迴紆兼曲汀而
斜渚更危嶼而淤瀦加之高柳叢生於浩淼枝柯
披蔭於洪渠荇藻絲牽而帶續芹蔕針刺而劍舒
禽鳥間關於林杪鳬鷺泳唼於蒲菰連峯倒影於
波底懸崖挿根於水隅以至洶澌澗瀑石折崖迴
穴鳴竅答巒傾岫摧魚鳥騰躍而莫定柯葉浮盪
而橫排山因水而幽窅水得山而迂迴維山有亭
名曰拜石斲木結茅依林傍窟據岵岵之巖從當
砢砢之岑岵砢砢拱侍而碁羅砢砢硲硲以陡崱

况復褰烟佇嵐洗雨伴月時探奇而入隱時伐虛

而剔骨雲根倒灑夫珠泉砢脚橫穿平木甲

叶吉
協切

維水有舟名曰怡受一葉浮波清流獨漱淥淪漪

而下上掉苔萍而簇湊遡輕漪而織影盪素瀾而

破皺涵嫩綠於霄光挹柔碧於空秀月采沉璧而

耀金雨痕滌沫而漂漚

叶鳥
侯切

蘭橈宛轉而夷猶布

帆飄拂而迤邐維山之陽南望鰲溪山幽水繞泉

石多姿旣峴峴而明麗亦嶺嶺而舒徐盼立鐘而

接招隱望洞鶩而訪石雞登峯西眺山曰五雲千

巖崦監萬壑巉溪窠巢仰瞻而神悸磳戶俛瞰而
骨驚鵬鶚歛翮而莫度狢獠援蘿而懼升非禪棲
之修侶孰縋級而遐登厥峯之陰山名佛頂杉溪
環帶清駛絕影嵒磔窳穽而難躋巖嵒嶙嶙而奚
騁名刹焜耀於危巘鐘鼓響傳於絕畛樹駐曦而
虧耀巒障蟾而蹴景石磊砢而層疊泉瀑注而瀉
井西南遐矚潛水如綫庵曰西來塘名古練當水
轉而山環亦村古而林舊幽人於焉結契賢士或
爾凭脊環山百里萃茲名區龍潛鳳舉霧隱雲遊

叶羊
朱切

明哲晦跡而耕牧英流韜采而漁酷乃復溪
宵歌嘯詩酒歡娛聲林隔而遙答氣谷轉而潛呼
於是雅尚相憐淪落爲疚朝夕過從味親蘭臭風
雨無阻於昏冥歲月雖賒而猶邁時登高以遐想
或聯袂而紆遲時啣觴以遠望或白眼而移時當
唱和之相得每感慨而淋漓何諸子之高尚矢肥
遯以相期况山水之可樂奚荒寂之自疑且竒文
之共賞質今古而無欺復品行之修潔實風流而
可師吾將托此以終老造物於我其何私

柳湖賦

前人

他山之麓泉十有九或涌沙穴或瀉石口或出土而散珠或挂崖而滴乳叶忍九切并流合注循溪溢渚汪洋停蓄滙而爲湖何綠楊之叢生遂披拂而蔭撫旣參差而位置亦離合而密疎西川道人是吾師友峩睂自號題湖曰柳每相過而止宿必酣暢於詩酒緬茲湖之風景洵幽異而匪耦若夫春光麗媚珍禽和鳴桃杏嫣紅於曲岸卉草茸綠於芳汀泛宵波之明彩飛曉月之澄英柳絲駘蕩而牽

拂輕舸容與而迴還

叶松倫切

遡落瓣於水面逐飛絮

於潏紋時當溪夏新綠在林濃陰落翠修篁曳青

荷菱被浦而香越蘅杜繞嶼而芳勻鱗甲游泳於

蘋浪鳬鷗浮沒於輕津時停橈於溪陰攬柔碧於

葱菁映嵐霏於枝影依崖石於流連

叶離珍切

方涼颼

之侵袂何暄暑之爲煩

叶符勻切

及乎秋爽浩露彌波

激潭芳潔修沼藍拖斂浮雲於天表霽氛霧於山

阿清華濯影於蘭茝素菜漾色於蔓蘿楓柏霜變

於巒障芙蓉露滴於蒹葭

叶居何切

隆冬旣至衆木含

霜山巖洗骨禽魚遯藏千林飛雪萬嶺失蒼冰
亂捲霞幕圍張懸柯際之奎璧集林杪之琳瑯
扁舟獨釣夫琚璐簞笠披擁夫琇珩叶寒剛切破冰澌而
沿遡把珠玉而徜徉方神骨之清映覺皎潔之難
名叶謨陽切至於清露晨流綴珠嫩葉濯濯在蒼芬華
欲絕淡烟一抹杏靄橫波空濛掩映細縠輕羅又
或綠皺苔衣碧皺荇角魚口微吹燕尾斜掠岫影
淪浮而欲崩漪痕蹙損而無泊有時落霞千點上
下青紅丹萼燦爛於澗面綺錦浣濯於波中况復

素月流光水天一碧搖漾空明水壺濯魄一葦凌
泛於渺茫汀渚紆遲而自適斯時也提琴煮茗載
酒放歌今此不樂後將如何歌曰山高水濶魚鳥
不驚清風百世邈矣誰興又曰逞者逝矣來者何
人浩然有得天地忘情

竹雞賦

舉人廖應熊

邑人

桃都山今天雞出振羽鳴兮聲相續依井閭兮飼
稻梁聚爾類兮蕃爾族胡君子兮叢中有翰音兮
攸伏形之寄兮匪杉養之馴兮非木疑孤竹君之

所貽爲竹林賢之所蓄彼夫劉安仙去祖述夢沉
徒闢蟋蟀罕聽蒼蠅懷風雨兮誰子弋鳬鴈兮何
人絕立談於窓畔聊托跡於此君若其冠屐加矣
執失宜焉雌雄迭見氣勢相連度孟嘗兮關下婿
侂胄兮籬邊羞其豚兒爲伍爰與龍孫作緣至於
鷹鷂滿空豺狼載道野店已荒絳幘猶報非林宗
兮罔識茅容之賢非言偃兮難邀尼父之笑脫甕
裏以長征向淇澳而高蹈悍北無啼象竹之幽展
而距兮丘壑豈大放之可求腐鼠無爭象竹之節

濯乃口兮澗泉比牛後而弗屑桑麻不擾象竹之
清彼膠膠兮斷響想雲漢之冥冥埒桀不羈象竹
之逸彼跼跼兮莫呼敞谷風之習習爾乃傍籜棲
緣枝宿踏箇字影疎叢迴飈兮披九成之簫捲霧
兮對三竿之旭西去兮聽夷齊之歌南來兮聆英
皇之哭行不得兮何之友鷓鴣於長岡不如歸兮
且止侶杜鵑於綠楊色旣見兮斯舉招雌雉於山
梁機已忘兮可狎呼浮鷗於水方適於林兮自若
笑燕雀之處堂離於羣兮特立傲孤鶴之橫江斂

其華兮守拙謝文采之鴛鴦食其實兮果腹類德
輝之鳳凰

巖門江賦


文學 寇紹準 修文

木根坡底一江橫隔急流如箭相擊湍湍蠻山之
所會歸鳥道之所塞阨奔濤沸於三江洶湍淩於
七澤白鷺奮翮而畏飛錦鷄照影而落魄蛟龍觸
石以揚波鬼蜮啣沙而影射四載之所不經八靈
之所不割鯨魚蹉跎海若踟躕吐遯水以流竹卽
納牂柯而通邊譯當夫春也花流落瓣樹櫻晴枝

千藥天紅而鋪錦浪四山嫩綠以染清漪密箐爭
榮於曲岸子規唱和於幽渚拂春風之蘭芷染淑
氣之江籬盤渦之紫葺雲蔓漣漣之簣管瑋琦帶
他山之湖烟西去浮巖門之石壁東之時平夏也
或雨或雲或夕或朝或流風搏擊或波氣蒸陶或
怒浪衝突乎絡鹿或洪流振懾乎山魃或虎蛟噴
沫或魚牛騁颺汪汪乎若巫峽之莫濟浩浩乎如
天塹之難超嵐瘴凝江而不解蠻烟遇雨而不消
若夫金風告寒木葉隕籜暮山紫以映翔鷺秋光

碧而照飛鶴採石華於中流拾海月於下落丹楓
散亂於沙汀巖桂馥郁於竹筴非山爲秋而高因
水至秋而涸何向者之爭榮甫今茲而寂寞造物
誰信其無私江心我知其不樂迨乎隆冬雨雪相
攻瓊花千樹瑤草數峯滿江之漁火灼灼半壁之
氷柱重重霰淅瀝於綠竹雪紛糅於青松哀猿啼
而韜霞掩日白鵬招而連氛布零三更渡而燭龍
銜照中流急而馮夷景從萬頃同於縞護千巖等
於玉封觀陰極之將變知有事於春容滔滔乎斯


江也襟乎黔帶乎蜀塵面往來江心照浴長風破
浪擊楫誰續笑題橋之志興過狂嘆碎琴之胸懷
甚促觀江流之不疾不徐悟人身之何榮何辱江
兮江兮清且淥浣我纓兮濯我足



餘慶縣志

八下本

内閣文庫		
番號	漢	14840
冊數	6 (5)	
函號	因	189 13





餘慶縣志卷之八下

武英殿纂修特授餘慶縣知縣長洲蔣 浚輯

儒學教諭許之解校

藝文志

五古 七古 七絕 五律 五排 七律

五言古

平播行

明太蔣杰 曾安

蜺妖毀王度恣凶若乳虎播人亦何難蹂躪遺黎
脯逆旗指綦江血肉膏草土氛侵蝕東隅千里聞
桴鼓妖凶竟何悛天王赫斯怒穆清軫靈畧慷慨

奮神武樹牙選車徒文武今吉甫分道引旌麾連
營羅練組六師矯游龍戈矛集如雨前旌蔽白日
流颺捷飛羽鼓行破危關席捲平田潞狼奔恃險
固兀若魚遊釜虎臣翕以奮批吭擣其塢賊徒倒
前戈狂羯伏鎖斧頑梗如轉燭蕩滅同摧腐獻捷
歸朝廷揚威耀邊圉天子畫麒麟功臣錫圭組從
今橫吹聲增入饒歌譜堪嗟螳臂微安足汚強弩
珍重封疆臣慎無生跋扈

蒲村歸田詩

有小引

錢邦芭

見前

余賦性疎懶本無宦情遭遇聖明簡錄遂纓
簪綬迨巡方西川奔馳戎馬積勞成疴累瀕
危殆七上疏乞休幸得脫卸又以干戈阻隔
不得卽歸江東壬辰春率門弟子數人入黔
之鰲溪萬山深處得平湖一曲可二十餘畝
渟水清泓中有柳數百株傍多大竹兩山迴
映風景幽勝詢之土人地名蒲村因剪除荆
棘伐木刈茅構竹屋數椽於湖邊居之然後
率僮僕開墾樹藝又招集土人苗民數家爲

鄰往來淳樸耦居無猜歷兩寒暑桑麻漸熟
凡耕獲種植余不憚先勞山農雖鄙然脫去
塵網遨遊世外中甚樂也朝夕作息興趣自
得特爲古風以見志焉
生平寡世情賦性耽閒逸塵網一羈牽舉步成礙
室沉思本無味忽忽如有失一朝決去就曠然溪
自得理我荷葉衣拂我笋皮笠逍遙田畝間昂首
看雲色百物適自然欣彼歸飛翼

其二

曳杖出門去長歌歸去來天空曠無際野鶴任徘徊
徇卜居何所止縱步入山隈懸崖翳藤葛古洞積
莓苔遠村微雨過餘霞隱輕雷藉草坐磐石行止
興悠哉空山寂無人水流花正開

其三

雨後聞催耕侵晨驅牛出望杏復瞻葵樹生如不
及汜勝之曰望杏敦耕瞻葵勸穡故曰樹生如不及也五穀本五木汜勝之曰黍生
于榆大豆生于槐小豆生于李麻生于楊大麥生于杏小麥生于桃稻生于柳五木本天生五穀待
人生故五穀山中有恒曆一犁春雨足殷雷起潛
候于五木也

螫生物各知時而人乃惰惑每誦勸農詩謹遵先民則稼穡知艱難庶免逸居啞

其四

牧牛出東臯牛散入荒草驅車入田坂草肥水清皓大牛性頗馴眠食各無擾小牛猶剛劣馳逐隱林蓀馴劣亦何常芻牧務精好前村蘆笛聲同羣喚歸早鳴鳴遠相映吾牛適豐飽物性苟咸若辛勤何足道

其五

田傍何代樹鬱鬱風雲色蔭被幾數畝禾稼廢生殖陽暄不得照雨露安能及父老議剪伐村童斧柯出余也久咨嗟請爲父老述觀此奇偉姿培養非一日精華結晦明山水送蕭瑟吾儕雖貧賤當體造化德愛材審大小規利計虛實豈爲徑寸苗棄此虬龍質

其六

春陰連十日兀坐多悒悒今晨風色美朝旭何清明呼童啟柴關牛羊任所往水泉淡蕩流百草蒙

茸長鷄豕各得羣林原幸虛敞出房避蜂喧乘暖
恣搶攘田夫耒耜具經營先膏壤百物皆遂性我
體覺輕爽靜觀造化情位育豈虛想

其七

耕種偶然暇釣魚作朝羹溪流清且潔羣魚戲三
萍上水恒游泳下水潑刺鳴香餌彼不吞磐石空
垂綸網罟雖易獲多取慮傷仁口腹何時饜知止
本無心持竿且歸去茲意與誰陳

其八

力田當三伏暑氣正煩歎就息高樹陰展體承涼
颺野鹿四五羣呦呦求其曹往來不我驚飲食自
逍遙何以免網羅實維居遠郊繁華雖可戀尤悔
亦易招况我葛天民誰能競浮澆山野誠固陋且
幸違市朝

其九

秋晴二旬餘土脉幾枯裂日行畝畝間細審禾苗
節朝露雖稍潤秋陽苦猶熱浮雲忽蔽陰顧瞻爲
欣悅風雨從東來須臾滿阡陌喜見五穀滋沾濡

有不惜感念造化仁雨暘無愆厄撫衷圖報稱治
身務精潔白慚生無補食粟每難咽

其十

耘罷坐東軒研硃點周易虛牕面湖光樹色凝淡
碧靜觀身世理了然悟損益盈滿不易居儉約殊
堪惜自揣福德微憂患慮相逆鄙人心易厭食用
知禮節敢復恣奢想藐茲禾黍碩

其十一

近崖多葛蘿樵采無他施前山林木稠復畏虎狼

欺結伴事斧柯行歌入荒蹊丁丁空壑響斬伐不
違時何意山厨下摧此梁棟資使之值名都工師
爭品題托根自非地遐遺何怨咨

其十二

先聖教稼穡郊祀配天地粒食開生民功德誠不
細惟彼聖賢資尚欲勤民事况吾本凉德坐食亦
何意大智既創始後賢應繼志五穀辯土宜四時
徵節氣陰陽驕復調物性亦欣遂盡力懲惰嬉清
夜乃堪慰寄語膏粱子力田毋自棄

送蔣樹存之官餘慶

編修 查慎行 海寧

憶昨領書局羣英集金鑾蔣生預校讐臭味吾芝
蘭趨階或聯步會食常同餐六時數晨夕三歲離
暑寒書呈上

御覽名姓列簡端聚散夫何常蓬沙孰能搏同儕三
十輩十一爭彈冠我已病乞身君行甫得官不以
出處易儼然平生懽叩我委巷門送迎諒蹢躅谷
風有遺棄責善人情難古義胡足陳世道良可歎
君又別我去迢迢赴花蠻黔俗我所諳鴈戶雜猴

獮陰多晴日少瘴霧昏漫漫長吏雖難爲苗民豈
眞頑寶輪况無幾期會務使寬訟簡案牘稀地遐
心跡閒時復弄筆墨吟哦於其間亦足以自豪因
之報平安好音望頻惠綿邈非關山

前題

探花 錢名世 常州

鬱鬱春明柳蕭蕭行客裝行客何所之出宰西南
疆惜別在須臾黃鵠凌風翔眷言送落日執手岐
路長盤坡車斑斑清江水湯湯山川渺荆益相望
天一方之子大雅才蓬壺早徜徉小試塵埃中况

乃驅蠻鄉

其二

蠻鄉亦未惡物產富茶橘茶先穀雨烹橘後秋霜
實所念風景殊地確民俗質亮無諛訴紛揮絃氣
蕭逸昔人志羅施岡嶺重翠律硯房翳叢箐涉險
心每怵聞茲百里區曠蕩平原出登高四望遙繁
花照高日

其三

政簡俗易馴有若烹小鮮卷簾無一事行篋開新

編繡谷有佳句往往超唐賢豈無滇中賈載去烏

江船流傳到交州照耀西南天遊娛及藝事潑墨

纖塵捐邦人學詞賦傾心與周旋上述馬長卿下

陳李青蓮

其四

昔歲寅卯間快得心所從殿廷給諭麋討論何雍

容石渠采異籍并日相彌縫著書積屋棟退筆堆

山峯樂與晨夕俱結交比青松日力未能了返景

迴高春君才木天少詎可淹花封行矣奏最期遠

別三春冬

木天少壯可憐
別三春冬木天少壯可憐

前題

編修汪淵
前題編修汪淵

聖人重司牧定制咸陞見以之驗丰裁兼亦覲通
練時或顧公卿才與當特薦百里關民命卓哉尤
慎選君久結

帝知翩翩軼羣彥家旁莫釐峯几傳范喬研幾載甘
辛勤然藜叨學圃
主眷同披
御賜編同食大官膳乘間偶放歌金石鏗深殿翻因

祿仕早願未償棘院一職走萬里旁觀爲展轉豈
知男兒志讀書寧獨善年華不我待過眼如飛電
但令展經濟好快乘風便黔滇與粵蜀何昇在畿
甸勿謂瘴烟深山川待君現勿謂之官遠蠻俗需
君變柳州非邊地夜郎今近縣古人倘可作對君
應興美慷慨辭國門行矣仁風扇鷓鴣啼曉晴桃
柳香夜宴琴堂簾幕靜猶足勤書卷知君報政時
景物都吟徧

前題

侍講吳士玉
蘇州

入直著作廷出宰山水縣雋才無不可風流衆所
羨昔讀繡谷詩落筆盡黃絹掉鞅詞場中雄霸在
一戰又工書與畫三絕久獨擅幾年注蠹魚晨昏
聯席硯看遍玉堂花飽食大官膳論文必移陰相
視兩不倦五月炎風興送君出郊甸對酒不能飲
執手增嫫戀莫嫌地遠僻官閑得遊衍讀書韓退
之彈琴宓子賤秀句時相投慰我心眷眷

前題

探花 繆沅 泰州

先生湖海士十載心相於結廬傍繡谷高雲同卷

舒摘詞雲錦麗澄懷冰玉如給札金馬門蜚聲滿
玉除宮中呼才子價重雙璫璵日飽大官饌椽筆
照修書榻來剖符去迢迢雙隼旗黔西山水窟佳
處時停車君子最環異落筆時軒渠槐堂小拂拭
文畝還耘耨三年看報最足以慰倚閭新詩初上
卷吟罷一起予

與餘慶同寅金奕安夜話

員外 姚鈴 桐城

近縣路轉岐尋蹊夜忽半燈光浪底翻星影波中
亂村犬吠過橋故人聲在岸握手慰行勞一別驚

物換延我入山城開樽坐華館家世數金張琴書
供把玩願爲秉燭遊不覺晨鷄喚

巖門

前人

歇鞍古廟傍振策崖門嶺硤東起濤聲壁立垂雲
影帆截萬峯來柁換一身冷長卿後壯遊昔人遊
漁點其
著作可考者惟漢
長卿答盛覽一篇形勝此未領我已兩經過猛然
發洩省歲月不再與人生只俄頃功名須及時遭
遇復多梗敗絮觸荆榛康衢何日騁

蒲村

大錯隱居蒲村歸荃嶽麓
柳湖息齋皆村中勝景

前人

杖錫寄孤村遺縱緬蒼翠人占亂離天隱歸名教
地入山恐不淡却聘醒如醉耕鑿聚生徒興亡結
涕淚時或抱琴彈倦卽枕書睡柳湖迷烟花息齋
空薜荔瞳瞳曉日升薏薏霜風吹嶽麓倘歸來論
詩我不愧

落花屯

前人

不解落花屯花從何處落自昔襲佳名今來殊索
寞輿圖旣軼考方言恐又錯客過仍風餐我亦當
行脚裨販雜狼臙肩擔半草屨亦趁日中市只苦

生計薄王政重農桑瘠土廢耕鑿却訝讀書聲居然勝城郭

次韻答贈餘慶蔣使君樹存

太守

黃良佐

福建

宦遊數十載締交少知己荒陬蒲烟嵐靜對惟經史暇日發長吟每慙失風旨蔣侯乃佳士相見亦何喜作賦重皇都會貴洛陽紙發軔宰山城琴堂稱卧理咳唾成珠璣登壇執牛耳得茲琢磨浚薄言采蘭菹咫尺難扳歡折梅藉遽使

其二

磊落愛君才儒冠兼束帶一目破十行曠觀天地大校書供奉班風雲時際會

天子念斯民借才黎峩外卧理吟白雪或肯爲我丐佳句每驚人能使入三昧擲地作金聲不羨聽幽籟慶邑山水佳好鳥鳴嘖嘖遇景便留題此卽詩中繪

壽許廣文直菴

蔣

浚

見前

許君本楚產經濟邁流俗寄籍爲黔儒德輝炫幽獨譬如荆山珍待價韞諸匱一朝利用賓鳴騶動

林谷誰料困風塵走遍燕滇蜀山攜盧杖遊酒愛
陶巾漉晚就一廣文甘心飯不足不顧寒無氈不
願饜梁肉識君接言笑便便是邊腹議論無瑕疵
設教敦淳樸諸生皆曰賢安定繼芳躅余謁文
廟初興嗟茂草鞠松柏跳猿猱榱桷竄蝙蝠卑宮
水泛濫風雨亂板祝治民根本地曷可委荒麓賴
君襄厥事經營屏寒燠先培基址高采石兼伐木
創始癸巳冬乙未工竣速奕奕改舊觀釋奠頌於
穆嗟哉古播州且蘭舊蠻族卉衣與椎髻禮義似

桎梏何暇論詩書由來半耕讀荒陬君明師余廼
忝良牧幸接鄰並居來往不嫌復訟庭長藥苗衙
鼓散麋鹿君能徒步來我亦忘櫛沐晴軒延秋光
松桂捎簷綠簾開四面山架插三萬軸瀟湘渺何
處衡巫空極目余亦磊落人遐方愧微祿司業乏
酒錢置酒那百斛蒼翠對南山獻壽先浮菊

陽麓置西廡可眺遠翠樓南山起雲余嘗讀
 吳郡王玄澄目余亦語諸人盛文好遊無復樂之
 然其間猶悉第門四面山柴棘三萬畝蕭然無所
 適適則直苦無持出火并亦無辦和部獲五煖火
 亦以無在并購直吾來并亦無辦和部獲五煖火
 亦以無在并購直吾來并亦無辦和部獲五煖火

七言古

客欲移居蒲村問此中山水風俗長歌答之

錢邦芭

見前

老夫家住蒲村裏萬曲千盤隔烟水南渡巖門疊
嶂多西隣潛水通車軌偏橋東發是辰沅北距黔
陽爲越雋蒼崖峻嶺上青天幽谷深巖入井底行
處唯聞鳥雀聲林麓蒙叢饒鹿麕土風淳樸古無
懷於此棲遲將兩紀雞豚狗彘無失時酒食時時
會鄰里今日并州是故鄉首丘莫遂嗟已矣三間

老屋數頃田安土由來難重徙屋後俱栽桑與麻
門前盡種桃和李萬竿修竹綠成陰千樹梅花香
雪比草堂南面是他山怪石離奇向空起良木參
差列障雲好山環繞如屏几槐黃柳綠雜楓青幾
度秋霜變羅綺舊蹟猶存拜石亭石盡題名名盡
美一湖蕩漾廣且深湖面千株皆柳杞綠暗春濃
潏潏日百嘯黃鸝清入耳一葉飄然恰受航米家
書畫差堪擬下有清泉七十二游魚唵唵多魴鯉
架木湖中曰嘯臺寢興坐卧平如砥臨流日永不

知倦宛轉橋邊堪杖屨半畝人呼是懶園細草芊
芊荒不理息齋中對富春臺陰晴寒暑俱堪喜清
涼那有紅塵來明月清風是知己薔薇高覆短牆
紅芍藥斜侵籬徑紫紙窓木榻竹爲簾左右牙籤
列圖史穉子粗能學章句山妻且喜共甘旨客來
看竹到貧家欸留信宿援而止南村好友北莊賓
盤餐笋蕨兼雞豕高歌飲酒彈素琴悠悠那復知
朝市爲農爲圃爲漁樵二三僮僕隨驅使蚩蚩稚
髻播州爨古風樸茂羲皇似刀耕火耨安其生守

望相呼如臂指門戶由來夜不扃禦侮柴弓連藥
矢習尚俱從鄉里便未能免俗聊爾爾不覺流光
年復年見人婚娶還生子何論他鄉與故鄉人情
相識同桑梓濬潭尚有胡客溪先我十年居此始
手栽梅竹滿溪邊兒童盡識名下士近得王家好
弟兄買山卜築家移此時時越陌度阡來互爲主
客情多侈偶在天涯結比鄰儼然虞虢爲唇齒可
憐同宦走風塵把臂入林何日是相期願學商山
老長林豐草朝朝俟隨人拜舞日偃僂猿愁鶴怨

妻孥耻年來未挂東門冠那免北山文一紙漢家
功業比韓彭烏盡弓藏走狗死金張門第日紛紛
當年賓客誰堪恃歸來守我舊蓬蒿何必鮮衣與
驟駟早須投劾覓休閒莫悔流光去如駛

庚申夏午寄楊桐栢鄒淑聖并悼楊尚子張五
美長歌一首

明錢子點山陰

二十年前時皞皞太平有道人民好與君邂逅得
相親我尚少年君未老千里萬里車書同眼中不
見旌旗紅男耕女織安衣食商賈舟車道路通但

愁有酒不能飲但慮詩篇語未工君家兄弟饒清
興幾番狂醉幾番醒舉觴不識王侯尊霹靂當前
耳不聽麻陽尚有張孝廉親朋呼飲如登仙三杯
萬事由蒼天一醉高樓坦腹眠立鐘山下髯翁美
神靜如山心似水啣盃樂聖到三更堅坐歡呼不
肯起諸君越陌度阡來常醉溪邊花竹裏予每相
過忘主賓觴政嚴明亦知己幾年聚散如飄蓬今
日相思是何處哭君阿仲草坪西把杯送我湘南
去歸來杳杳隔重泉長夜漫漫不知曙張公遠宦

西入川一去鰲溪年復年素車白馬人相送前歲
江津白骨還人生七十古來少君與鄒公俱壽考
我年亦已近知非瞬息韶華去何早憶我從軍五
六年一官卽署眞潦倒良朋落落如晨星相見容
顏盡枯槁死者千年不復朝存者營營日懊惱况
遇兵戈離亂時世事滄桑那可保勿求仙勿學佛
頭上何須冠切雲腰間何必垂朱綬芒鞋竹杖芰
荷衣如鳥高飛遠羅罽白髮高年樂太平手中常
有杯中物

慈雲洞行

有叙

知縣 韓任市

瀘州

慈雲洞在縣東二十里許奇甚吾友趙君英
搜於龍林得之邀余遊焉主簿楊君鯨請顏
其額余名曰慈雲洞云

趙君遠自滄海至徼巡不足展其技青鞋竹杖好
探奇偶然直入壺中地劃然一洞自天開上寬下
平足幽致石筍孤拳鎖洞門芝草琅玕色葱翠曲
曲溪流不息聲廣長舌相此其示日月吞吐元氣
存風雨晦明景各異雲來變黷遍虛空雲去晴光

映最顯題爲慈雲洞益奇山林相待誠有意生天
生地洞亦生前此胡爲人不識英雄埋沒皆如此
顯晦有時正相類楊趙二君興未已又索新詩紀
其事落紙揮毫數百言好爲刻作蝌蚪字

送蔣樹存之官餘慶

編修 惠士奇 吳縣

憶昔識君年弱冠風流文酒長耽玩無事頻過交
翠堂觥籌往往行無算二月山塘柳色青玉簫金
管醉中聽可憐明月初三夜最憶春風第一亭沉
沉玉漏鳴街鼓寂寂春陰月停午燈前一曲柘枝

新小玉傚傚踏筵舞雲散花殘事已空秦淮水榭
又相逢三條共剪淡更燭五夜同聞鎖院鐘數載
飄零不相見去年忽覩雲卿面待詔吾留金馬門
修書君上南薰殿只今
天子急循良莫恨天涯道路長烏撒白苗生似鹿畚
丁溪子狼如羊邊氓正欲煩君撫况有君家理縣
諮九溪斜繞葛蠻司十洞遙連金竹府不知握手
在何年離別今朝倍黯然待爾歸來尋舊約月明
重泛虎丘船

前題

探花 徐葆光 蘇州

六年簪彩筆入直 南薰殿一朝佩銅符遠宰黎
峩縣朝辭青鎖門暮宿白雲村錦歸承母笑信宿
荷君恩蠻嶠雲飛鳧影慈幃淚漬綵衣痕拜辭
堂下叮嚀語幾載遠遊今又去鮮鮮難題驛使封
巾車便叱王程馭雲連水閣楚天遙縣近溫泉冬
瘴銷笏竹作城邊境固紅蕉織布歲輸饒三年初
罷皆移俗徧地桑麻歲連熟幾處刀耕化紫薑三
春雨足犁黃犢報最重瞻雙闕雲還家拜慶喜紛

紵竹書兼兩歸裝富一卷瑤華冰雪文

石花紀異

甲午七月廿日

舉人

廖士奇

邑人

層峰環邑勢嵯峨一線泥江曳素羅水欲去時山
乍轉形如龜距鎖深波深波碧處螭潛匿出沒狂
瀾詎可測不因釀禍若褒神屈伸變化誰能弋弋
言加之馮夷穴絕技竟與支離埒相傳一矢中妖
螭一點精靈久不滅

金龜項下有石穴下臨碧潭深不可測相傳有螭盤踞其

中土人楊姓者以漁為業駕扁舟攜妾經其處紅
光閃爍妾為螭攝去楊姓志甚越數日以羊縛船
中族之中流架藥弩於岸伺之螭復出照紅光射
之應弦而滅水湧數丈暴其尸於岸因呼楊姓為

斬龍公嗣後邑有否泰巖上有花如苔衣鮮紅精
可愛久之褪於水說者謂螭之精爽所胚胎也

靈凝結巉巖上潭煙日影朝磨盪預將否泰告邑

人從前應之皆若響泰應文明否應寇駭於石上

花開後

遠年不記壬戌年開王師平吳逆是年補
鄉試先祖中式丙子年開李詩人中式壬

午年開余是科倖叨鄉
薦大抵為餘邑兆科名鮮明艷麗奪明霞輕風拂

動胭脂縐而今世運正當陽厚澤深仁及萬方慶

雲甘露天休見嘉禾瑞草地呈祥茲值鄉闈試士

年石壁花開又復然紅光映日娟娟媚朱衣先報

錦衣賢

是科黃綬毛邑登賢書然花開於七
月半間予以往事徵之後果符合或云

早魃苦爲災炎蒸不散孕赤苔前知禍福憑龜兆
宜吉宜凶不用猜

綏陽劉子寅仲遊於吾門讀書餘慶幾一年矣

今歸秋試歌以贈之

蔣人浚

見前

東坡謫居儋耳日陽明講學龍場時從遊弟子不
知數蠻陬風俗默轉移我宰黔南越三載化不逮
古氓亦蚩播州秀士曰劉子奮迅豈受籠絡羈擔
簦不遠五百里崎嶇鳥道來尋師晏嬰長不六尺
滿相如文却千篇奇我有架書三萬軸子能一一

探無遺上窮經史下諸子手鈔口誦神忘疲我有
衮兒驕且穉往往馳聘耽遊嬉賴子相資正顏色
規以經訓學禮詩兒今就試去吳會洞庭渺渺雲
颿吹子亦科舉返蜀國峩睂高高明月隨嗟哉餘
民不學道璞玉未就雕琢之子嗜酸鹹異俗子蜀
士何乃殊黔黎睂山父子學尚在子當心慕兼手
追窮達得喪皆由命願子更進修以持倚閭白髮
望爾久張琴且急彈求雌

時值劉子悼亡

王補之叅軍枉過餘慶攜夢遊仙圖示余圖作

士老卧於松石一人絳袍佩劍雲中奔趨之狀
長歌題其上

前人

人生那論賢與愚百年富貴真須臾紛紛塵網蝸
鬪角忽莊忽蝶非殊軀王郎十年作傲吏倔強不
肯隨轅駒左遷叅軍頗跌宕蠻荒學道疑癡迂金
丹有鼎鍊不得松風高枕尋仙都蓬萊弱水三萬
里中有員嶠兼方壺青芝白鶴異人世張琴對月
堪歌呼夢中縹緲墮莫覺拍肩幸有烟霞徒絳羅
爲袍皁爲帽緣何仗劍雲中趨莫非胸有不平事

英雄遊戲爲良圖鯨鯢犀兕或掀簾御風麾斥驚
天吳

過蒲村吊錢開少先生

前人

蒲村老農結隱處翠微重叠山均寬首陽甘採薇
蕨飽武陵不種桃花看柳湖盡涸釣舟換

大錯菴有柳湖

今開堰田其釣舟亦無存

蒼崖剝落詩歌殘

石壁詩今苔沒

鶴歸華表

衡岫渺猿啼高閣楓林寒

小年菴今改構佛閣

短衣匹馬風

雪裡椒漿聊且澆烟巒

三

[illegible]

五言律

箏口關

明狀元 楊慎 成都

箐口關何險山頭路更賒
凌兢磨旋蟻曲屈陣蟠

蛇官舍惟孤舍人家無一家客心何處切夕照閃

歸鴉

玉簪花

錢邦芭 見前

白玉新簪樣佳名自有因忽驚春蕊發便覺曉粧
親木筆難成字金錢不療貧何如此花號採插遂
成真

蒲村除夕

明 王長德

去國家何在年華舊復新日殘將減臘宵半欲添
春歸夢山川遠他鄉歲月頻故園誰更在應惜未
歸人

杉溪水泛

明 黎芳聲

一夜春山雨前灣水乍盈老農初共見穉子故相
驚草色欣天澤田家悅世情臨流方咏賞數鳥隔
溪鳴

杉溪夜月

明 范孫蘭

春夜不遑寐新詩刻意工鳥鳴因月上人靜在山
中一水纏門曲千山繞屋崇高明何敢受與俗自
難同

夏日水雲菴同僧山行

前人

山深不覺暑攜手到林間剎剎雲千岫棲禪水一
灣烟嵐從嶺度空翠向人間坐論濃陰處斜陽猶
未還

小年菴

明 鄧愚

山居殊不易吾愛此山偏渺渺禪關寂修修釋子

賢亂松荒石路新水沒平田夜半經行處人天果
並圓

端午柳湖泛舟

明 彭維琨

從師經數載端午未登舟是歲山中客今朝水上
遊柳陰遲後棹風勢送前洲最喜菖蒲近開樽不
遠求

雪中集大錯菴

明教 劉 瑄 富順

景况甚蕭然同心別有天圍爐觀舊籍促膝問前
賢雪遍山俱老風迴鳥不禪坐談終不倦未易向

人傳

嘯臺待月

明歲 鄒大賢 邑人

開樽臨薄暮問爾出何遲此夕專相待前宵若有
期水光方皎潔花影或參差清夜生幽興惟君助
我詩

鐘山停雲洞

前人

洞說鐘山勝停雲別有天遠吞千嶂碧近帶一溪
烟綠字苔成畫丹書筆若椽幽人常到此採藥引
長年

嘯臺看月

明孝 楊光夔 邑人

月吐危椒白 溪林忽照開 衆山皆皎潔 予意獨徘徊
倚檻能高咏 相看且共杯 明宵辟風雨 花影待重來

白沙

前人

曲徑通幽域 清流擁白沙 綠疇層水岸 翠竹間人家
野叟依扉立 山花傍石斜 牛羊下山谷 落照映雲霞

過巖門渡

前人

金風初蕩暑 緩步出巖門 壁立雄天塹 江流駭浪奔
斜陽嶺上見 神石水中蹲 鼓棹乘船渡 看碑上木根

五顯祠

前人

扶筇探靜境 重拜顯神祠 風起松生浪 雲歸山吐
奇花稠香氣 遠鳥澁嚀音 遲暫憇神情 迥悠然無所思

野望

明 王欽昊 邑人

悠然來野望 一鳥破雲飛 山麓牛羊下 原前草木

肥危崖懸急瀑秀嶂帶斜暉遠近松林暝遙天鶴
未歸

蒲村邀陳枚菴不至

明 錢 點 見前

秋溪曾有約梅放到荆扉欲看他山去其如故侶
違疏泉池漸滿對酒雪初飛每以孤吟倦攜琴傍
釣磯

自楚還黔之客溪草堂有作

明 胡欽華 見前

昔年構茅屋曾號茗柯堂野鹿當軒乳山鳥避凍
藏兒擎荷蓋走婦煮蕨根香未與世人絕機心且

暫忘

其二

兒子年殊大由來解力田迎余落花堡歸路熟梅
天書屋陳新几柴門宛昔年亂離翻得此相對且
忻然

柳湖曙色

太學 楊一葵 邑人

高樹露晨流烟嵐半未收曉風煽新影翠色落簾
鈎微雨淡如沐遙峯影若浮前溪回首者應見此
山幽

送蔣樹存之官餘慶

檢討 張大受 嘉定

繡谷殊風雅修書自武英一官蠻落長萬里伏
天行觸目留吟句將杯起別情君才須史職辛苦
計遙程

其二

此地天南極江山設縣新山城戍卒土戶益苗
人布令慈如父聞風畏若神區區忠信在遠可格
文身

前題

進士 錢人龍 武進

簪筆承明久驅車萬里初行看夜郎月便食武昌
魚天末新開縣囊中舊校書坐吟兼卧理爲政有
三餘

其二

聽事山禽下衙齋春草生衆知公務少共說長官
清只許三年任休將百口行新詩閒整比早晚寄
風聲

前題

狀元 王世琛 蘇州

秘殿讐書日翩翩著作郎一官辭鎖闥三伏赴岩

疆木箐山如墨牂柯水似湯使君多雅化政簡玉
葉張

其二

黔中雖遠道猶是漢時城雲物七盤路風帆萬里
行竹鷄雲外見銅鼓雨前鳴遙憶龍溪下羣獠拜
馬迎

前題

知縣 龔克庸 常熟

何意金門客翻爲墨綬人壯寧辭道遠清不厭官
貧山澤四時雨畊桑萬戶春未妨勤撫字猗猗亦

王民

其二

天將山水窟萬里付詩人朝例催行急吾曹惜別
新未成酌素志且可被黃塵惆悵天街月從今獨
照身

前題

編修 楊繩武 蘇州

給札辭三殿牽絲下五溪一官勾漏薄萬里夜郎
西木箐連雲蠹鳥江落日低自來山水縣多半是
鸞棲

其二

古驛龍標尉青山供奉祠有靈應識我儒雅尚能
師綵筆凌前輩鳴琴化遠爰黔南風土記早日獻
丹墀

前題

狀元徐陶璋
蘇州

仙令從茲去迢迢古播州趨途來曉月到縣及新
秋文教孚蠻獠心情狎水鷗鳴琴官閣畔回憶舊
朋儔

前題

太學瞿駿
常熟

邑有風流吏新從虎觀來書多三殿校衙對百蠻
開嵐氣昏成雨庭陰秋入槐長官清絕處徵召早
相催

自餘慶趨滑潭

姚鈴
見前

生意饒姝俗穿林一策微畫省迎客喚山雉避人
飛橘柚藤垂澗枇杷花覆衣溪光燈影亂守望盡
柴扉

其二

天竹披山徑珊瑚拂面紅翠屏隨谷轉丹嶂逐溪

通映雪嬌無敵經霜艷不同殘冬楓落候秋色漫
長空

朝陽寺

前人

悲眺尋溪轉孤筇駐寂然萬峯雲抱寺一閣樹浮
烟珠戒人何往花燈塔尚懸淵明標甲子義窟付
殘編

遊古佛山

參軍王袞奉天

萬樹團山寺清陰步步涼潭光涵靜影野氣發幽
香佛自何年古天於此地長塵勞消未盡白眼對

空王

採蕨

許之獬見前

仰觀天漢表雲氣何重重萬畝閒秋野千家冷夕
春止餘西嶺蕨難覓上庾鍾相率兒童去無憂魑
魅逢

其二

移家非避翟無計裹餽糧採掇依山麓春熬就水
滂粉稀穉子泣腹果幾人忙回首高原上何時裕
蓋藏

其三

鬼洞饒生事天臺轉結蓬谷深雲黯黯樹老雪玲瓏只藉鋤椎手平分造物功監門如可作應入畫圖中

其四

有蕨因成市無田轉似家悲歌喧野鹿風雪暗中
華山澤水初解鄉園樹已花一犁春雨合處處聽
鳴蛙

宿小河

寇紹準

見前

枕劍客中衛旅眠覺夜長五更心滿事數載眼空
忙問影捫焦尾吞愁解鷓鴣飯牛者甯子堪向話
行藏

寓洗心齋次龔言如韻

文學 劉澤

綏陽

方綻籬邊菊轉驚澗畔松翠微新展跡紅葉滿塵
封幾見木移火莫言秋迫冬他山談舊月促膝興
偏濃

贈儒醫王國昌

蔣浚

見前

黔陽尚巫鬼倉技欲何如經亂餘生似逃名隱者

歟樂饑無寸畝濟難有方書不厭城隅住花光護
草廬

官塘久不捕魚偶遊口占

前人

縈廻城北路曲水指官塘與物久無競提綱不用
張花浮看戢戢波濶任洋洋免謂國僑知私烹校
計忙

南霖姪來署攜江南異種秋色栽之鴻泥軒庭
中土人訝詢作詩記之

前人

江南秋色好移種到蠻陬藉爾七襄手銷余萬里

愁金刀裁蜀錦銀漢落星毯絕勝張騫使中華得

海榴

送鄭廣文司直乞休還都勻

前人

五載居鄰並官貧覺汝賢醉歸還借馬客坐久無

羶

醉則騎馬歸坐客寒無羶皆少陵贈鄭廣文句也

種菜留荒圃懷鄉賦

短篇故山何處所烟樹只蒼然

至落花屯詠寄姚水部梓嵐

前人

蒲村西十里隔水幾斜陽花落任何處人行覺路
香雞栖烟箐密鴉曳暮雲長誰似濬潭老探幽覓

句忙

梓嵐任潛潭時
有遊落花屯詩

宿中華寺示方念上人

前人

投宿尋蕭寺衝寒踏暮冰久忘懸綬客漫學打包

僧風動微幡影心清印佛燈雪窓爐火夜煨芋啖

何魯

謝姚水部梓嵐惠蘭紙鹿膠

前人

簷前乾鵲噪芳訊到蠻初慰我三秋思憐君隔歲

書繭光逾縞紵鹿角抵瓊琚療及妻孥恙揮毫百

慮除

邑志告竣感懷

前人

設城纔百載纂志欲千秋不顧家人笑終爲卑吏

羞

韋應物詩數載猶
卑吏家人笑著書

山川增氣象風俗費諮謀誰

念蓬萊客編摩已白頭

邑侯蔣公縣志告竣喜賦

舉人胡慎
邑人

三殿編摩客邊荒百世師山川多潤色草木發華

滋照乘珠非貴懸金字不移功同開縣邑名並郭

公垂

訪錢大錯先生故居

文學
蔣建標
長洲

他山名勝地大錯結精廬鶴逕閑雲合樵原古木
疎蘭成哀作賦杜老亂移居蠻徼風流歇今誰解
著書

五言排律

恭祝

萬壽紀恩六韻

學正楊昌英 邑人

帝德本同天堯仁自萬年捧香佳氣霽曙色慶雲懸
皎潔南星燦祥光北極連成行嚴禁苑展敬凜冰
淵卉服盈甘露江城滿瑞烟子牟瞻戀意願上九
如篇

餘邑士民感戴平越刺史江公之德因其阨中
新建江公亭於葛公橋之南無由申頌乞余賦

詩紀事

有叙

蔣公深

見前

公爲大中丞有良公之賢嗣生長閩閩而能
儉以自持廉以率屬初守衡州適三省會剿
猱猱公總理糧餉三軍飽騰大中丞金公璽
正欲特疏薦公值丁外艱而止繼守柳州循
績有聲今守平越五屬民苗莫不感頌龔黃
餘民請賦出於誠也敬賦短章二十韻
駿烈中朝重勲庸冠百卿光華含瀋嶽靈秀萃簪
纓巨孝名稱夙應元志畧宏書窺金簡秘花向筆

頭生世業聯開府弘猷茂楚衡譽隆迴雁表澤滙

柳江潨

帝念黔封遠公膺寵命榮朱幡來播域皂蓋蒞黎城
父老扶藜慶兒童騎竹迎興釐因俗治威惠協人

情化比恩膏潤心同秋水清

劉大中丞贈公秋水
米壺時雨化物二區

苞苴全屏絕訟獄得均平色笑膠庠霽恩波閭閻
盈烽烟銷已盡桴鼓杳無鳴五屬春風暖三年化
日晴民咸歌樂只士悉仰裁成棠蔭隨風綠江亭
照眼明鳥啼如獻頌花綻若抒誠峻德齊峩嶺芳

聲雜杜蘅林間看舞鶴檻外喜遷鶯葛鏡斜陽路
依稀峴首橫

遊古佛山

太學 蔣棠魯 長洲

餘陽訪形勝古佛得名先結騎登臨去邀朋眺望
偏翠微凝紫霧清澗瀉紅泉老栢參天碧寒花特
地妍危崖回鴈字曲徑護苔錢金殿輝三寶巍樓
接二立沙彌迎客坐童子煮茶鮮水自流旋汲湯
經活火煎味甘同鳳餅香氣似龍涎倚檻神情迥
憑欄俗慮蠲徘徊臨窺劣躑躅上層巔孤鶴凌霄

舞羣緩絕巘牽披襟風細細翹首意緜緜倦鳥飛
還止輕雲住復旋晚霞低夕照暮色結嵐烟牧豎
行歌至樵夫荷擔還一聲長嘯起幽籟送歸鞭

行遊至野天清曉一登覽觀四遠通暢
三五時延至愛敬堂前山泉漱石
靜寂無事效悲思賦詩自意清朗
張

七言律

題玉虛洞

郭子章

見前

玉虛古洞寂無鄰洞口陰陰紫翠勻八百餘年狼

穴淨

自唐乾符二年至明萬曆庚子平播計八百年矣

三千世界福堂春

凌空野鶴來巢閣解語山魃畏近人更說瓊漿流

道左濯纓漱齒一停輪

過餘慶司

前人

餘慶山行路磴危幸逢春仲日遲遲荒村祭社仍
茅屋新戶編門半竹籬夾道櫻桃開白蕘隔江楊

柳換新枝猶聞豺虎當吾路

時有虎患

去去埋輪三問

之

和玉虛洞原韻

知縣

金鐘玉

邑人

驄蹄踏處覓芳鄰草昧初開物色勻半壑浮嵐朝
氣爽一丘霏翠夕陽春空留舊址思臺閣猶幸捫
碑見古人盼望丰神如近炙兒童亦解拜車輪

次郭青螺先生玉虛洞韻

訓導

李嗣儒

邑人

洞生道左不求鄰水抱山環秀獨勻石壁陰寒無
盛夏巖花晴發有陽春莫嫌狹隘惟容膝須識清

幽絕可人一自青螺題咏後名流欣賞駐蹄輪

春暮還客溪別業

胡欽華

見前

花源不似避春時荷塘行歌日正遲路轉千峯尋
故業身慚疲馬識前溪桐花蔌蔌閉門閉柳色麤
麤舊館移初願幾年成錯計白鷗重與水相期

其二

桃李辭榮灌木陰浚山長日息機心地多石礫宜
栽藥洞有丹經不鑄金萬里艱難身世改十年困
辱是非侵故人誰憶庾開府目送南雲自鼓琴

吳東池南還過蒲村話別

錢黥

見前

相見相悲憶昔遊何年同泛五湖舟方憐宦海俱
爲客獨向寒溪訪舊丘一棹春風歸建業千家柳
色鎖楊州孤烟疎雨蕭蕭路燕語鶯啼怨不休

蒲村送左車兄還潤州

前人

趨庭萬里舞萊衣相見相憐人事非獨向秋風來
絕域更將春色訪慈幃憂勤子道兄能盡草莽君
恩我未歸此去故園三月暮揚帆一路看花飛

大錯庵催牡丹

知縣周岱生 九江

一日一詩催一花無煩羯鼓玷名家當年珍種根
元固此日矜開色更加嫩蘂晨觀清宿釀芳姿渴
慕試新茶天工若助幽人興連啟春陽正發葩

寄呈蔣邑侯

楊昌英

見前

無能縮地識荊州回首南枝最上頭應宿久隨冬
日耀飛鳧遙見慶雲浮新傳來暮歌閭里舊有聲
名出禁樓特簡循良

餘陽八景

玉笏朝天

廖士奇

見前

拔地凌霄對翠巒儼然身在五雲間端持玉簡如
書思獨立彤廷欲犯顏千載面南稽虎拜四時居
北列鴛班攜笏每欲探幽勝氣象崢嶸不可攀

金龜鎖水

波流湍急去無情藉有龜山當澗橫昔負朱書浮
洛水今迴碧浪拱山城機含造化先天蘊氣吐烟
嵐隔岸生非是泥途甘曳尾留形邊鄙啟文明
一牛塘積雪

峒堯天外一峯青俯視羣山若建瓴盛夏陰森疑
白閣淡春水結儼銀屏千年石室生苔蘚百尺清
泉隱瑞靈安得杖藜臨絕頂撥開雲霧見滄溟

古佛鐘聲

梵宮高踞百雲巔風送鐘聲入市廛彷彿豐山霜
降候依稀鯨吼月明天聲隨夜柝悠揚送韻逐江
流斷續傳遙想金門待漏客景陽鳴後肅班聯
兩峯晴雨

嗜好竟同蕭艾協休徵雨看我嶺朝雲起晴望中
華曉霧騰莫道陰陽分向背山靈早已兆豐登
翠屏晚照

倒景光廻照碧峯紅霞一抹若爲容嵐光半壁浮
空靄野色連天入眼濃巖擁歸雲烟淡淡花薰夕
照影重重翠屏如畫堪幽賞響斷樵歌起暮鐘

慈雲花雨

靈巖透闢自何時法相生成景更奇

有生成石大士像石

筍嶙峋依佛座清溪滌折湧蓮池雲低遠樹疑優

鉢雨鎖寒烟蘸柳枝若解尋聲能救世甘霖徧灑
慰蒼黎

柳湖曉烟

平湖一望綠陰中掩映朝暎翠幾叢宿霧未收侵
嫩色曙烟才鎖怯微風差池燕羽高還下組織鶯
梭西復東詩酒當年留勝跡

大鋪橋咏湖中

臨流佳興與

誰同

玉笏朝天

李嗣儒

見前

城北廻流疊嶂邊一峯高插碧霄懸共瞻玉立巖

巖笏獨對宸居穆穆天似有謨猷常入告翻忘鵷
鷺少聯翩紅雲捧出知何處留此朝儀不記年

金龜鎖水

一水北流繞帶襟無端峽口有龜臨形從山現看
如畫影映波來色似金難向人鑽厭告人不煩瓦
蔭歷年淡須知鎖鑰偏專寄仗爾神靈守碧潯

牛塘積雪

高池天鑿號牛塘寂寞寒威似朔方冉冉峯頭雲
每卧皚皚澗底雪多藏人遊古寺衣裳冷鳥過寒

枝羽翾翾獨有玉梅能久耐先春依舊吐清香

兩峯晴雨

揚鞭辨石事無庸欲識端倪有兩峯奇幻天機豈
易洩空靈山色獨先容晴光定自南巒吐雨意專
由北岫濃怪爾占來如響應願將時若惠三農

古佛鐘聲

遙瞻古佛樹烟封高踞東南對笏峯二百年來開
梵宇十餘里外度禪鐘座間俗士思清累道上勞
人欲息蹤却似姑蘇城外寺聲聲夜半客船逢

翠屏晚照

着屐遊山夜亦能相傳峯頂有孤燈朗明似月長
光放炳耀如星巨焰騰風力頻吹輝不滅雨花亂
墜色彌增劉生去後無藜照寶炬恒燒景獨勝

慈雲花雨

滿溪地名地僻飽烟霞步到靈崖路甚賒洞口有雲

纔觸石村前無雨不飛花繽紛似講高僧法散布
如來仙女家須識寶珠何足異甘霖喜得潤田麻

柳湖曉烟

池邊種柳學西湖侵曉生烟景自殊旦氣蒸成如

霧起樹間幻出似雲鋪青綃縹緲鶯難語翠蓋瀾

漫畫豈摹偶過蒲村尋舊跡徘徊獨憶老農夫

玉笏朝天

舉人田榕平溪

亂峯合沓水灣環目斷天門尺五間豈有烟雲迴

法駕長疑鷓鴣點清班朝元路自何年闢指笏人

從此地閒萬仞削成常屹立春風安得一追攀

金龜鎖水

白泥不斷甕安流千劫靈文鎖巨洲雌霓晴橋送

待跨金龜遠水鎮常浮花穿石罅開來好鳥占藤
梢囀處幽最憶毒龍常聽制狂瀾此日竟無憂

兩峯晴雨

兩峯南北鬱相望謾道陰晴屬渺茫霧起詎愁十
日雨雲騰早兆萬家霜從來曆日山中少遮莫風
光野外長靜裏若教占驗熟筵占瓦卜不須詳

古佛鐘聲

上方高處接層霄仙梵泠泠亂海潮月照燈光衝
斗上霜清鐘響帶雲飄迦陵鳥囀聞深樹篤耨香

薰憶隔朝十載可憐成幻夢壯心故在未全銷

牛塘積雪

牛塘一望白泥東高切浮雲翠掃空古木千章盤
蛟蟠枯藤百丈挂玲瓏嚴冬滴瀝冰恒結盛夏陰
森雪未融幾度支頤閒極目如銀似練畫屏中

慈雲花雨

飈埃不染晝陰森石笋參差欲作林地僻坐間棲
佛古月明洞口隱雲深依稀天女來花雨彷彿魚
山起梵音坐久題詩旋刻竹霎時甘澍灑塵襟

翠屏晚照

參差列岫聳如屏
望眼全舒晚更醒
十里烏江長自繞
千年古佛爲誰青
雲歸空翠沾衣袂
霞起瑤光出野町
坐對披襟忘日夕
樵歌牧笛每堪聽

柳湖曉烟

他山斷處柳湖開
曉日徐升上嘯臺
乳燕低飛明復暗
流鶯巧囀去還來
柔枝宛轉深藏蝶
嫩綠依稀笑舉杯
欸乃數聲烟霧裏
懶園東畔且徘徊

玉笏朝天

文學
楊光昕
邑人

奇峯如笏靄蒼蒼
終日端然覲玉皇
鴈鷺疑從閭闔裡
雲烟常護冕旒傍
勢依霄漢凝仙露
高並星辰惹御香
搔首問天頻眺望
凌空壯志未曾忘

金龜鎖水

江流如帶繞餘城
曲折風波一柱撐
河伯不狂憑鎖鑰
山靈長峙俯澄清
龍潛石窟曾留跡
峭壁飛花舊有名
爲報白泥溪澗水
朝宗此地莫縱橫

兩峯晴雨

兩峯遙對勢巍巍
晴雨由來洩化機
北霧擁崖同

食房集元
潤礎南雲出岫北清暉人間占驗幾先應天上陰
陽數不違平野農人咸眺望較量豐歉盡憑依

古佛鐘聲

萬籟蕭然夜景幽梵鐘隱隱雜江流一聲撞破禪
林寂幾杵敲殘楓葉秋逸響隨風飄大地清音送
月落城頭分明好個華胥夢無那蒲牢吼未休

牛塘積雪

千疊銀屏擁勝觀玉峯高聳碧雲端四時不煖青
山老五月如冬白草殘凍結冰花留素影光搖赤

日漾輕寒爲思高卧山中者安得攜筇一往看

慈雲花雨

信是人間別有天朝飛輕浥幾經年洞無關鎖留
雲閉巖作玲瓏待月懸鉢內優曇形已幻溪邊楊
柳色仍妍遊人踏破蒼苔路花雨疑飛思渺然

翠屏晚照

峯迴東北似屏遮遠映斜陽望更賒流水潺潺浮
綠玉夕曛燦燦遶紅霞翠凝絕壁迷芳草影入平
原集暮鴉載酒放歌殘照裏孤城烟鎖萬人家

柳湖曉烟

朝曦纔上霧濛濛
繚繞平湖十里同
似雨微氛還染袂
當風宿露漸浮空
石橋宛轉烟波內
畫舫輕搖曙色中
一曲漁歌山水綠
昔年清嘯有支公

癸巳代篆泥江較射卽事

知州李延基奉天

氣爽秋高原野平
曉嵐豁處見晴明
草深兔怯雕弓勁
風疾鵬隨羽箭傾
文事不妨兼武事
宦情猶喜縱詩情
暮雲蒼靄長歌起
且醉花前月影橫

遊古佛山

前人

名山古刹與雲齊
颯颯秋風獨杖藜
幾丈瀑流飛白雪
千重翠靄接青霓
雲深松徑疑無路
苔蝕蒼崖沒舊題
更上高樓還極目
徘徊惟覺夕陽低
謝餘慶金奕安同寅惠鱖鮮武彞茶

姚鈴見前

多情又接故人書
珍重封緘兩月餘
紅葉鮮名滿江

收釣晚綠雲垂嶺
散香初搜腸未必
文能富用盧全句

醒酒鮮名眞令病漸除
我欲報君無一可
黃楊昨已

費躊躇

奕安屬覓黃楊筆筒

送蔣樹存之官餘慶

侍讀 吳廷楨 蘇州

分光藜火鎮相親 書殿頻年坐接茵
獨向天南爲傲吏 誰憐日下少才人
趨程瘴雨浸衣臙 行縣蠻花壓帽勻
料得社場秋賽近 蘆笙吹出頌聲新

前題

庶吉士 顧嗣立 長洲

黔中氓俗近何如 笑說佳名慶有餘
小縣強如長作客 閒官畢竟勝修書
亂山雲氣多隨馬 積雨溪聲欲濺車
犵狫土風頻志怪 新詩遠寄慰離居

朝陽洞

僧 海文 密 邑人

仙源靈窟洞朝陽 石逕苔封古木旁
溪邃水流花萬簇 峯高雲壓栢千章
春明草色侵衣綠 秋響松濤落照黃
趺坐忘機鷗鷺狎 好將飛錫撥嵐光

遊古佛山

寇紹準 見前

扶筇騁眺夕陽暉 古佛山前坐翠微
谷口松聲千澗落 嶺頭瀑布一簾飛
婆娑野鶴高低舞 繚繞閒雲信宿歸
種髮那堪搔首問 支公應笑我心違
秋抄逞偏刀水道過 餘慶訪許直菴廣文

敬諭 潘 珍 安順

十年奔走歷風塵秋水蒼蒼一問津
籬下開殘三徑菊座中話舊五湖人
關山岐路行將晚知己幽懷老更親
回日停驂期再訪樽前引興莫辭頻

奉答潘殿衡廣文

許之獬

見前


幽齋兀坐隔風塵爭道漁郎來問津
洞裏碧桃雖避世籬邊黃菊解留人
地輕千里難圖晤話別頻年更覺親
逕僻時豐蘆酒熟征車肯顧不嫌頻

乙未四月潛潭姚梓嵐通守京畿過餘言別感

懷四章并寄都門諸同學

蔣

淦見前




餘慶縣志

八下末

内閣文庫		
番號	漢	14840
冊數	6 (6)	
函號	史 189	13







兩年邊徼飽艱辛鄰近於君分最親謾許蔣卿非
俗吏却憐姚合本詩人嵐淩虎伏雲無路箐密猿
啼樹少春無罪却同投播地天高何處問來因

其二

餘潛百里路千盤雀噪先知慰我餐薏苡酒清疑

桂醕桃榔麵滑勝猪肝

君常以薏苡酒掛麵二物餉余故以坡公桂醕安邑

儲肝為比

貽詩我已酌端硯索畫君能贈牡丹

君作長歌索余

小硯又移牡丹索余畫蘭

如此窮荒多韵事風流要與百蠻看

其三

諸君衮衮騁豪雄爾忽飛騰霄漢通班接駕行
丹墀上身拙鳥道瘴烟中離愁不斷三湘水書信難
傳萬里鴻聽慣蘆笙與笛曲莫驚朝鼓曉逢逢

其四

六年載筆侍承明忽奉分符別

帝京敢說詩高官職折漫嗟吏俗簿書生早師厲學
文翁化誰解彈琴宓子聲爲報雲霄故交道折腰
贏得鬢毛盈

次韻餘慶蔣樹存贈別四首

姚鈴見前

驪歌纔唱便酸辛唇齒相依倍所親不到蠻鄉誰
識我也知空谷有斯人六時瘴癘還多雨三月鶯
花不辨春投播劇憐無可憾得君隣並卽前因

其二

一線蠶叢鳥道盤敢期安穩說眠餐竹竿蹭蹬嗟
鷄肋藕孔微茫戀蝨肝鬢鬢自慚空漸白藥鑪長
守不成丹頻年宦况憑誰訴同氣還當同病看

其三

崢嶸詩畫夙稱雄酬答多憑尺素通一朶芙蓉丹

嶂裏數莖蘭芷綠筠中師資擬作皈依鵠趨步能
如漸進鴻兩地相思何處着夢回曉漏鼓逢逢

其四

出處由來荷

聖明泰階星斗仰神京官閒只類墻東叟吏隱仍
同硯北生新句更添題畫句吟聲常伴讀書聲他
年倘踐金閭約衣帶滄浪一水盈

再別餘慶樹存

姚鈴

見前

未知後會定何年宦海飄零指釣船自有別離惟

爾我却同天地各山川容顏共向風塵老性命真
成翰墨緣唱和一編常在手鷓鴣聲裡綠楊烟

次姚梓嵐再別韻

蔣溪

見前

使君邊俸八多年弱纜如牽上水船黃縑日華歸

故里

東坡詩日高黃縑尚從容

紅旗風獵渡湘川

隨州詩風獵紅旗入壽州

論交擬抵松筠操話別真同骨肉緣莫戀龍眠猿

鶴侶

君由家人都故云

枉教書報薊門烟

往返餘慶值樹存公出寄懷

太守

陳受漣

江西

往復重過單父堂神君借鼎向隣疆
籌疇雨潤陰

膏黍雍野星移蔽芾棠惆悵未曾依玉筍謳歌今
已聽都鄉懸知循卓聲華早題柱旋徵畫省郎

往會蜀讞曉發巖門

前人

懸崖峭壁兩門開一洞飛泉送布來流遶曲灣波
跌宕雲封兀突石崔嵬斲休疲馬耽清晝又解征
衫瀟茗杯于役未遑舒眺覽僕夫輿子漫相催
素聞巖門之險甲於棧道過此信然喜渡成不
爲險阻誌以兼頌錄寄樹存

前人

柱底江心壓浪渦迴湍射艇急如梭使君有俸捐

輸盡過客無錢感頌多一葉小舟弓未滿三通大

石碣初磨向來聽說河難渡

黔有走過天下路難過巖門渡之謠率

土招招待爾何

鎮遠刺史陳公赴蜀會讞道經餘邑途次賦詩

感蒙寄贈次韻敬呈

次往返餘慶不值元韻

蔣溪

見前

喧傳畫戟過琴堂不惜崎嶇越井疆膏雨遠滋歌

秀麥朱輪隨憩卽甘棠王喬屢隔烟霞路

時余署甕安事

謝守詩添山水鄉共道相如諭巴蜀道旁竹馬走

兒郎

次曉發巖門原韻

前人

危崖劈處亂雲開
林谷驚傳刺史來
衛滅旌旗容
最屬路崎僕馬告
崔嵬馳驅空叱王
尊馭慷慨還
傾太白杯却笑莊唐
苦多事經營開闢是
誰催

次巖門渡紀事原韻

前人

黔蜀通津百折渦
魚龍飛躍勢如梭
造舟豈比徒
枉力放槳差強輿
濟多但使蠻荒興
利涉敢將碣
石紀鐫磨
江亭高築書公句

土人築亭於江岸以公贈句中使君有俸

捐輸盡過客無錢感
頌多刻對聯於亭上

免嘆公無渡奈何

次鎮遠刺史陳公往返餘慶不值蔣公原韻

許之獬 見前

傳呼熊軾出黃堂
畫戟朱幡戾蜀疆
巖邑欣瞻來

紫氣鄰封早已借甘棠

時蔣公署篆甕安

主賓未遂班荆

會姓字原同達

帝鄉

去年計典陳蔣二公同膺卓異之薦

他日聯鑣

鳳池上才名應

共說錢郎

次陳公曉發巖門原韻

前人

凌雲峭壁兩門開節使疑從天上來徑仄輿夫頻
躑躅岡崇馬首埒崔嵬渾忘德里星常耀幸接談
宗夜舉杯時潘殿衡廣文同行夢裡才驚山路險雞聲喔喔
又相催

次陳公巖門渡紀事原韻

前人

百折狂瀾百折渦勢傾三峽疾於梭昔時行役嗟
荼苦此日謳吟被澤多往返使君知最稔興除善
政洵難磨森森矗矗江邊立任爾豪強柰若何

和鎮遠陳公往返餘慶不值蔣公原韻

廖士奇

見前

盛治如虞不下堂大賢特簡守黔疆朱幡風肅臨
巖邑紫綬春生被野棠明察自能清肺石慈和久
已著蠻鄉鄰封借寇虛良晤留得珠光照夜郎

和陳公曉發巖門原韻

前人

蒼巖如畫自天開爲雪民冤歷險來霧鎖長江波
浩蕩雲生絕壁勢崔嵬山靈若待成佳賞村酒難
沽有限杯晨露未晞愁徑滑垂鞭攬轡不須催
和陳公巖門渡紀事原韻

前人

狂瀾觸石起盤渦鼓楫中流迅似梭功比杞梁民
病少惠周行旅感恩多濟川大志今初遂紀德鴻
章永不磨灑水烏江長沛澤兩相持較定如何
丙申夏月同鎮遠郡伯過巖門來潘珍見前
乾坤偪仄到巖門蜀道行難未足論丹嶂千層迷
渡口白雲一片鎖江邨元瑜書劍襟期遠謝傳旌
旗日影翻問俗觀風餘雅興倒流三峽注詞源
其二
前人

向說巖門道路難於今盡屬使君灘濟川舟楫功

初就勒石文章頌不刊虎豹長林休恃險蛟龍淩
壑得潛安中丞平播清江外開拓邊隅則壤寬

其三

前人

盤旋雙嶺聽樵歌一葉扁舟渡大河水自巖門歸
灔澦山從箐口接岷峨每愁野店無沽酒漫說崇
岡有爛柯潛潭頭塘名若使仙源今尚在浮生當不涉
風波

邑侯蔣公舉行季考喜賦

廖士奇

見前

聖朝文教及邊陲特簡真儒借主持三里黎民懷衆

母一時人士仰賢師詞同白雪才情潔鑒若冰壺
賞識奇瓦礫磨礪成國器連翩直入鳳凰池
賦得亂山深處長官清呈蔣邑侯

前人

羣峯起伏繞邊城民鮮追呼夢不驚近接嵐光千
嶺翠高懸冰鏡一簾清琴臺花落知官况蓮幕雲
封識宦情從此山林應起色詠題草木亦增榮
喜聞餘慶縣宰蔣樹存纂修邑志寄贈四章

太守 陳安策 奉大

五年枳棘嘆栖鸞著作欣逢班馬觀名郡且無搽
筆士巖疆尤鮮奪袍官

聖王舞羽敷文格中使臨邊繪畫看漫說播州人少
住百年重見起凋殘

其二

特簡臨民早矢兢訪求文獻已無徵四圍箐嶺蠻烟
合滿目狎獐獐雨凝心絕纖翳懸鏡湛事逢盤錯
奏刀勝喜看僻壤多丕變椎髻侏僂盡服膺

其三

校書 內苑蒞春臺政事文章未易才月皎琴堂
知訟簡塵清鶴院見風裁幾年吹黍回蠻谷徹夜
燃藜煥草萊百廢具興彌治最遐陬花木喜重開

其四

結構新亭小院東公餘親校蠹編中條分縷晰蒐
羅盡增缺刪繁考定功曠代章程能傑起千秋筆
墨有誰同史材良吏真兼勝從此轉軒樂採風

乙未中秋鴻泥軒卽事

王 袞 見前

高軒四壁廠秋風萬卷書開南面雄一榻桂雲清

夢穩滿堦松月素心同白泥着地寧非雪墨綬勞
人渾似鴻清賞恰能符古意疑君前世卽坡公

宰餘再朞兩月值行計典卽蒙劉大中丞登之
上考列之薦剡撫躬慙悚述德抒情敬呈四律

蔣 澐 見前

中朝副相八旬身海鶴風標龍馬神漫笑樂天投
洛社不同尚父遇湖濱平生展布因

明主半壁安危仗老臣威是神雷心是佛史書翻遍
古無倫

其二

鷹隼廻翔狐鼠逃幾曾折檻博名高九江戶口殷
懷切六詔風烟控制勞

帝念孤忠隆節鉞臣餘霜鬢擁旌旄除將韓范勲垂
帛憂樂非公孰肯撓

其三

有苗逆命犯烏蒙倚毗羣推矍鑠翁誠信久孚蠻
落外輸將不礙羽干中何須衝雪擒元濟那用攻
車繫犬戎誰是韓碑扛鼎筆平淮作頌紀裴功

其四

葛壘龍場百世師忍辭荒服棄清時校書每憶蓬

萊直撫字寧嗟棘道馳舊學兩邀先達薦

蒙少司馬宋公

侍講錢公編修查公汪公兩次摺薦

新硯敢負大賢知拜瞻敬忍居

箴訓

公魯命書敬忍居匾

衣鉢從今合掌持

成都龔綸字守初隱於醫者也少經兵燹不求

祿仕好求仙訪玄之學年七十餘而顏若少壯

步履輕捷其殆稚川壺隱之流歟丙申九月枉

過餘陽留連數日有詩見贈奉酬二律

前人

名落人間七十年幾經塵劫換桑田安期不願干
秦帝梅福何妨作市仙心似懸燈光耿定形同舞
鶴骨踰躑那堪秋雨孤城夜對酒看花話夙緣

其二

蜀仙舊說李八百黔寓今傳龔異人訪道不辭蠻
洞遠濟危忍顧藥囊貧養成玄牝靈根固靜讀黃
庭服氣真笑我癡頑呼傲吏空留皮骨混風塵
次邑侯蔣公酌西蜀龔守初過餘原韻

許之獬見前

憶別岷山二十年忽逢鶴馭到餘田須知當日壺
中叟便是而今地上仙姑射影搖饒綽約屏風廻
舞更踰躑支離穉子恒欹枕荷解青囊慶有緣

其二

青羊玉局傳經後石洞雲房總異人五隱詞題猶
記少百錢簾下不嫌貧祇今健骨清神老應授伐
毛洗髓真乞與黃庭書一卷好隨龍杖出芴塵
護撫白公赴闕榮補星馳趨送自餘慶至鎮

遠道中得詩四章以誌感頌

蔣 浚

見前

台星七載蒞邊疆三轉官階惠澤長未去楚江籌
貢賦還留黔土計耕桑百蠻烽靜沾膏雨羣吏冰
兢矢履霜百尺龍門公獨步後先應築兩祠堂

其二

到處行臺結構宜公餘觴咏憶追隨得中樓

糧署樓名

迴看雲幻舒展亭

臬署亭名

高覓句奇白傅風流偏愛

客范公憂樂摠匡時

君王垂問籌邊事報國拚教兩鬢絲

其三

祥柯春樹雨濛濛搖曳行旌弄晚風望闕臣心

同魏傳立碑人泣比羊公飛巖洞古雲留翠澗水

橋長月映空明發便應

丹詔下清操久已動

宸聰

其四

陶鈞四載感生成千頃波涵小草榮

聖世總因無棄物黔陬容易着書生鳴琴敢負循良

譽簪筆羞稱供奉名萬點蠻山圖畫裡那堪吟望
淚縱橫

署中隙地新築小軒取坡公人生到處知何似
應是飛鴻踏雪泥之句顏曰鴻泥漫題四首感

懷紀事

前人

誅茅鋤棘結蝸廬拓地寬閑十笏餘筭就三間纔
兩架且容設榻更攤書雪泥點綴吾生是

縣治屬白泥里

鴻爪東西自古如三復坡詩還展像黔南敢比海

南居

余藏東坡在海南時笠展像每懸軒中展祀

其二

萬里愁心烟樹蒼年當半百走半腸丹砂未遂神
仙志飛鳥應留漢殿傍八口不求餘飽暖百蠻已
喜化耕桑此心安處吾鄉是賴有甘貧老孟光

其三

城郭今非古播州嵐光溪色儘優游開尊少與鄰
翁飲纂乘還招故老謀縣僻村墟猶樸畧官閒山
水費冥搜柳劉不到無酬唱懷古登樓愧白頭

舊屬播地唐劉禹錫刺播柳宗元願以柳易播疏請不許劉改刺連州而宗元亦未到播余擬構柳

劉閣於軒東故云

其四

居然三徑舊元卿滿眼烟霞適性靈南北窓疎邀
月白高低簾捲落山青久慚請印無仇覽縣尉屢選不至
尚喜栽花有乞丁底事晚衙催鼓急靜驚麋鹿亂
松局

登牛塘山

貢生黃琮邑人

烟銷雲盡轉嵯峨搔首青天發浩歌山以牛塘分
淨域地從鳳翅住靈窩瑶空風起身堪御銀漢星

回手可摩萬壑千巖涼似水石樓無主柰愁何

夜宿鴻泥軒卽事留別蔣使君 王 衮見前

重過鴻軒歲幾更開罇夜夜論詩情蘭幽如接同

心臭

使君座上寫蘭相贈

桐響難禁哀雁聲布令已成賢令

尹著書猶似 御書生勝遊未忍別君去馬踏雲

山亦懶行

聽王叅軍補之彈琴次留別原韻

蔣 浚見前

潜潜燭淚報殘更聽爾揮絃動遠情豈是雍門悲

客思誰憐宓子治單聲

補之爲楚雄
令左遷今職

簾前舞鶴驚

松韻池畔遊魚覺浪生多少良材爨焦尾爲君三

嘆酒三行

和叅軍王公留別原韻

太學 蔣仙根 長洲

殷勤信宿話三更落落高懷少宦情一幅秋花寫

幽景

王公在座上
寫秋花二種

五弦湘曲寄愁聲胸無塊礪何

須飲人自風流太瘦生却恨蠻山春雪裡無端興

僕促晨行

七言絕

閔旱

楊昌英

見前

星文夜坐倍玲瓏銀漢無聲翳碧空極目那堪隴

畝望新秋未到樹先紅

其二

其雨朝陽更夕暉長空萬里少雲飛生涯漫說有

書卷一字何嘗可救饑

鰲溪晚釣

黃琮

見前

世局如棋白眼看鰲溪流水綠漫漫會心若得濠

梁趣風雨何妨一釣竿

餘慶蔣樹存索墨附以詩

姚鈴見前

柴車檢點出牂柯來日猶存墨一螺到手五千應
惜我寸長魯共十年磨

次韻姚梓嵐贈墨

蔣浚見前

浣花有客遺箋紙又得龍眠墨兩螺渴殺嚇蠻書

硯在

余在黔得古硯名曰嚇蠻書

揮毫只博一回磨

打堰歌

前人

白泥田土勢高低乾旱年時費力犁不是郭公規

制善

三堰皆郭大

有誰名埒白蘇隄

其二

黃沱暖水大山林楚蜀分江篆壁浚

黃沱暖水三堰發源處也

石壁上刻楚蜀分江四大字

百丈銀河天上落截來餘地作甘霖

其三

雷公首堰得探源康寨

地名

逶迤到麥園

地名

盡力人

功挽天意不須石燕更飛翻

其四

赤土功程數載安

三堰惟赤土堰田最少
爲功省力詳三堰考中田無二

頃灌無難黃旗綠蓋來阡陌男婦歡迎父母官

其五

八班分築千功堰白馬龍溝

地名

取次催不怕豪強

來辱水挨牌急趕鼓如雷

其六

柳陰牛繫午風涼荒月難儲打堰糧爲報民苗莫
愁嘆官家早許借官倉

次邑侯蔣公打堰歌原韻

廖士奇

見前

餘邑田高水勢低乾封徒自費鋤犁使君有令修

三堰萬頃恩波沛遠堤

其二

聞說黃沱盡是林江分暖水滙淵深餘波灌漑田

千頃甘雨謹歌傳說霖

公兩次禱雨
甘霖立應

其三

民瘼關心究水源雷公首堰載文園

時修邑乘以
三堰入志

麥園一帶沿波討康寨溝中雪浪翻

其四

齊心齊力自相安赤土爲堤較不難蓄洩以時防
旱澇莫將瑣屑瀆尊官

其五

八班溫飽資堤水何事年年奉票催高脚牌分先
後序楊家苑口浪奔雷

其六

促膝松陰午飯涼打堰民皆包飯
午後就涼處食問伊還有若干
糧頻年仰食官家穀不是官倉是義倉

三百稔堰水歌

前人

昨宵堰鼓響逢逢今日登舟地名水漸通回憶向年

徒費力曾無涓滴到田中向年打堰趕水爲豪強
所阻今蒙分班始沾惠

澤

其二

堤遙十里太灣環三百稔中水滿閑俗以滿坎
爲滿閑感

戴使君憐路遠明年遵示趕三班

新大田堰水歌

前人

大田多稼見風詩堰遠田遙得水遲當日舊規今
復見小民受賜咏京坻

其二

連年不得潤餘波我弱人強沒奈何班定粗豪皆
歛手笑看堰水落雞窩

田名

餘慶蔣公署篆甕安喜聞倡修竹銃橋寄頌二

絕

教諭

宋如嵩

甕安

就傾竹銃百年餘興利誰人肯樂輸賴得使君今
借鼎徒杠爲政百蠻呼

其二

爭看愚公移石力不須舟子隔江招從今利涉真

成象輿濟紛紛笑鄭僑

戊戌正月過餘慶留宿樹存山齋論心把卷偶
憶鷄冠秋菊合作一圖漫題奉贈

王袞

見前

軒昂君是雲霞侶寂莫儂爲籬落香天意欲教兩
美合不妨蠻徼占春光

王補之叅軍攜琴枉過鴻泥軒信宿談心寫蘭
題贈

蔣

潑

見前

攜琴踏破亂山雲相對虛窓話夜分寫出靈均湘

楚思憑君幽搯譜清芬

跖

蔣邑侯巖門渡碑記跋

廖士奇

見前

構皮灘巖門渡數十年無有起而復之者非不留
心厥事蓋徒以法制之有遁於法之外者致使官
渡要津爲豪猾居奇之地公以實心而行實政買
田造舟不動聲色豪猾歛手行旅歌頌大儒經濟
固自不同猶慮久而難繼勒之貞珉記中寫山川
險阻讀者如經其途至於貫往日之橫索而開其
自新歸先年之渡田而予其慕義可謂惡惡短善

善長矣古制之復與開創同功民皆感德公獨謙讓勞謙君子非公而誰猶以利濟望之後之君子何其惓惓於餘民乎文之體裁精密詞調古雅更非時賢所及

洗心齋跋

蔣 澣 見前

庚寅仲春偕吳子少融同宿直廬吳子夢余名奉神人發往墨紫城洗心覺而語余茫未解也宰餘三載得山薑先生黔書載黔地唐名紫池又名紫泉且黔半屬黑而餘邑東有紫姜關西有黑土哨

其謂之墨紫池也殆惕我以遐荒訟過服官滌慮之始乎易曰聖人以此洗心退藏於密爰書自儆并以告後之君子

鴻泥軒跋

前人

東坡詩人生到處知何似應是飛鴻踏雪泥達哉斯言餘邑爲白泥舊里余來宰此喜與雪泥字巧合因築三椽以顏其軒鴻跡東西他年又不知飛何處也

（Faint vertical text columns, likely bleed-through from the reverse side of the page. The text is mostly illegible due to fading and ghosting.)

政令

野猪哨學田申文

康熙四十七年

知縣

金磐

奉天

查得三哨田土自康熙四十五年二月間據本縣合學生員楊嗣洪等呈請撥學以資香火隨奉撫都院陳批有三哨田畝既係前撫郭公捐金購置坐落既明畝數無舛與尋常荒土不同但現奉各憲勸墾遽令歸公恐小民愈生疑議如詳飭該縣查明開墾年分工本申報由司詳議捐給償歸學校公用等因在案卑職自到任之後不知幾經拘

喚除野猪哨向係官收其在縣在學原無異同故
卽一呼而至今已歸學矣其涼風茅坪二哨人民
抗不到案卽間有至者僉供昔年賠累吸其膏髓
今則差役均平一旦撥入義學實所不甘以致懸
案不結者此也茲奉憲行飭查官租因兩次具詳
代爲懇請免其歸學蓋緣民隱哀迫非敢有所庇
徇也且細繹撫憲鈞批內有查明工本詳議捐給
之文則飭原未遽令歸公尚在可議之列卽兩哨
人民亦經赴院陳控奉有候縣詳到日另奪之批

合無仰懇憲慈俯照前議除將野猪哨准歸儒學
其涼風茅坪免其入官似爲恩便至條糧數目原
未摠合蓋因歷年飛洒積漸所致在官則以合總
是務在哨民則以得田爲幸故或多或少已成定
額總在各本哨按畝均輸非民戶之可按籍而稽
者比也今訊之經承查之實徵俱係此數實無憑
改造若荒蕪無徵之處全書開載餘慶原係全熟
亦未識前令是何主見每項必註內荒若干字樣
今查田雖報荒額實無虧是荒熟本無二致相應

遵奉憲駁改正所有四十五年分野猪哨田租開銷穀石據儒學造冊前來卑職覆查無異合並呈投送核其四十六年租穀未經收清尚容另造開報緣奉駁查理合脩由另具書冊伏乞照詳施行奉本府郭批如詳核轉繳

哨田歸學牒文

康熙四十七年

前人

爲飭查入學等事本年三月內奉撫都院陳批允野猪哨田土准歸學校以奉香火其涼風茅坪二哨仍歸哨民管業批行到縣爲此故牒貴學查照

牒內事理卽照憲批緣由將野猪哨田土查明入學親行管理收租納賦須至牒者

捐修學宮申文

康熙五十二年

蔣 溪 見前

爲學宮頽廢日久詳請修葺以妥 聖靈以光文治事竊惟治道之盛首隆學校我

朝文教聿興四方風動固已要荒重譯無遠弗届矣餘邑以蕞爾遐陬僻在萬山雖地瘠民貧而土風亦漸丕變卑職初蒞茲土拜瞻

文廟竊見殿宇傾圯棟楹摧折聖賢木主不蔽風雨

至戟門兩廡瓦礫靡遺伏查餘學當萬曆開建之始麗於黃平國初雖另設黌宮亦遷徙無定至康熙七年戊申歲始購買民間舊房改造因陋就簡而歲月滋久蠹蟲蛀蝕且地勢窪下靈雨泉湧以致木植易朽卑職親沐

國家右文養士之恩仰體憲臺一道同風之化覩此宮牆傾圯彌切根本憂虞爰集教諭許之獬訓導鄭良佐暨闔邑紳士公議將地基墊高三尺撤舊宇而重新之擇吉於本年十二月十一日起工經

營伊始次第舉行理合詳請憲臺查考

學宮告竣申文

康熙五十三年

前人

爲學宮頽廢日久詳請修葺以妥聖靈以光文治事康熙五十二年十二月內卑職申詳倡捐修理餘慶縣學宮一案緣由奉批等因奉此該卑職隨卽倡捐銀叁拾兩教官倡捐銀拾伍兩典史倡捐銀叁兩紳衿士民人等共樂捐銀捌拾兩牒學支修去後卑職復又捐銀拾伍兩另修義學三間今據該教官開銷修理支給銀兩清冊前來卑職

查明脩案外所有修理學宮告竣緣由理合具文
申報憲臺查考

餘慶司趕場議

康熙五十三年

前人

審看得餘慶司爭復古場一案業經卑職前詳議
以餘慶司趕猴虎二日龍家壩趕龍狗二日詳批
在案繼因某等場期過近不能興趕復控批查質
審之下兩造場主居民人等各願其趕龍狗二場
辰日屬之餘慶戌日屬之龍家兩地人等歡心輸
服各具甘結在案似應聽從其便如其所議卑職

再四思維興一利必滋一弊恐地方光棍私抽租
稅魚肉商民似宜於開場之始嚴示曉諭並令鄉
保場主按季出具並無抽稅魚肉甘結呈投以便
不時稽查則弊端不滋矣奉本府江批如詳依議
繳

巖門構皮官渡申文碑示

前人

爲捐置船田請復官渡懇頒示禁以除民害事竊
卑縣所屬巖門渡口路通楚蜀爲客商必由之孔
道實盤查販棍之要隘也康熙四十五年間有土

棍毛某糾率族人占爲私渡勒索船錢前令屢詳
屢禁迨康熙五十四年內卑職署篆龍泉親經其
地查詢往來行人有走遍天下路難過巖門渡之
謠始知土棍橫勒情真致使商旅裹足行人抱恨
卑職窮源絕弊唯有捐造渡船捐買渡田另募渡
夫食田撐駕禁飭需索庶可弊端永絕再查餘邑
所有構皮灘渡離巖門二十餘里亦爲土棍私踞
勒索理合一并詳請憲臺頒示禁革庶責有攸歸
而地方得以寧謐矣

撫都院劉巖門渡碑示

爲嚴禁渡夫需索渡錢以便行商事據餘慶縣詳
稱巖門渡口該縣捐造船隻置買渡田渡夫食田
擺渡毋許需索行商緣由到院據此合行出示嚴
禁嗣後駕船渡夫有田膳養凡往來行人商賈隨
到隨渡毋許需索渡錢并不許私渡匪類與販其
毛姓棍徒毋得妄行奪駕倘有需索渡匪妄奪等
弊渡夫立即處死棍徒嚴拿解轅重究決不輕貸
本府江巖門渡碑示

爲捐置船田請復官渡成規懇祈示禁以除民害
事本年二月二十八日據餘慶縣詳稱前事據此
爲照巖門一渡南北之孔道楚蜀之濟津也向者
設立官渡以利往來商民稱便漸因日久廢弛遂
爲地棍毛姓私踞恣索渡錢百般勒捐稍拂其慾
輒肆行克甚於暴虎行人過而咨嗟商旅聞之裹
足雖屢經禁飭根源未絕積弊易萌茲據該縣詳
請復立官渡置田畝以膳渡夫造官船而另招渡
役不許需索船錢洵爲便民剔弊之良政誠恐前

此棍徒復萌故智合行出示永禁爲此示仰該地
方鄉保居民過客汎兵渡夫人等知悉嗣後遇有
來往過客隨到隨渡不得留難勒捐需索分釐并
不許毛姓地棍仍前私渡如敢故違許鄉保人等
呈報地方官嚴拿重處該鄉保汎兵通同容隱一
併重究法在必行勿得視爲具文自貽伊戚也
巖門渡本縣蔣碑示

爲曉諭事照得巖門渡爲土棍私踞勒索本縣捐
造渡船捐置渡田另募渡夫撐駕詳請示禁在案

誠恐無知渡役仍行勒索苦累商民爲此示諭商民人等知悉嗣後往來過渡該渡夫隨到隨渡毋得需索分毫留難勒指如敢故違許過渡商民人等扭稟以憑重處革換按月計追工食給付替役之人亦不得私渡匪販按月具結報查倘鄉保通同容隱查出並究不貸

構皮灘官渡本縣蔣碑示

爲嚴禁私渡以便商民事照得構皮灘原係官渡因歷久廢弛竟爲土棍楊陳二姓竊踞以致壞船

失事業經將渡夫楊加顏等責罰示儆詳報在案其渡口船隻現據倪愛民等承認新造渡船仍照巖門官渡成規除現在責令鄉保買置渡田另募忠實渡夫撐駕外擬合出示嚴禁爲此示諭鄉保并渡夫知悉嗣後凡遇往來無論遠近居民客商隨到隨渡不許勒索亦不得私渡匪類與販倘仍蹈前轍并土棍恃強奪駕或經訪聞或被首告立即鎖拿重究均毋有違

附載兩處渡田渡船銀兩田畝穀石條糧實數

巖門渡船壹隻捐銀陸兩叁錢打造

巖門渡田捐紋銀壹拾貳兩貳土司紳衿鄉保公同議價立契絕買楊樟名下上則田壹畝壹分玖釐每年計收江外市斗穀陸石折算倉斗穀壹拾貳石坐落餘慶里三排十甲地名蘭家蓬計田大小壹拾伍坵冊載條銀捌分陸釐捌毫柒絲秋糧貳升玖合叁勺肆抄柒撮其契存庫改立冊名巖門渡永爲渡夫工食

構皮灘渡船壹隻罰銀兩打造

構皮灘渡田捐紋銀壹拾貳兩貳土司紳衿鄉保公同議價立契絕買楊樟名下上則田壹畝壹分玖釐每年計收江外市斗穀陸石折算倉斗穀壹拾貳石坐落餘慶里三排十甲地名文宅門首計田大小伍坵蘭家蓬大小貳坵共柒坵冊載條銀捌分陸釐捌毫柒絲秋糧貳升玖合叁勺肆抄柒撮其契存庫改立構皮灘冊名永爲渡夫工食

捐建義學申文

蔣

溪

見前

爲捐建義學報明讀書生童事竊照義學之設久奉憲檄專令訓導化誨苗童遵行在案舉職蒞任以來查餘邑生齒日繁爭相向化所有義學一所久爲訓導居住間架湫隘僅容該學棲身難以廣集生徒卑職仰體憲臺化育之仁自應另設肄業綠亟修文廟未遑並舉業於康熙五十二年內學宮告成勒碑詳報在案旋復捐資庀材於學宮戟門之右壁棟三間週以圍牆中脩棹欂並五經通

鑑小學等書於本年二月初四日酌捐館穀供膳燈油等費令其安心訓誨不致一暴十寒往來曠廢據儒學擇報廩膳生員黃琮老成持重文行兼優堪充師任卑職隨傳文武生童及孤寒子弟俱令赴館讀書并不時詣館課試外所有在館讀書生童姓名理合造冊具文申報憲臺查考施行

補行厲祀牒城隍神文

前人

爲厲祭久缺特行補祀事竊照曾天之下治民祀神已有定制尚念冥冥之中無祀鬼靈昔爲生民

或死於水火盜賊或死於兵刃灾荒或因強逼而殞身或因危急而自縊此等孤魂或終於前代或歿於近世精魂未散結爲陰靈凡遇人間節令心思陽世魂杳杳以無歸身墮沉淪意懸懸而望祭興言及此餒魄堪憐曠典久湮特隆肇舉今於清明七月望十月朔日謹脩牲酒羹飯之儀祭享合境孤魂然幽明異境必資神力感通謹選草坪之側爲設奠之所理合移文神座先期鎮控壇場掃除妖魔魍魎召集無主孤靈曾享斯祭爲此

牒請照驗施行

紙皂題詞

不費爾錢不食爾穀無足而行不言而服招之則來去之必速凡我黎民慎勿輕瀆

勸農條約

前人

爲勸農條約事照得黔處天末地瘠民貧自昔已然近蒙各憲仰體

聖天子嘉惠邊隅之意實政撫綏年歲屢登地方漸裕然祁寒暑雨爾民之自爲衣食謀者固急而耕

九餘三本縣之代爲爾民慮者不得不周况天時有旱潦年歲有豐歉若耕作不勤則啼饑號寒在所不免本縣先經三令五申將勸農六條諭勉鄉保實力奉行今復親出於郊農之勤於墾植者爲之簪花飲酒以勸之其荒於墾植者爲之酌水以耻之如此而奮勇從事則室家有樂利之休婦子享盈寧之慶豈不美哉所有開墾種植製辦事宜特列於左

一開墾田土 衣食之計端在力農查餘邑實徵

冊籍皆報全熟然江外田土最寬豈無山坡崖脚荒棄不毛之所且新歸里尚有缺額若民有餘力地有餘利衣食從何而裕如有情願開墾者無論民苗異籍並許用力或有豪強阻奪許爾實告開熟之後永爲爾業可也

一製辦長鋤鐮刀 春作秋收有用力省而成功多者孳草用長鋤每人可鋤四五畝收穫用鐮刀每日可割十餘挑各省皆然唯餘邑不知此法芟草刈禾概用小刀每見二三男婦卽窮數

日之力尚不如他省一日之功若遇霖雨卽手足無措非收穫之法也此後爾百姓製造長鋤鐮刀以脩農器以省人力
一種棉織布採葛爲絺男耕女織衣食是資惟黔民不知種棉織布皆仰給外省嗟我窮黎終歲勤劬而外盈餘幾何焉得不赤體受凍也餘民稍知種植惜不甚廣嗣後農家苟有向陽沙土之處卽便種花婦女之能紡織者勤力紡織不善紡織者亦可換線換布至於葛藤遍山所

產不煩種植楚中男婦頗善刈穫之術餘近辰沅效而行之冬夏之具皆得資於服用而更獲利是在婦子之勤劬而已

一栽白蜡樹黔中不產蠶桑而有與蠶桑匹敵者莫過於種蜡樹放蜡蟲魯見放蟲一年而致有百金之獲者觀其所栽之樹無多也所蓄之法不煩也不過於田塍土坎間栽植百株放蟲數升及取蜡取蟲之時而賈人自來收取又不
用本人費力此種大利急宜早圖蓋地土各有

所產何必專事於蠶桑也
一種桐油樹叢茶 農家衣食而外山林材木不可勝用如白楊青桐諸樹本縣勸諭再三爾民亦知種植獲利矣至於油爲必需之物如芝蔴菜豆之油尚須年年栽種若桐樹係極大木本一日栽培百年收利每見山家言富輒舉桐樹之多寡以對爾百姓多種數百株數年之後長成茂林可取油千百觔近而身享其利遠而貽及子孫更有勸者茶乃日用之物餘邑粗種皆

極不堪務須揀買叢茶佳種分植山坡之間叢茶旣多販於川楚甚便何不勉力乎

一鑿池養魚 養魚之利爾民不知湖南江浙號稱澤國魚利旣多復築塘飼養惟黔地無池以致家無鮮食肆止枯魚今勸爾民於山曲低窪之處有積水者鑿而爲池取各種魚苗依法飼養而滋生不息其利無窮亦陶朱之妙術也

條議

前人

一錢法之宜創也蓋黔地處於川楚滇粵四省之

間雖曰山高路險駝載維艱然四省與黔接壤行路之難無分彼此豈錢可行於彼而獨不可行於此乎緣官斯土者難於創始以致九府圉法不能疏通於羅施鬼國之所故寸絲尺布頓飯壺漿一分一釐所需必銀銀之高下戔之大小豈能畫一旦卽一錢而論零星鑿鑿分爲十注勢必銷耗二三僅存七八不惟交易不均更起奸徒假造貼箔鑽鉛之弊商賈受大戔重枰之苦議者謂黔地苗民雜處恐便於民而不便

於苗以苗所賣鷄猪鵞鴨皆賴以納正供者慮上不收退而換銀必多耗損殊不知銀七錢三之法正供與兵餉各省通行況民苗雜處四省皆然滇黔鄰並採銅更易則開局鑄鑄較省他處之費若一舉行居民商賈均沾其便不但開千古未有之仁政且啟萬世無窮之樂利矣一鹽政之宜開也鹽之爲物民之日用不可一日闕所以地不愛寶或產於海產於地產於井產於石與木種類不一在在有之獨於黔皆仰給

於蜀微蜀則黔幾不知味矣况蜀道之難舟楫不通馬駝背負肩瘡血蹄而後至其來也不易加以關稅櫛比則值不得不昂蓋天地之利不擇地而生豈黔真不產鹽乎卽如餘慶之葛助溝羅家寨之鹽井溝修文縣之梅子溪鹽井田扯泥堡鹽井坡大定平遠安龍等處皆有跡可尋因黔民癡愚因循苟且牢盤之術無人爲民上者管商之政未遑講及若切責全黔府州縣募一蜀人善識鹽井者遍地相視探其有無揆

其深淺煎熬試驗實力奉行則上增國課下利民生川澤効靈仙牟舐滷之瑞未必不爲德政所感也

一修城垣宜量開事例也案奉部文疊催地方官設法修理城垣不得派累小民誠保國恤民之盛意也但地方官點金無術俸工銀兩因公捐應縱有巧婦之手難爲無米之炊每遇上行催迫惟有仰屋嗟吁工程浩大片石無存者無論已或尚有城垣基石之處勢不得不借民力

因陋就簡畧加補葺以完上件但不過土功培築非用石工磚灰修砌堅實可以經久者比一遇夏秋靈雨卽皆倒塌年年修城終無竣工之日是愛民適以累民也曷若先將各處修城材料工價估計若干通省合費若干量開捐納事例無論外省旗民人員或加級紀錄誥封貢監之類限時捐足卽行停止然後照各處原佑之價發該地方官修理務令堅實經久如是則上不費公帑下不累小民城池永固 國計民生

均有賴矣

一要隘宜駐札營員嚴查拐犯也川楚流棍潛入黔省內地假貿易星卜巫醫爲名往來旣熟無論漢苗男婦或套哄夥迹或細綁強拏有三五十人一行六七十人一行者俱係刀鎗器械晝伏夜行又有本地奸宄爲之護送賫餉飲食保甲人少不敢過問塘汛兵單不敢盤查以致公行無忌然多由烏江卽將一帶過渡其烏江上游非縣屬境內者不敢妄議惟查平越府潛潭

屬之袁家渡餘慶屬之構皮灘巖門渡三處爲川楚必經之孔道離縣治七十八里鞭長不及且坡險路窄土棍勒索商民業經詳憲勒碑嚴禁外但現在渡夫豈能禁絕興販請於平越營另委把總一員帶兵四五十名駐札巖門凡構皮灘以及中間沿河居民小船過渡之處令把總不時巡查遇有真正拐犯卽行擒拏解地方官審究如渡口擅自賣放不報營汛者卽係通同遞送奸棍嚴加究處朔望取具渡夫並沿河

有船居民甘結報查如此則刁拐奸徒豈能越江飛渡耶倘平越營弁各有專管汛地無官可委又難添設莫若卽以黃平餘慶防守把總移駐巖門江岸旣免添設兵弁又未遠離本汛一轉移間而拐犯絕跡奸宄潛消綏靖地方計無出於此也若夫烏江上游亦倣此行之則興販流棍不禁而自息矣

一鄉飲宜行也鄉飲酒禮所以尊德尚齒勵俗獎善之一道也在他省文教之邦歲歲舉行且平

時父兄之教訓師友之箴規無非詩書禮義至於黔省子弟既鮮父兄師友之益而鄉飲酒禮從未經見欲人心之厚風俗之淳胡可得耶是以習與性成澆漓刻薄以少凌長骨肉忿爭故欲黔民稍知禮義曷若舉行鄉飲請先將鄉飲程式並

朝廷所以行鄉飲化民成俗之意開明條教俾蚩蚩之衆曉然知所以尊德尚齒之義然後舉而行之但黔省州縣地方鮮致出仕可爲大賓諭令

儒學公舉僎介耆賓考其實行真正可爲鄉黨表率者給匾勸獎使人知鄉飲之榮各自愛重瘡惡之理無不在彰善之中也

一社學宜設經書宜刻頒也黔中之士雖苦貧瘠然有志讀書者豈繫無人苦於無書無師所以僞學之紛雜也查康熙四十四年前任撫都院于題請設立義學教訓土司苗民子弟命訓導專董其事固甚盛舉也年來廢弛未見舉行夫黔省漢苗雜處州縣地方遼濶居民離城數

十百里不等多係半耕半讀如必赴城義學讀書不惟日食維艱且苦於往來跋涉難以遠離請於在城義學之外凡鄉村場集人烟輻輳適中之地寺觀神廟設立社學無論漢苗子弟俱入讀書其塾師館穀地方官捐俸報明督撫更加意作養以興文教再有江右潮廣二省流民往往借星相巫師之術游食黔中代人書寫詞狀唆撥挑訟蠱惑愚民延請教讀彼以詞狀套話本名曰公理雜字教訓子弟是以黔民不知

義禮無不解做詞狀者壞人心敗風俗莫此爲甚嗣後鄉間社學塾師不妨就地取材以舉貢生員文行兼優者爲之如非五經古文子史一切異教之書概行燒燬非舉貢生員文行兼優者一切游食之人不許教習設法捐資鐫刻五經全註三傳周禮孝經小學通鑑數十部黔中紳衿家俱無全五經全左傳周禮惟古文中有行令制憲貝公所刻古文淵鑑一部頒發在學各學教官給發如此則遠近無不教之子弟得師得書人心正而風俗端矣更有請者黔俗疾

病之人信鬼而屏醫卽如餘慶通縣止有醫生一人飢寒垂斃皆由土俗不信服藥流官有疾倉皇無措上司宜捐刻醫方簡要之書頒發各學查考劣等生員令其習熟如果醫治有效准給衣頂則尚鬼之風亦可漸易也

論曰餘慶藝文自萬曆庚子以後不過數篇今窮搜博採并余蒞事以來諸賢投贈之作悉載入志者非濫也蓋欲俾餘邑好古之士知詩文各體經濟風雅力溯源流則司馬楊雄之才乎哉

虛長楊之賦未必不在烏江泥水間也餘士勉

餘慶縣志後序

志之義何昉乎周官有職方而天下之
地圖盡入王會所以察土宜而體國經
野之道從此出也太史得陳詩而天下
之習俗傳之歌詠所以驗風氣而移風
易俗之治由此成也嗣是班固志地理
而著述家祖之寰宇內邑自為紀郡自

為載皆命之曰志土宜因之以察風俗
因之以傳山川人物藉以潤色因革損
益賴以措置災祥水旱資其補救所係
匪渺也黔為天末而餘邑復處黔之西
偏萬曆庚子始設縣距今止百餘年耳
開創未久其堪紀載者幾何此忝議徐
公所以附之平越郡志之後而邑無端

乘也康熙癸巳歲邑侯 蔣夫子以東
吳名宿十年入直

內廷懷鉛握槧多所纂述奉

天子命出宰是邦下車後勤問疾苦重邦
本也重新

文廟崇聖教也建立義學敷文治也創祠
名宦表遺澤也勤課士而獎孝義勵風

俗也置渡田兩造舟楫惠行旅也公餘披閱郡志見其搜羅未廣誌載未詳不禁喟然嘆曰我

朝教養之澤淪肌浹髓餘雖蕞爾田賦納之王朝版圖載在王府山川效靈人文改觀先後宰斯土者又皆能仰體聖心克盡厥職而風移俗易

聖主加意邊方

欽命大人省視郡縣繪圖入告崇山疊嶂皆有車轍馬跡焉此萬世所罕觀皆可志也胡不可成一邑之乘乎因與廣文許公冥搜事跡斟酌古今自城池兵賦以及山川人物學校藝文凡有關於政治者條分縷析參以論斷兩閱寒暑成

帙若干出以示奇且命為之序奇堅以
不文辭公曰余之為是非止以文章炫
人耳目飾諸觀聽也將以見之事者載
之書子生長於斯且即日得官以去可
少一言以為玄晏乎奇因伏思猶是餘
邑也前之賢司牧何以無志或亦鄙餘
為不足志或精神有所不暇及吾師能

相厥土宜因俗為理行之有本末施之
有次第故遊必有餘而旁及于紀載俾
海內名流披覽之下必有欣然樂至其
地者皆吾師啓之也奇因慶桑梓文獻
之有歸且見君子之有益於人國如此
爰拜手而書之
肯

康熙伍拾陸年丁酉歲季夏月上浣治
下受業門人廖士奇頓首拜撰

